

Sámegielat rádio ja sápmelaččat

Yle Sámi guldalandutkamuš 2018

Aletta Lakkala

Pro gradu -oahppočajánas

Davvisámegiella

Giellagas-instituhtta

Oulu universitehta

Dálvet 2018–2019

Sisdoallu

1 Láidehus	4
1.1 Dutkanfáddá ja -ulbmil	4
1.2 Duogáš	5
1.3 Dutkanvuohki	6
2 Teorehtalaš duogáš.....	8
2.1 Yle Sámi rádioguldaleapmi 1950-logus dán beaivái	8
2.1.1 Hárvenaš rádiorusttegiid gurrii čoahkkaneapmi 1950-logus	8
2.1.2 Dehálamos diehtogáldu ja identitehta huksejeaddji 1970-logus	9
2.1.3 Lasi geahppa prográmma ja musihkka 1980-logus	13
2.1.4 Guldaleaddjit guldaledje ain 1990-logus	15
2.1.5 Oktiigeassu árat guldaleaddjidutkamušain	17
2.1.6 Yle Sámi rádio 2018	18
2.2 Eatniigelat media ja rádio mearkkašupmi vehádahkii	19
2.2.1 Hukse identitehta ja ovttastahttá álbumoga	19
2.2.2 Doaibmá giellabargin	21
2.2.3 Lea vehádaga iežas diehtojuohkki ja váldomedia vuostemedia	24
2.3 Rádio lea bivnnut Suomas	27
2.4 Rádio guldalandábit	28
3 Dutkamuša ollašuhttin.....	31
3.1 Deaddu kvantitatiiva dutkamušas.....	31
3.2 Dutkančuozáhat	32
3.3 Dutkanmateriála čoaggin ja giedahallan.....	33
4 Bohtosat ja analysa	38
4.1 Oppalaš dássi.....	40
4.1.1 Guldalandábit	40
4.1.1.1 Guldalanmearit	40
4.1.1.2 Gos?	42
4.1.1.3 Mainna?	45
4.1.1.4 Goas?	47
4.1.2 Miela miel sisdoallu	51
4.1.3 Guldaleami sivat ja mearkkašumit	55
4.1.3.1 Sámi ságat	56
4.1.3.2 Sámegiella	58
4.1.3.3 Sámemusihkka	61
4.1.3.4 Identitehta ja oktiigullevašvuhta	62
4.1.4 Guldalmeahttunvuhta	63
4.1.5 Dudavašvuhta ja sávaldagat	65
4.2 Agi, sohkabeali, eatniigela ja ruoktoguovllu váikkuhus guldaleapmái	67
4.2.1 Guldalanmearit	68
4.2.2 Miela miel prográmmat	72
4.2.3 Guldalansivat	76
4.3 Sámeguovllus ja -guvlui fárrema váikkuhus guldaleapmái.....	80
5 Loahpahus.....	85
Gáldut.....	94
Čuvvosat.....	100

1 Láidehus

1.1 Dutkanfáddá ja -ulbmil

Dutkkan Pro gradu -barggustan sámegielat rádio guldaleami, dan sivaid ja mearkkašumiid sápmelaččaide lagi 2018. Yle Sámi Rádio lei Suoma vuosttas sámegielat media ja lea ain dán beaivve okta gievrramusain: ovdamearkka dihte sámegielat tv-fálaldagat ja aviissat leat ain unnán ja some- ja neahttasisdoalutge olles Sámi geahččanguovllus vánis. Yle Sápmi, ovddeš Yle Sámi Rádio, lea doaibman badjelaš 70 lagi, lagi 1947 rájes. Sámegielat rádiosáddagat leat gullon vuosttas beaivvi rájes gitta otná beaivái jeavddalaččat ja sáttadoaibma lea boatkanan jagiid áigge dušše moddii earret eará bargiidstreaikka ja Anára doaibmadálu sisáibmováttisvuodaid dihte. Sámegielat rádiodoaibma álggii ođđasiiguin ja vuoinjalaš sáddagiiguin, muhto dán beaivve dat sistisdoallá maiddái olu eará: ovdamearkka dihte mánáid- ja nuoraidprógrámmaid, arkiivaságaid, iešguđetlágan temábottuid, áigeguovdilis beaivválaš sáddagiid ja sámedoaimmahuasid oktasaš davviriikkalaš iditsáddagiid. Yle Sámi Rádio álggahii davvisámegielat prógrámmaiguin, muhto 1970-logu rájes leat gullon maiddái nuortalašgielat ja 1980-logu rájes anárašgielat sisdoalut. (Lehtola 44–45, 71–72; Yle Sápmi 2018a.)

Vaikko digitála revolušuvdna lea buktán mielddis olu ođđa diehtojuohkingaskaomiid, lea rádio Yle Sámi doaimmahusa iežas sániid mielde ain dan ”dehálamos giellaealáskahttinbargoneavvu”. Rádios lea stuorra mearkkašupmi erenoamážit njálmmálaš sámegiela ja suopmaniid gáhtjejeaddjin. Yle Sápmi maiddái ođasmahttá sámegiela, go rádio bokte levvet sámegillii ođđa sánit ja dajahusat, mat adnojuvvojít dálá servodagas ja eallimis. Rádio ovddida sámekultuvrra juogedettiin olbmuide sápmelaš ja sámegielat musihka, máidnasiid, muitalusaid ja ságaid. Davviriikkalaš sámerádiooid ovttasbarggu bokte Yle Sámi rádioprográmmat ovttastahttet sámeálbmoga ja nannejit sápmelaččaid identitehta. Dat muitalit áššiin sámi jienain. (Yle Sápmi 2018a.)

Pro gradu -barggustan leat guokte váldodutkangažaldaga:

- Mo sápmelaččat guldalit sámegielat rádio 2018?
- Makkár sivat ja mearkkašumit sámegielat rádio guldaleapmái laktásit?

Sápmelaččaid rádioguldaleami dieđalaš gieđahallan ii jur gávdno Suoma beale Sámis. Lean jagiid áigge vuohttán ollu ovdagáttuid ja navdámušaid das, geat sámerádio guldalit ja makkár prográmmat sin geasuhit – orru almmolaččat jurddašuvvomin, ahte sámerádio guldalit váldoášsis sámeguovllu boarrásot buolvva sápmelaččat, geat fas guldalit mielas ođđasiid ja vuoinjalaš prográmmaid. Dáid jurdagiid duohken, iige dákkár jurdagiid čilgehussan leat goittotge makkárge dieđalaš vuoduštus.

Gieđahalan barggustan earret eará Yle Sámi rádioguldaleamis árat dahkkojuvvon dutkamušaid, vehádatgielat rádio mearkkašumis čállojuvvon girjjálašvuoda ja rádio sajádagas váldoservodagas dahkkojuvvon čielggademiid, ja speadjalasttán iežan gávdnosiid daid ektui.

1.2 Duogáš

Yle Sámi 70 rádiojagi áigge sámegielat rádiosáddagiid guldaleapmi ii leat dutkkojuvvon beare máŋgii. Boarrásamos guldaleaddjidutkamušat 1950- ja 1970-logus vuodđduuvvet sámeguovllu rádiorusttegiid mearrái, mii oasistis muitala das, man ollu málbmi lea rievdan. Yle Sámi rádio varrasamos almmolaš guldaleaddjidutkamuš lea dahkkojuvvon jagi 1995, badjel 20 jagi dassái. Dan maŋjá leat goittotge sihke servodat ja mediamáibmi nuppástuvvan nu sakka, ahte sámeservošage rádioguldaleapmi lea sáhttán rievdan radikálalaččat. Earret eará ođđa áiggi mediafáláldagat, digitála teknologija ja váldogielat media leat sáhttán čuohcat sápmelaččaid rádioguldaleapmái.

Ledjen beroštvvan dutkat sápmelaččaid rádioguldaleami dili, daningo lean ieš sihke studeren journalismma ja bargan Yle Sámi journalistan badjelaš logi jagi. Lean sihke sápmelaš journalistan, journalismastudeantan ja servodatberošteaddjin máŋgii smiehttan, makkár joavku sámegielat rádiosáddagiid guldala, mo sii dan dahket ja maid

dat sidjiide mearkkaša. Tv-geahčiid ja neahttaságaid lohkkiid mearis Yle Sámi doaimmahus oažju dieđuid jeavddalačcat, muhto rádioguldaleaddjiid mearis eai leat fidnemis áiggedását dieđut, daningo daid mihtideamis eai leat anus fásta mihttárat. Máinnašan dán oktavuođas, ahte bargohistorjjástan fuolakeahttá in leat leamaš mielde čállimin Yle Sámi strategalaš ulbmiliid ja oainnuid, maid buvttán ovdan dán dutkamušas.

Ledjen beroštvwan dutkat rádio sajádaga sámeservodagas goit buot ovddemusat iežan eatnigiela, sámegiela dihte. Lean álo leamaš giellaberošteaddji ja dan dihte lohkan sámegiela iežan válđoávnnesin Oulu universitehta Giellagas-instituhtas. Sámegielaid dilli lea rašsi miehtá Sámi. Maiddái Suomas riikka garra assimilerenpolitihkka doalvvui giela viiddis oasis álbgogis, man dihte sámegiella ii leat sirdásan eatnigiellan máŋgga mu buolvva sápmelažzii. Assimilašuvnna dihte stuorra oassi mu buolvva nuorra ollesolbmuin ii leat beassan oahppat sámegiela ruovttus. Leange ilus čuvvon, mo ain eambosat leat váldigoahtán gielaset ruovttoluotta earret eará skuvlaoahpahusa bokte. Skuvllat gal bastet oahpahit sámegiela girjegiela, muhto Sámi viiddis njálmmálaš árbbi dat eai okto bastte gáhttet. Dasa eai bastte maiddái čállojuvvon sámegielat neahtaođdasat ja preassa – eaige vel dán dilis televišuvnna, neahta ja sosiála media njálmmálaš sisdoalut daid vátnivuoda dihte. Rádio dan sajis sáhktá buoremus dilis doaibmat beaktilis gaskaoapmin sámi rikkis njálmmálaš giellaárbbi gáhttemis ja lebbemis. Dan ektui duoh tavuohta das, ahte varrasamos dutkamuš guldaleaddjiid ja sámerádio gaskavuođas lei dahkojuvvon Suomas badjel 20 jagi dassái, leamaš stuorra váilevašvuohta dilis, mas sámeservošiš leamaš goiku oahppat sámegiela ja mas sámegiella livčii dárbašan eanet doarjjadoaimmaid.

1.3 Dutkanvuohki

Barggustan lea deaddu kvantitatiiva dutkamušas. Dutkkan rádioguldaleaddjiid láhttema ja oainnuid kvantitatiivvalačcat, ja čilgen daid dutkamušastan earret eará govvoiiguin. Dán ja eará dutkamušaid kvantitatiiva bohtosiid veardidemiin analyseren sápmelaččaid rádioguldaleamis dáhpáhuvvan nuppástusaid áiggiid mielde. Dulkon goittotge maiddái

sápmelaččaid rádioguldaleami kvalitatiiva beliid, mat buktet dutkamuššii čiekŋalot áddejumi sámegielat rádio mearkkašumis sápmelaččaide.

Dutkamušan čuožáhatjoavku leat badjel 15-jahkásaš sápmelaččat. Lean čoaggán dutkanmateriála buohkaide rabas gažadanskoviigun (čuvvosat 1–4), maid juhken válđoášsis neahta bokte ja main maiddái dieđihin sosiála media, diehtojuohkingaskaomiid ja sámi organisašuvnnaid bokte. Skoviid lei vejolaš deavdit njealji gillii: anáraš-, davvisáme-, nuortalaš- ja suomagillii. Oassi gažaldagain ledje strukturerejuvvon gárves vástádusmolssaeavttuigun, muhto skovis ledje maiddái moadde rabas gažaldaga. Vástideaddjit devde skoviid namaheapmin, muhto dain bohtet ovdan olbmo ahki, sohkabealli, eatnigiella ja ruoktogielda. Veahkehin oasi, eandalitge boarrásot vástideaddjiid, skoviid deavdimis.

Jerren vástideaddjiin ovdal gažadanskovi deavdima, atnetgo sii iežaset badjel 15-jahkásaš sápmelažžan. Nuppiid sániiguin gažadeapmái vástidedje olbmot, geat identifiserejít iežaset sápmelažžan. Mu mihttomearrin lei fidnet dutkamuššii stuorra vástideaddimeari vuoi bohtosat livče deaivilat ja luohttehahttit. Rádioguldaleami mearri sáhttá molsašuddat sakka olbmuid gaskkas, man dihte soaittahagas válljejuvvon unna čuožáhatjoavku ii heiven materíalan dán dutkamuššii. Dutkamuššii vástidedje 160 badjel 15-jahkásaš, iežaset sápmelažžan identifiserejeaddji olbmo.

2 Teorehtalaš duogáš

Teorehtalaš duogáš láhcá dutkái vejolašvuoda gávdnat ja hukset dieđu áššiid oktavuođain, njuolggaduslašvuodain ja stuorát ráhkadusain. Teorehtalaš duogáš lea mearriduvvon geahčanguovlu, mii doaibmá rámman dutkamuša áiccuid giedahallamis. (Alasuutari 1994: 67–69.) Giedahalan dán logus Yle Sámi rádio guldaleamis árat dahkkojuvvon diedalaš dutkamušaid ja Yle iežas rapporttaid, vehádatgielat media ja rádio mearkkašumis čállojuvvon girjjálašvuoda, addo gárvánan čielggadeami rádioguldaleami dilis Suomas ja rádioguldaleami teorijaid.

2.1 Yle Sámi rádioguldaleapmi 1950-logus dán beaivái

Suoma Yleisradio lea sádden sámegielat rádioprográmmaid jagi 1936 rájes, muhto jeavddalaččat easka jagi 1947 rájes. Vuosttas virggálaš sámerádio sätta álggii dainna, go Johan Nuorgam logai Suoma Yleisradios vuosttas sámegielat oddasiid 6.10.1947 (Lehtola 2001: 9). Vaikko Suoma sámerádio lea gullon badjelaš 70 jagi, leat das dahkkojuvvon unnán guldaleaddjidutkamušat. Lokten bajás guhtta dutkamuša 1950-logus gitta 1990-logu beallemuddui. Dutkamušat giedahallet Suoma sápmelaččaid medialáhttema máŋgga geahčanguovllus ja čilgejtit maiddái earret eará sápmelaččaid suomagielat media, dego rádio, televišuvnna ja prentejuvvon media geavaheami. Mun lean čoaggán árat dutkamušain iežan dutkamušii Yle Sámi rádioguldaleami guoski relevánta osiid.

2.1.1 Hárvenaš rádiorusttegiid gurrii čoahkkaneapmi 1950-logus

Samii Litto dutkkai jagi 1952 rádiorusttegiid oamasteaddjiid ja guldaleaddjiid logu Suoma sámeguovllus ja lagaš guovlluin. Rádioaparáhtat ledje dan áigge vel meari beales oalle unnán, muhto muhtun báikkiin oalle olu olmmošmeari ektui, ovdamearkka dihte Anára Menešjávrris ledje 20 rádiorusttega ja Čeaveatjávrrisge logi stuhka. Čeavetjávrri rádio stuorra meari čilge Lehtola (2001) mielde dat, go nuortalaččat ožzo

sihke materiálaveahki ja ruđalaš doarjaga. Rádiorusttegat ledje 1950-logus ollu maiddái erenoamážit badjeolbmuin ja ohcejohkalaččain. (Lehtola 2001: 12.)

Ovtta rádio guldaledje 1950-logus Anára gielddas gaskamearálaččat unnimustá čieža olbmo, Ohcejoga gielddas gávcci olbmo, Soađegili gieldda Vuohčus ja Burdnomohkis ovcci olbmo ja Eanodaga gielddas guhtta olbmo. Anáris rádio árvaledje nappo guldalit 378 sápmelačča, Ohcejogas 544 sápmelačča ja Eanodagas ja Vuohčus 225 sápmelačča. Samii Litto dutkamuša mielde sámegielat sáddagiid guldaledje lagi 1952 oktiibuot 1147 olbmo. Sápmelaččat ledje viššalat guldalit sámerádio sáddagiid ja das bođiige sámeservošii sosiála ovttasorrunvuohki. (Lehtola 2001: 13.)

2.1.2 Dehálamos diehtogáldu ja identitehta huksejeaddji 1970-logus

Suoma sámerádio sáddagat sáddejuvvojedje álgoáiggiid Oulus ja lagi 1960 rájes Roavvenjárggas, muhto 1970-logus sámerádio doaimmahus fárrii sámeguvlui Anárii. Länsman (1987: 1) gohčodage fárrenjagi, 1972, sámerádio vuodđudanjahkin.

Suomas dahkkojuvvojedje 1970-logus lahkalágaid guokte sámerádio guldaleami guoski dutkamuša. Kari Rantanen dutkkai Suoma sápmelaččaid rádio- ja tv-geavaheami 1970-logu álggus. Rádio- ja tv-rusttegiid oamasteami ja guldaleami lassin Rantanen čielggadii earret eará sápmelaččaid oainnuid daid ektui. Rantanen ii nappo dutkan dušše sámerádio guldaleami, muhto baicce oppalohkái sápmelaččaid dan áigge medialáhttema. Riitta Vehviläinen Pro gradu -dutkamuš lagi 1974 bealistis čielggadii, mo Suoma sápmelaččat geavahit diehtojuohkingaskaomiid, dego sáme- ja suomagielat rádio, televišuvnna ja prentejuvvon media. Vehviläinen lei beroštuvvan čielggadit, mo sápmelaš eallima erenoamáš iešvuođat, dego gielalaš ja kultuvrralaš aspeavttat, luondduealáhusat ja guhkes geográfalaš gaskkat váikkuhit áššái. Sihke Rantanen ja Vehviläinen dutkančuožáhat ledje sámeguovllus ássi badjel 15-jahkásaš sápmelaččat. Rantanen veardidii dutkanbohtosiiddis Davviriikkalaš Sámirádi Suoma juhkosa geasset 1962 dahkan álbmotlogahallamii, mii meroštalai sápmelažžan olbmo, guhte ieš atná iežas sápmelažžan. Vehvilainenges meroštalai sápmelažžan dutkamušas oktavuođas olbmo, gii ieš dahje gean vánhemiiin dahje áhkuin ja ádján unnimustá okta lea oahppan

sámegiela vuosttas giellan. Guktot dutkamušat čađahuvvojedje njálmmálaš jearahallamiiguin. Rantanen dutkamušii oassálaste 347 ja Vehviläinen dutkamušii 162 olbmo. (Rantanen 1971: 1–3; Vehviläinen 1974: 16, 23–24.)

Kari Rantanen dutkamuš čájehii, ahte olles 95 proseantta sápmelaččain oamastedje 1970-logu álgomuttuin rádiorusttega. Dat sápmelaččat, geat oamastedje dušše rádio, guldaledje dan (sihke sáme- ja suomagielat sáddagiid) gaskamearálaččat 2 diimma 30 minuhta beaivvis ja dat, geat oamastedje rádio lassin maiddái televišuvnna, golahedje rádio guldaleapmái gaskamearálaččat 1 diimmu 45 minuhta beaivvis. Sápmelaččat guldaledje rádio dábálamosit diibmu 18–20 gaskkas. Guldalanáiggiide váikkuhi goittotge dat, oamastiigo olmmoš rádio lassin maiddái televišuvnna. (Rantanen 1971: 8–15.)

Rantanen jearai dutkamušastis sápmelaččaid oainnuid heivvolamos áiggis sáddet sámegielat rádioprográmma. Vástideaddjiid mielas buot buoremus vahkkobeavivi sámegielat rádio guldaleapmái lei sotnabeaivi, nubbin lávvardat ja goalmádin vuossárga. Rantanen fuopmášumi giddii goittotge dat, ahte badjel bealli vástideaddjiin ii lean oppanassiige beroštuvvan áššis. Heivvolamos diibmoáigi sáddet sámegielat rádioprográmma lei dutkamuša mielde diibmu 18–20, man goalmádas vástideaddjiin anii buot buoremus áigin. Nubbin heivvolamos áigin atne diibmu 12–18. Lagabui bealli vástideaddjiin ii lean goittotge beroštuvvan dánge gažaldagas. (Rantanen 1971: 16–17.)

Vaikko Rantanen gávnahii, ahte sápmelaččat eai orron nu beroštuvvan sámegielat sáddagiid sáddenáiggis, duođaštii Vehviläinen iežas dutkanbohtosiiguin, ahte sápmelaččat guldaledje sámerádio viššalit. Lagabui bealli, 46 proseantta vástideaddjiin, guldalii sámerádio álo dahje oalle dávjá, 24 proseantta guldalii sáddagiid duollet dálle ja 25 proseantta oalle hárve dahje ii goassige (Vehviläinen 1974: 74). Sámerádio bálvalii buoremusat davvisámegielat guldaleaddjiid, muhto maiddái anárašgiela eatnigiellán hálli vástideaddjit ledje viššalat guldalit sámegielat rádiosáddagiid (Vehviläinen 1974: 75).

Vehviläinen dagai máŋga miellagiddevaš kultuvrralaš fuopmášumi rádioguldaleamis. Su dutkamuš čájehii, ahte sápmelažžan iežaset atni vástideaddjit guldaledje sámerádio čielgasit eanet go suomaiduvvan sápmelaččat. Sámekultuvrra seiluma oktavuođa sámerádio guldaleapmái duođaštii maiddái dat, ahte boazodoalus luohpan sápmelaččat guldaledje sámerádio uhcit go sii, geat ledje ain badjedilis. Badjeolbmot orro muđuige berošteamen rádioguldaleamis eanet go earát. Boazodoalliin 65 proseantta oaivvildii, ahte sámegielat rádioprográmmat ledje menddo unnán, go eará sápmelaččain nu jurddašii dušše 40 proseantta. (Vehviläinen 1974: 76.)

Davvisámegielat guldaleaddjiin sullii 75 proseantta oaivvildii, ahte sámegielat rádioprográmmat ledje menddo unnán, go seammá jurddašii 26 proseantta anárašielat, 16 proseantta nuortalašielat ja 33 proseantta suomagielat sápmelaččain. (Vehviläinen 1974: 75.) Nuppiid sániiguin, vaikko suomagielat sápmelaččat eai olus guldalan sámerádio, sii atne dan das fuolakeahttá dehálažžan.

Suoma sámerádio guovddáš sisdoallun ledje jo álgojagiid ja vel máŋgalot jagi dan maijyá oddasat ja vuoiŋjalaš sáddagat. Rantanen dutkamuša mielde sápmelaččat guldaledje 1970-logus sámegielat rádioprográmmain millosamosit namalassii ođđasiid ja diehtoprográmmaid (Rantanen 1971: 18–20). Vehviläinen dutkamuš čájehii seammá: sámerádio eanemus guldaluvvon prográmmat ledje ođđasat, maid guldalii jeavddalaččat lagabui bealli vástideaddjiin (Vehviläinen 1974: 77).

Rantanen diđoštalai sápmelaččain, áddejítgo sii buorebut suoma- vai sámegielat (geavadis davvisámegielat) rádioođđasiid. Bohtosat ledje miellagiddevaččat. Vástideaddjiin measta buohkat, 91 proseantta, áddejedje dievaslaččat suomagielat rádioođđasiid, go dušše badjelaš bealli, 58 proseantta, áddii dievaslaččat sámegielat ođđasiid. Vástideaddjiin 13 proseantta ii ádden sámegielat ođđasiid ollenge, go fas suomagielat ođđasiid áddemis ledje váttisvuodat dušše ovta proseanttas vástideaddjiin. Buot eanemus dakkár vástideaddjit, geat eai ádden sámegielat ođđasiid ollenge, ledje Anáris. Maiddái nuorat buolva (15–19-jahkásaččat) áddii sámegielat ođđasiid čielgasit fuonibut go boarrásot. Sivvan lei sihke dat, go ođđasat ledje dušše beare davvisámegillii ja dat, go ođasgiella sáhtii leat gággadot go dábálaš hállangiella. Dutkamuša nuortalaš

vástideaddjiin ii oktage lohkan iežas áddet davvisámegielat rádioodđasiid, ja davvisámegielatge vástideaddjiin daid áddii dušše 79 proseantta. Dasa, ahte oppa davvisámegielagat iežage eai ádden iežasgielat rádioodđasiid, sáhttet Rantanen mielde leat váikkuhan earret eará oðasgiela sátneválljejumit, vierisgielat sánit, cealkkaráhkadusat ja suopmanerohusat. (Rantanen 1971: 33–36.)

Maiddái Vehviläinen fuomášii oðasgiela váikkuhusa guldaleaddjiprofilii. Buot sámegielat rádioprográmmaid guldaledje eanemusat dat, geat ledje oahppan davvisámegielat vuosttas giellan. Nubbin bohte anárašgielagat, goalmádin nuortalašgielagat ja buot unnimus sámegielat prográmmaid guldaledje suomagielat sápmelačcat. (Vehviläinen 1974: 77.) Boazodoallit ledje maiddái viššalamos oðasguldaleddjit. Sin maijyá oðđasiid guldaledje eanemus olu skuvlejuvvon ja dan maijyá skuvlekeahthes sápmelačcat. Unnimus sámegielat oðđasiid guldaledje ámmátskuvlejumi dahje eará sullasaš skuvlejumi ožzon sápmelačcat. Vehviläinen dulkuige, ahte eanemus oðđasiid guldalii badjel 40-jahkásaš luondduealáhusaiguin bargi sápmelaš. (Vehviläinen 1974: 78.)

Sápmelačcat guldaledje 1970-logus mielas rohkosprográmmaid. Dušše gávcci proseantta Rantanen dutkamuša vástideaddjiin ii goassige čuvvon daid (Rantanen 1971: 38). Vehviläinen goit dárkkálmahtii, ahte boarrásot buolva lei viššalot guldalit rohkosprográmmaid go nuorat – erohus vuollel ja badjel 40-jahkásacčaid gaskkas lei Vehviläinen dutkamušas mearkkašahtti. Boazodoallit guldaledje rohkosprográmmaid sullii seamma olu go earáge vástideaddjit, muhto suomaiduvvan sápmelačcat dan sadjái guldaledje daid čielgasit uhcit go sápmelažjan iežaset atni vástideaddjit. (Vehviläinen 1974: 80.)

Rádios lei erenoamáš dehálaš rolla Suoma sápmelaččaid eallimis 1970-logus, go vuodđuduuvvui sámelihkadus, mii oðđalágan sámepolitihka ja -dáidaga bokte rievdadii sápmelaččaid identitehtaáddejumi. Diehtojuhkin rádio bokte lei dehálaš dán proseassas, daningo rádio bastii buot buoremusat hukset oktavuođaid ja doaibmat čearddalaš ságastallama kanálan. Sámerádio čuovui muđuige ángirit sámi politihka ja servodaga dáhpáhusaid, ja reporterii dain sápmelaččaide sámi jienain. (Lehtola 2001:

48.) Rantanen dutkamuša mielde sápmelaččat atne 1970-logu álgojagiid dehálamos diehtogáldun namalassii rádio. Dutkamuša vástideaddjiin badjel bealli, 52 proseantta, lei dan oaivilis. Easkka rádio maŋŋá bohte preassa ja televišuvdna. (Rantanen 1971: 31.)

1970-logu dáhpáhusat váikkuhedje njuolga sámerádio guldaledjiprofilii. Vehviläinen lagi 1974 dutkamuša mielde buot sámerádio prográmmaid guldaledje eanet dakkár sápmelaš vástideaddjit, geat identifiserejedje iežaset sápmelažžan (Vehviläinen 1974: 80). Vehviläinen huksii dutkanbohtosiiddis vuodul sámerádioi guokte guldaledjifunkšuvnna. Vuosttas lei dat, ahte skuvlekeahthes, eará diedihangaskaomiid unnán čuovvu, sápmelažžan iežaset atni sápmelaččat guldaledje sámegielat rádiosáddagiid dieđu dihte, daningo sii eai earret eará gielalaš váttisuodđaid dihte ožžon dárbbašlaš dieđuid suomagielat diedihangaskaomiin. Nuppe dáfus ollu skuvlejuvpon, sápmelažžan iežaset atni sápmelaččat čuvvo prográmmaid daid symbolalaš árvvu geażil. Dego sámerádio doaimmaheaddji Sulo Aikioge daid áiggiid árvalii: sámegielat diehtojuohkin sápmelaččaid geahččanguovllus sápmelaččaide lasiha sámeálbmoga oktiigullevašvuodđa dovddu. (Vehviläinen 1974: 81.) Sámerádio guldaleamis lei 1970-logus nana oktavuohta sápmelaš identitehtii.

2.1.3 Lasi geahppa prográmma ja musihkka 1980-logus

Maiddái 1980-lohku lei mearkkašahti áigodat Suoma sámerádioi. Jagi 1985 sámerádios šattai Yleisradio iehčanas guovlodoaimmahus. Dan rádjai sámerádio gulai hálddahuslaččat Roavvenjárgga guovlodoaimmahusa vuollái. Jagi 1987 sámerádio oaččui odđa doaibmadálu Anárii. (Länsman 1987: 1.)

Anni-Siiri Länsman čielggadii 1980-logu loahppabealde, man ollu Suoma sápmelaččat guldalit sámerádio, ja makkár oainnut ja sávaldagat sis leat ovdamearkka dihte sámerádio prográmmaid ektui. Länsman dutkančuožáhat ledje 9–75-jahkásaš sámeguovllus ássi sápmelaččat, geat ieža dahje gean vánhemii dahje áhkuin ja ádjáin unnimustá okta lei oahppan sámeigela vuosttas giellan. Länsman čokkii dutkanmateriála telefonjearahallamiiguin. Dutkamuššii oassálaste 224 olbmo. (Länsman 1987: 5.)

Suoma sámerádio sáddagat olahedje Länsman dutkanáigodagas gaskamearálaččat dušše sullii ovcci proseantta olles sámeálbmogis. Beaivválaččat sámerádio guldaledje sullii 300 olbmo. Dat orru lohkun unni, ja Länsman iešge eahpidii dutkanbohtosiiddis luohttehahttivuđa. (Länsman 1987: 13.) Viššalamos guldaleaddjít ledje Ohcejogas ja Eanodagas ássi 44–75-jahkásaš sápmelaččat, erenoamážit ealáhatahkásacčat. Vuollel 44-jahkásacčat guldaledje sámerádio čielgasit uhcit. Badjelaš njealjádas vástideaddjiin ii guldalan sámerádio ollenge. Guldalanmoktii váikkuhedje earret eará guldaleaddji sámegiela máhttu, sáddenáiggit ja dat, ahte prográmmat eai adnojuvvon geasuheaddjin. Sullii bealli suomagiela eatnigiellan almmuhan vástideaddjiin ii guldalan sámerádio ollenge. Dat čilge maiddái dan, manin Soađegilis ja Anáris ássi sápmelaččat guldaledje sámerádio uhcit go earát. Sámerádio ii orron olaheamen maiddái 15–24-jahkásaš sápmelaččaid, muhto Länsman fuomášahttá, ahte sámerádios ii lean nuoraide jur prográmma. (Länsman 1987: 12–13.)

Sápmelaččat guldaledje 1980-logu loahppabealde rádios mielas ođđasiid ja áigeguovdilis prográmmaid, ja daid lassin geahppa musihkka- ja hállan-musihkkaprográmmaid. Länsman dutkamuša vástideaddjít gáibidedjege sámerádioi eanet geahppalágan prográmmaid, ja erenoamážit nuorat sávve lasi musihka. (Länsman 1987: 14.) Badjelaš 40 proseantta vástideaddjiin anii sámerádio prográmmaid miellagiddevažžan ja badjelaš 40 proseantta unnit miellagiddevažžan. Buot duđavamos guldaleaddjít ledje davvisápmelaččat ja anáraččat, Ohcejogas ássit, buot eanemus ja unnimus skuvlejuvvon olbmot ja boarrásamos ahkeluohkát (44–75-jahkásacčat). Earret eará nuortalaččat, skuvlalaččat ja studeanttat fas ledje eanemus duhtameahttumat sámerádio fálaldagaide. (Länsman 1987: 15–17.) Länsman dutkamuš čájehii seammá go Rantanen dutkamuš 1970-logu álggus: sápmelaččat guldalivčče sámerádio millosamosit diibmu 18–20 (Länsman 1987: 18).

Vaikko sámerádio guldaleaddjilogut ledje Länsman dutkamušas oalle vuollegaččat, ledje sámegielat rádiosáddagat das fuolakeahttá sápmelaččaid mielas buorre ášši. Čielga eanetlohku vástideaddjiin, 83 proseantta, anii sámegielat sáddagiid dehálažžan. Dušše 14 proseantta oaivvildii, ahte dat ledje unnán dahje eai ollenge dehálaččat. (Länsman 1987: 18.)

2.1.4 Guldaleaddjat guldaledje ain 1990-logus

Suoma sámerádio oačui iežas kanála atnui loahppajagi 1991. Odđa Yle Sámi Rádio ulbmilin lei sáddet sámegielagiidda eatnigielat rádioprográmmaid ja doarjut guovllu iežaslágan kultuvrra. (Ruohomaa 1992: 9.) Go dan rádjai Suoma sámerádio lei sádden sámegielat rádioprográmmaid dušše muhtun diimmu vahkus, sáddii dat 1990-logu álgojagiid jo badjel 20 diimmu vahkus, sihke iđit- ja eahketbeivviid. Daid áiggiid válidosisdoallun ledje odđasat ja áigeguovdilis sáddagat, muhto maiddái musihkka (sáme- ja etnomusikhkka) čuojai eanet go ovdal. (Ruohomaa 1992: 11.)

Erja Ruohomaa dutkkai sápmelaččaid rádioguldaleami sihke jagi 1992 ja 1994. Jagi 1992 Ruohomaa ulbmilin lei čilget, mo olbmot guldalit Yle Sámi Rádio ja maiddái dutkat guovllus gullojeaddji eará rádiokanálaid guldaleami. Dutkančuozáhat ledje badjel 15-jahkásaš olbmot, geat áddejedje sámegiela. Dutkanguovlu lei viidát go árat dutkamušain: Suoma sámeguovllu lassin Ruohomaa dutkkai guldaleami maiddái Gárasavvonis Girona gielddas Ruotas ja Deanu ja Kárášjoga gielldain Norggas. Buot dánin gielldain lei vejolaš guldalit Yle Sámi Rádio. (Ruohomaa 1992: 11.) Dutkanvuohkin lei telefonjearahallan, man váras Ruohomaa válljii dutkanguovllu telefonlogahallamis deivvolaččat 400 dálloodoalu, main jearahallamii serve loahpaloahpas 264 olbmo (Ruohomaa 1992: 13).

Árgaiđidiid Yle Sámi Rádio sáddagiid guldalii gaskamearálaččat 39 proseantta dutkanguovllu olbmuin. Erenoamáš miellagiddevaš gávnus lei dat, ahte eanemus guldaleaddjat ledje Ruota Gárasavvonis ja Eanodagas, uhcimus fas Vuohčus, Kárášjogas ja Anáris. Eahketbeivviid Yle Sámi Rádio sáddagiid guldalii gaskamearálaččat 47 proseantta dutkanguovllu olbmuin. Dalle eanemus guldaleaddjat ledje Kárášjogas, Eanodagas ja Deanus, ja uhcimus Soađegilis ja Anáris. Ahkeluohkáid beales eanemus sihke iđit- ja veaigesáddagiid guldaledje 35–64-jahkásaččat. Unnimus iđitsáddagiid guldaledje 15–34-jahkásaččat ja veaigesáddagiid 15–34- ja badjel 65-jahkásaččat. (Ruohomaa 1992: 14–18.) Go dutkanbohtosiid rehkenastá oktii, sáhttá gávnahit, ahte Yle Sámi Rádio guldalii beaivválaččat gaskamearálaččat 58 proseantta dutkanguovllu

badjel 15-jahkásaš sámegiela áddejeaddji olbmuin. Sámerádio guldaledje beaivválaččat sullii 3500 olbmo. (Ruohomaa 1992: 9.)

Ruohomaa dutkkai maiddái rádiomusihka mearkkašumi sápmelaš guldaleaddjiide, daningo oaivvildii, ahte rádiomusihka lea dehálaš ovddidit olbmuid beroštumi mielde. Dat fas sáhtii Ruohomaa mielas leat stuorra hástalus etnalaš vehádatkanálíi, mii galggašii doarjut ja gáhttet vehádatkultuvrra. Bajdelaš bealli vástideaddjiin lei duđavaš sihke musihka mearrái ja dan sisdollui Yle Sámi Rádios. Árbevirolaš juigosiid oassái musihkkafálaldagas lei duđavaš lagabui bealli vástideaddjiin. Mađe boarrásot vástideaddji, dađe uhcit son liikui dasa, ahte luohti čuodjá rádios. (Ruohomaa 1992: 22.)

Ruohomaa dutkkai ášši maiddái jagi 1994. Maiddái dát dutkamuš dahkkui Suoma, Ruota ja Norgga Sámis telefonjearahallamiiguin. Dutkamušii oassálaste oktiibuot 266 badjel 15-jahkásaš sámegiela áddejeaddji sápmelačča. Dán dutkamušas Ruohomaa geahčai sámerádio olles kanálan, vaikko oassi prográmmain lei kanálaloatna Radio Suomis/Lapin Radios. Dutkamuš čájehii, ahte sámerádio guldalii beaivválaččat gaskamearálaččat 59 proseantta (jagi 1992: 58 proseantta) vástideaddjiin. Nuppiid sániiguin sámerádio guldaledje juohke beaivve sullii 3500 olbmo. Sullii vidátoassi sámegielat olbmuin guldalii dušše sámerádio ja sullii goalmádas ii guldalan dan ollenge. Jagi 1992 dutkamuša ektui stuorámus nuppástus lei dat, ahte olbmot guldaledje rádio eanet. Seammás goittotge daid olbmuid mearri, geat eai guldalan sámerádio goassige, lei lassánan. (Ruohomaa 1995: 3–4.)

Ruohomaa mielde sápmelaččat orro jagi 1994 eanet go ovdal válljemin, guldalitgo iđit-vai veaigesáddagiid: sámerádio juvssai iđidiid gaskamearálaččat 34 proseantta (1992: 39 %) ja eahketbeivviid 37 proseantta (1992: 47 %) álbumogis. Sámerádio guldaleaddjiid ahkeluohkáid juohkašuvvan lei dássásmuvvan jahkái 1992 veardidettiin: ovdamearkka dihte nuorat (15–34-jahkásaččat) guldaledje sámerádio muhtun veardde eanet ja maiddái eahketbeaprográmmaid guldaledje dássidabbot buot ahkejoavkkut. (Ruohomaa 1995: 11, 14, 18.) Eanemus Yle Sámi Rádio guldaleaddjiid ilosmahtte musihkkaprográmmat ja eardudedje juigosat, muhtun doaimmaheaddjit ja politihkas muitaleaddji prográmmat. Guldaleaddjit kommenterejedje maiddái sámegiela ja dan

geavaheami. Hállangiela čielggasvuhta dahje dan váilevašvuodat ja earálágan suopmanat ledje giksin muhtun guldaleaddjiide. Guldaleaddjít doivo lagi 1994 lasi vuoinjalaš, musihkka- ja mánáid- ja nuoraidprógrámmaid. (Ruohomaa 1995: 20.)

2.1.5 Oktiigeassu árat guldaleaddjidutkamušain

Árat dutkamušat čájehit, ahte goittotge 1990-logu beallemuttu rádjai Yle Sámi Rádio juvssai sápmelaččaid ja dat adnojuvvui dehálaš dieđihangaskaoapmin. 1950-logus sámegielat rádiosáddagiid guldaledje Suoma sámeguovllus badjelaš 1100 sápmelačča. 1970-logus sullii 1800 Suoma sámeguovllu sápmelačča guldaledje sámerádio álo dahje oalle dávjá, vádjít 1000 olbmo guldaledje sáddagiid duollet dálle ja 1000 olbmo oalle hárve dahje eai goassige. 1990-logus sámerádio guldaledje beaivválaččat sullii 3500 sámegielat olbmo Suomas, Ruotas ja Norggas. 1970- ja 1980-logus Yle Sámi Rádio sáddagiid ii guldalan goassige dahje dušše oalle hárve sullii 25 proseantta Suoma sámeguovllu sápmelaččain. Lohku bisui sullii seammán moaddelot lagi, go lagi 1994 dutkamuš čájehii, ahte 29 proseantta čuožáhatjoavkkus ii guldalan Yle Sámi Rádio.

Árat dutkanbohtosiin čalbmái čuohcá erenoamážit guldaleaddjiprofiila, mii bisui oalle seammán mángalot lagi. Suoma sámerádio sáddagiid leat árat dutkamušain guldalan buot eanemus sápmelažžan iežaset atni guldaleaddjít. Sámerádio viššalamos guldaleaddjít leamaš davvisáme- ja anárašgielat, Ohcejogas ja Eanodagas ássi, ja badjel 30–40-jahkásaš sápmelaččat. Buot fuonimusat sámerádio lea juksan nuortalaš- ja suomagielat, Soađegilis ja Anáris orru, ja 15–24-jahkásaš sápmelaččaid. Sámerádio guldaleaddjiid millosamos prógrámma leamaš árat dutkamušain rádioodđasat. Ođđasiid maŋjá sápmelaččat leat guldalan mielas erenoamážit vuoinjalaš prógrámmaid, vaikko daid publikka leamašge válđooasis boarrásot buolva.

Árat dutkamušain sullii bealli sámeálbmogis leamaš duđavaš Suoma sámerádio prógrámmafálaldagaide. Das fuolakeahttá, ahte sullii bealli álbmogis leamaš duhtameahttun sámerádioi, leat olbmot liikká atnán dan stuorra árvvus. Ovdamearkka dihte 1980-logus badjel 80 proseantta sápmelaččain anii sámegielat sáddagiid dehálažžan.

2.1.6 Yle Sámi rádio 2018

Yle Sápmi lea ain dán beaivve Suoma dehálamos sámemedia. Doaimmahus atná interneahta dan dehálamos ođaslávdin, rádio dehálamos giellaaláškahttinlávdin ja televišuvnna vásáhusaid ja ealláhusaid fállin. Sosiála mediasges Yle Sámis lea vejolašvuhta beaktilit gulahallat álbmogiin. Yle Sámi ulbmil lea bálvalit buot sápmelaččaid. (Yle Sápmi 2018a.)

Dán dilis Yle Sápmi sádde rádioprográmmaid juohke árgabeaivve. Sámegielat rádiobeavi álgá diibmu 7 doaimmahusa iežas Yle Sámi iđit -iđitsáddagiin. Diibmu 8–10 gullo čakčat 2016 álggahuvvon davviriikkalaš Buorre iđit Sápmi -sátta, mas leat Yle Sámi lassin mielde SR Sameradion ja NRK Sápmi. Yle Sámi iežas Dearvva! Tiõrv! Tiervâ! -eahketbeaisátta boahktá juohke árgabeaivve diibmu 14.30–16. Fásta beaivválaš prográmma lassin Yle Sápmi sádde maiddái earret eará arkiiva-, musihkka-, rohkos- ja mánáid- ja nuoraidprográmmaid, ja NRK Sámi ja SR Sameradion sisdoaluid. (Yle Sápmi 2018a.)

Dego lea jo árat ovdanbuktojuvvon, Yle Sápmi atná rádio dan dehálamos giellaaláškahttinbargoneavvun. Yle Sámi mielde rádios lea stuorra mearkkašupmi sámegiela ovddideamis ja sámi identitehta nannemis, ja interneahhta- ja tv-fálaldagat dievasmahttet rádiosáddagiid. Dasa lassin, ahte rádio lea doaimmahussii dehálaš diehtojuohkingaskaoapmi, doalvu dat maiddái kultuvrra ovddosguvlui. Yle Sámi rádiosáddagat addet saji sámi musihkkii, máidnasiidda, muitalusaide ja ságaide sápmelaččaid árgabeaivvis ja erenoamáš dáhpáhusain, golmma sámegillii. (Yle Sápmi 2018a.) Yle Sámi rádiosáddagat gullojut FM-dávjodagaid bokte Suomas Roavvenjárgga davábealde ja davvin Norgga ja Ruota rájáid alde. Rádio sáhttá FM-dávjodagaid lassin guldalit neahta bokte earret eará Yle Areenas. (Yle Sápmi 2018b.)

Jagi 1995 mannjá Yle Sámi rádioguldaleapmi ii leat dutkkojuvvon. Yle Sápmi čađahii gal ieš loahppagease 2017 gažadeami rádioguldaleaddjiid oainnuin prográmmaid áiggiid ja sisdoaluid birra, muhto dat ii čielggadan ovdamearkka dihte rádio mearkkašumi sápmelaččaide. Doaimmahus ráhkadii gažadanskovi, man olbmot besse

deavdit sihke digitálalaččat ja báberhámis ovta mónotbaji áigge. Gažadeapmái vástidedje 96 olbmo, geain 76 davvisámegillii, 17 anárašgillii ja golmmas nuortalašgillii. Buot buohkanassii sullii bealli vástideaddjiin lei duđavaš dan áigge rádioprográmmaide ja daid sisdollui. Guldaleaddjit sávve earret eará, ahte iđitsátta álgašii árat ja gaskabeaisátta sirdojuvvošii eahketbeaivái. Giellaválljejumit, dego váldogielaid geavaheapmi ja máŋggasámegielat sáddagat, juhke guldaleaddjiid oaiviliid. Sullii bealli vástideaddjiin gáibidii eanet rádioodđasiid ja namalassii ođđasiid Suoma beale Sámis. Giitosa ožžo erenoamážit arkiivaprográmmat. Maiddái musihkka- ja mánáidprográmmat ledje vástideaddjiid miela mielde. Guldaleaddjit dáhtto daid lassin eanet maiddái nu geahppaprográmmaid ja dábálaš olbmuid jearahallamiid, go áššeságaid ja servodatfáttáidge. (Yle Sápmi 2017.) Guovvamáanus 2018 Yle Sápmi áraidahtii iđitsáddaga ja sirddii gaskabeaisáddaga eahketbeaivái guldaleaddjiid sávaldagaid mielde.

2.2 Eatnigielat media ja rádio mearkkašupmi vehádahkii

Dutkamušaid mielde álgoálbmogat miehtá máilmimi vuodđudit iežaset mediaid ulbmilin gáhttet ja máhcahit gielaset, buoridit álbtogaset iešgova ja rievdadit sidjiide čuohcci negatiiva doalandumiid, maid váldokultuvrrat ealihit (Browne 1996: 59). Gieđahalan dán logus buot dáid beliid sápmelaččaid ja sámerádio geahččanguovllus.

Rádios lea guovddáš rolla olles máilmimi álgoálbmogiid mediamáilmis. Aviissat ja bláđit dáistalit ekonomalaš váigatvuodaiguin miehtá máilmimi ja álgoálbmogiid buvttadan tv-prográmmat leat dávjá vánis. Interneahhta bealistis rahpá ollu ođđa uvssaid diehtojuohkimii ja oktavuođaid doallamii, muhto datge ii vástit árbevirolaš diehtojuohkingaskaomiid dárbui. (Dufva & Pietikäinen 2005: 18.)

2.2.1 Hukse identitehta ja ovttastahttá álbtogat

Yle Sámi Rádios leamaš dehálaš rolla sámeservoša huksemis ja nanosmahttimis – ja oppalohkái identitehtapolitikhkas. Sámerádio váikkuhii sakka dasa, ahte sápmelaččat

šadde eambbo diđolažžan iežaset gullamis stuorát ollisvuhtii, sámi álbmogii. Sámerádio lea lebben dieđu das, ahte sápmelačcat sihke davviriikkain ja Ruošša bealde gullet seamma álbmogii, mii lea earálagan go birastahti servodagat. Ná dat lea nanosmahttán sápmelaččaid oktiigullevašvuoda ja leamaš mielde huksemin symbolalaš ja transnášuvnnalaš Sámi, mii rasttilda gielaid, giliid ja váldegottiid rájáid. (Sara 2007: 56.)

Sámeradio lea lebben dieđu maiddái máilmomi eará álgoálbmogiin ja ná nanosmahttán sápmelaččaid álgoálbmotidentitehta ja oktiigullevašvuoda sidjiide. Álgoálbmogat álge bargat ovttas erenoamážit 1970-logus ja Yle Sámi Rádio giedħahalai dalle oktasaš deaivvademiid prográmmainis. Sámerádio sáddagiin sihke doaimmaheaddjít ja jearahallojuvvon olbmot deattuhedje álgoálbmogiid seammaláganvuoda. Sámerádios hállojuvvui daid áiggijid máilmomi álgoálbmotservošiin mii-hámis ja bearashnamahusaiguin dego *bearaš, oappát ja vieljat*. Earáin go álgoálbmogiin fas sámerádio hálai dávjá *earán*, ovdamearkka dihte *láttánin* dahje *vilges olmmožin*. Sámerádio giedħahalai álgoálbmogiid olmmošlačcat ja dásseveardásačcat. Dat ii lokten ovdan myhtaid ja eksohtalaš oainnuid dego váldomediat dahke, muhto baicce hálai álgoálbmogiid ovddasteaddjiin álo namain ja attii sidjiide vejolašvuoda geavahit jearahallamiin maiddái iežaset eatnigiela. (Reiniharju 2015: 40, 53, 65–68.)

Sámemedias sáhttáge leat guovddáš rolla sihke ovttaskas sápmelačča ja olles sámeálbmoga fámuiduvvanproseassas. Media sáhttá leat okta daid arenain, gos olbmot sáhttet juohkit vásáhusaideaset, álggahit ságastallama, ja ovdanbuktit ja testet jurdagiiddiset. Doaimmaheaddjít sáhttet ovdanbuktit ođđa oainnuid dahje čovdosiid ja bovdet olbmuid vihkkehallat áššiid. Iežas media sáhttá veahkehít earálagan, dávjá unnitlogu oainnuid ja jienaid beassama oidnosii ja gullosii almmolašvuodas. Iežasgielat rádio sáhttá nappo leat servošii nu dieđu, doaimma go vásáhusaidge báiki. Jo dat, ahte media lea oppalohkái leahkimin, fámuidahttá: dat lea mearka servoša leahkimis. (Pietikäinen 2006: 215–216, 232.) Iežas media symbolisere dan, ahte jearaldat lea modearna álbmogis, mii nákce aktiivvalačcat oassálastit dán beaivvi eallimii (Cormack 2007: 54). Iežas media čájeha álbmogii maiddái, ahte dan unna, áitatvuloš giella ii leat

dušše miellagiddevaš historjaárbi ja dutkančuozáhat, muhto baicce ealli árgagiella (Skön & Torkkola 1997: 11).

Sámeigella doaibmá jokvui gullama guovddáš kritearan buot davviriikkain. Vaikko mearkkašahti oassi Suoma sápmelaččain lea manahan árbevirolaš gielas, doaibmá giella ain sápmelaččaid ovttastahti, guovddáš identitehtadahkkin. Giela ja identitehta oktavuoda leat maŋimuš jahkelogiid áigge deattuhan nu sakka, ahte muhtumat vásihit gielahirvuoda njuolga stigman. (Aikio-Puoskari 2002: 91, 101, 104–105) Yle Sámi rádiosáddagiin besset gullosii iešguđet sámegielat ja suopmanat miehtá viiddis Sámeeatnama, mii ovttastahttá sápmelaččaid ja nanne guldaleaddjiid oktiigullevašvođadovddu (Pietikäinen 2008a: 29). Dat, ahte rádios gullojut iešguđet guovlluid sámegielat ja suopmanat, lea váikkuhan sápmelaččaid ovdagáttuide ja jurdagiidu nuppiideaset guovdu. Sámerádio lea lebben dieđu ja dovdamuša girjás Sámeeatnama giellaáššiin, ja dan ánssus sápmelaččat leat oahppan gullat, áddet ja dohkkehit giella- ja suopmanerohusaid. (Sara 2007: 55.)

Jo dat, ahte rádiosáddaga guldaleaddji sahttá govhallat eará olbmuid guldaleamen seamma sáddaga seamma áigge, sahttá nannet olbmo identifikašuvnna daid olbmuide (Matsaganis ja earát 2011: 78). Etnalaš media sahttá atnit ovttalágan álbmoga organiserejeaddjin. Ovdamearkka dihte iežasgielat rádiosáddaga gurri čoahkkaneapmi hukse dovddu *mis*, iežas joavkkus, mii lea earálágan go earát. (Skön & Torkkola 1997: 153.)

2.2.2 Doaibmá giellabargin

Iežas giella čatná olbmuid earálágan duogážiin oktan giellasearvvušin (Pietikäinen 2006: 229). Iežas giela ovdanbuktin media bokte lea erenoamáš dehálaš Sámeeatnamis, gos giellasearvvuš lea geográfalaččat biedgguid guhkes gaskkaid dihte. Sámemedia juksá álbmoga sihke árbevirolaš sámeguovllus rastá riikkarajáid ja maiddái sámeguovllu olggobealde, vejolaččat hui guhkkinge ássi olbmuid (Dufva & Pietikäinen 2005: 18).

Giela gáhtten ja ealáskahttin leage etnalaš media okta guovddáš bargguin (Skön & Torkkola 1997: 153). Iežas media lea giellavehádahkii dehálaš kultuvrralaš resursa, mii doalaha giela eallin, sirdá dan buolvvas nubbái ja čatná árbevirolaš giellageavaheami modearna geavahanvugiide (Dufva & Pietikäinen 2005: 18). Daningo máilmmiss lea unnán sámegielat preassa ja sámegielat tv-prográmmatge leat vánis, lea rádios stuorra mearkkašupmi Sámi mediagiettis. Sámegielat neahhtačállosat gal gávdnojit, muhto erenoamážit boarrásamos buolvva sámegiela čálalaš máhttu sáhttá ain leat heittot. Dákkár dilis rádio lea olbmui márssolaš, jos ii jo áidna iežasgielat dieđihangaskaoapmi (Länsman 1987: 4). Eatnigielat olbmuid lassin sámeservošis leat historjjálaš sivaid geažil buolvvat, mat eai leat oahppan sámegiela eatnigiellan. Sin bálvaleapmi ja giellaaláskahttin sin gaskkas lea okta dehálaš sámegielat media bargu. Sámemedias lea dehálaš rolla maiddái mánáid ja nuoraid giellamáhtu seailluheaddjin ja ovddideaddjin. Vehádatgielat mánái lea dehálaš beassat gullat iežas giela dakkár oktavuođain, mat leat normálat váldoservodagas. Ná mánna ádde, ahte ii leat okto gielainis ja fidne doarjaga maiddái kultuvrralaš identitehtasas. (Sara 2007: 67–68.)

Vuoi giella, ja dan mielde maiddái etnalaš identitehta, sáhttá eallit, galgá dan geavahit máŋggabealagit iešguđetlágan oktavuođain. Vuoi giella sáhttá eallit, galget das leat hállit, čállit, guldaleaddjit ja lohkkit. Yle Sámi doaimmaheaddjit jáhkket, ahte media sáhttá badjindoallat sámegielat identitehta lassin sámegiela. Doaimmaheaddjit atnet dehálažjan, ahte media muitala sápmelašvuodas ja Sámeeatnama áššiin namalassii sámegillii. Media ii goittotge dušše badjindoala, muhto maiddái ovddida ja ođasmahttá giela fáladettiin servošii modearna, servodatlaš olggosbuktinkanála, mii viiddida giela geavahanbirrasa ruovttuid ja skuvllaid olggobeallái. (Dufva & Pietikäinen 2005: 22–24.) Yle Sámi Rádio lea sámegielat prográmmafálaldagainis lokten erenoamážit davvisámegiela geavaheami áibba ođđa dássái, go sápmelaččat leat rádio bokte oahppan gullat giela maiddái virggálaš ja almmolaš oktavuođain. Sámerádio ánssus sápmelaččat dohkkehišgohte vuot gielaset stáhtaid assimileren- ja diskriminerenpolitihka manjnjá. (Sara 2007: 63.)

Oppalohkái media sáhttá doaimmaideasetguin oahpahit, ođasmahttít, dievasmahttít ja máŋggabealagabbon dahkat giellageavaheami (Dufva & Pietikäinen 2005: 29).

Ovdamearkka dihte mánáid sámegielat rádiojearahallamat čájehit olbmuide, ahte giella dohkke ja vatná odda geavahanvugiide, odda buolvva njálmmis (Pietikäinen 2006: 227). Giela gáhttema ja ealáskahttima lassin okta dehálažjan adnojuvvon etnalaš media bargu lea álbmotkultuvrra ja árbevieruid vurken – giela bokte datge (Skön & Torkkola 1997: 153). Dat, ahte rádios lea stuorra mearkkašupmi giellabarggus máŋggaláhkai, sisstisdoallá goittotge maid olu ovddasvástádusa. Jos doaimmaheaddjit ovdamearkka dihte hállet boastut, darvána dat guldaleaddjiide áibba seammaláhkai go ođđage sátni (Sara 2007: 60).

Sámerádio galgá nappo bálvalit gielalačcat hui girjás sámeálbmoga – ja máŋggaláhkai. Nuppe dáfus dat doaibmá giellavuorkán boares prográmmaid sáddema, rikkes sátneráju geavaheami ja iešguđetlágan suopmaniid ovdanbuktima bokte. Seamma áigge rádio goit doaibmá ovttalágan giellabargobádjin, mii hutká ja váldá atnui ođđa sániid ja geavaha giela ođđa oktavuodain. (Pietikäinen 2008b: 212.) Buoremus dilis rádio sáhttá nuppiid sániiguin doaibmat sámeservošii sihke árbevirolaš giela doarjjamuorran ja ođđaáigge sániid bálggesčuovgan.

Buohkat eai goittotge leat ovta oaivilis iežasgielat media mearkkašumis vehádatgielaid ealáskahttinbarggus. Baker (2001) mielde iežasgielat mediat váikkuhit buoremusge dilis dušše olbmo passiiva giellamáhttui. Ovdamearkka dihte Walesis dahkon dutkamuš lea gávnahan, ahte váldogielat media duššada vehádatgiela eanet go maid vehádatgielat media sáhttá dan seailluhit. (Baker 2001: 71.) Rádio mearkkašumi oaidnin dušše giellagáhttema dáfus sáhttá dagahit maiddái váttisuodaid. Cormack (2007) mielas lea dehálaš áddet, ahte giela badjindoallan ii leat media dábálamos bargu, iiige oktage media leat huksejuvvon dan vuodu ala. Media viggamuš doaibmat giellagáhttejeaddjin lea Cormack mielas seamma, go vikkašii ákšuin goaivut rokki: dat sáhttá lihkostuvvat, muhto ii leat eisige nu oaivvilduvvon. Cormack fuomášahttá, ahte dákkár viggamuš lea ruossalassii media oahppásot ulbmiliin, mii lea guoimmuhit olbmuid. Vehádatgielat media sisdoalut sáhttet gártat leat oalle earáláganat go árbevirolaš sisdoalut, jos dat leat plánejuvvon rievadait dahje badjindoallat olbmuid giellamáhtu. Jos vehádatgielat media fas ii leat sisdoaluidis beales doarvái geasuheaddji, eai das leat earáge váikkuhusat olbmuide. (Cormack 2007: 60–62.)

2.2.3 Lea vehágaga iežas diehtojuohkki ja váldomedia vuostemedia

Media govat *mis* ja *earáin* huksejít váikkuheaddji ja aŋkke mannu muddui kollektiiva áddejumi olbmo identitehta iešvuodain ja sajádagas servodagas. Buoremus dilis almmolaš govva identitehtas hukse oktiigullevašvuoda dovddu ja nanosmahttá servoša. Heajumus dilis dat goit sáhttá leat ovttabealat, loavkašuhti dahje marginalisereaddij: joavkku lahtut eai dovddas iežaset govvádusain dahje gillájít beaivválaš eallimisteaset daid dihte riegádan ovdagáttuin. (Pietikäinen 2002: 241.)

Medias lea nappo fápmu, muhto dan niibbis leat guokte deari. Nuppe dáfus media sáhttá čuvgehit olbmuid ja juohkit ásshalaš dieđu vehágagain, ja ná njeaidit rádjéáiddiid kultuvrraid gaskkas. Nuppe dáfus, jos media ovdanbuktimat eai čuovo duoh tavuođa, sáhttet dain leat guhkesáigge vahátlaš váikkuhusat. (Alia & Bull 2005: 71; Korttinen 2012: 106.)

Lea čielggas, ahte diehtojuohkingaskaomam eai oaččo lebbet rasistalaš oainnuid, muhto dasa lassin lea dehálaš, ahte dat eai maiddái hukse ja nanne stereotiippaid. Váldoservodaga diehtojuohkingaskaomiin ja erenoamážit journalistalaš sisdoaluid bajilčállosiid sátneválljejumiin, govain ja govrateavsttain lea guovddáš rolla ovdagáttuid nannenproseassas. (Korttinen 2012: 104.) Rasistalaš ja stereotiippalaš čállosiid jávkan váldomedias livčii niehkodilli, muhto ii realistalaš. Álgoálbmogat ja eará vehágagat buktojuvvoyit medias dávjá ovdan guovtte ruossalas temáin: nuppe dáfus dat romantiserejuvvoyit ja govviduvvovit vilda ja geasuheaddji álbmogin, nuppe dáfus dat demoniserejuvvoyit urbána kriminálan (Alia & Bull 2005: 3). Váldomedia giedħahallá etnalaš vehágagaid áššiid dávjá ovttabealagit ja vel nu, ahte jearaldat lea váttisvuodain. Dákkár ovdanbuktimat sáhttet riegádahttit negatiiva mediagovaid ja nannet vahátlaš stereotiippaid. (Pietikäinen 2006: 220–221.) Dákkár ovdanbuktimat maiddái loavkašuhttet ja bávčagahttet vehágagaid (Alia & Bull 2005: 49).

Menddo dávjá váldomedia goittotge jaskkoda vehágagaid áššiin. Das livčii gal fápmu heaitthiit jaskatvuoda ja addit unnitloguide jiena, muhto nu dáhpáhuvvá oalle hárve. (Alia & Bull 2005: 91.) Etnalaš vehágagaid oaidnemeahttunvuhtii váldomedias leat

árvalan máŋgaid sivaid: etnalaš joavkkut eai adnojuvvo guovddáš váikkuheaddjin dahje golaheaddjin, eaige dat ovddas mearkkašahti oasi media publikas. Áššái sáhttet váikkuhit maiddái giellamuvrrat, vehádagaid váilevaš pr-bálvalusat ja sin iežaset vuosteháhku leat almmolašvuodas oidnosis ovdamearkka dihte dorvvolašvuoda baluid dahje árat negatiiva vásáhusaid dihte. Sáttá maiddái leat, ahte media ii dušše oktageardánit leat beroštuvvan etnalaš vehádagain. Váilevaš mediaalmmolašvuodas leat máŋgalágan váikkuhusat. Dan dihte vehádaga lahttu sáttá dovdat iežas olgobeallásazžan dan servošis, maid media govvida. Dat sáttá maiddái vahágahttit joavkku guoskevaš mearrádusaid dakhama, daningo mediaalmmolašvuohta lea dávjá bivnnut aiddo fal dan váikkuhuspotentiála dihte. (Pietikäinen 2002: 242–243.)

Journalisttalaš geavadagaid mielde jearahallamiid čuozáhagaid galgá (erenoamážit ođđasiin) válljet dássebealádit nu, ahte buot oassebealit besset jitnii. Danin etnalaš vehádagaid guoski ođasáššiin sáhtášii vuordit, ahte váldoálbmoga ja vehádagaid lahtut jearahallojuvvoj ja sin sánit luikojuvvoj dássebealádit. Dat ii goittotge oro leamen duoh tavuohta. Doaimmaheaddjit jearahallet dutkamušaid mielde etnalaš vehádagaid guoski áššiin dávjá vuosttamúžžan eiseválldiid. (Pietikäinen 2002: 246.) Pietikäinen čujuha iežas nákkosgirjedutkamuššii (Pietikäinen 2000), mii čájehii, ahte Helsingin Sanomat -aviissa sápmelaččaid giedahalli ođđasiin váldoálbmoga ovddasteaddjiid sánit luikojuvvojedje guovtte geardde eanet go sápmelaččaid. Dákkár meannudanvuohki hukse eiseválldiin gova etnalaš áššiid áššedovdin, oassebeallin ja journalismma luohttehahti gáldun, go vehádagatges oidnojuvvoj olgobeallásazžan áššiin, mat guoskkahit sin. (Pietikäinen 2002: 246.)

Sápmelaččaid kolonialisttalaš ovdanbuktin, man duogáš lea earret eará 1800- ja 1900-loguid historjjálaš ja antropologalaš dutkamušain, govvida sápmelaččaid skuvlekeahes ja mystihkalaš álbmogin, mánnaškeahettá dan historjjá, kultuvrra, politihka dahje olahusaid. Vaikko dákkár ovdanbuktimat biddjojuvvojite dávjá gažaldatvuložin, ellet dat liikká ain davvirikkaid váldomediain, reklámain ja turismmas. Sámi journalisttak govvidit váldomedia ovdanbuktimiid sápmelaččain ja sámeáššiin váilevažžan, ovttabealagin ja dávjá negatiivan – ja dákkár almmolaš media ovdanbuktimat lasihit vuostemedia dárbbašlašvuoda. Sápmelaččaid stereotiippalaš ovdanbuktimat ovttas hui

ráddjejuvvon oidnomiin ja gullomiin, váikkuhit njuolga váldoálbmoga dieđuide sápmelaččain – dat maiddái leat váilevaččat, eahpedárkilat ja boastut. (Pietikäinen 2008b: 204–205.)

Etnalaš vehádat cegge iežas media dávjá aiddo fal servoša dárbbus fidnet iežas jiena gullosii. Go vehádat váibá dasa, ahte dat buktojuvvo ovdan dušše negatiiva čuovggas dahje dolká dasa, ahte váldomedia ii guldal dan fuolaid, sáhttá iežas media buvttadišgoahtin leat buorre čoavddus. (Matsaganis ja earát 2011: 76.) Lea dehálaš, ahte vehádagas lea iežas media amaset dan ášshit buktojuvvot ovdan dušše váldoálbmoga geahččanguouvllus. Iežas vuostemedia bokte vehádat sáhttá loktet ovdan ášsiid, mat dasa leat dehálaččat ja fállat positiiva mediagovaid álmogis, dan iežas eavttuiguin. (Pietikäinen 2006: 220–221.) Joavkkuidet, mat leat marginaliserejuvvon dahje main leat huksejuvvon stereotiippat váldomedias, etnalaš media sáhttá fállat vejolašvuoda mualit ášsiin vehádaga iežas vugiiguin ja sániiguin (Matsaganis ja earát 2011: 77). Unna etnalaš álmogiin media lea dávjá vuorrováikkahuhusas iežas čuozáhatjoavkkuin dan sadjái, ahte dušše ieš hálashii dasa. Lagaš oktavuohta servošiin váikkuha earret eará dasa, ahte media lokte bajás temáid, mat leat dehálaččat álmogita lahtuide. (Pietikäinen 2008b: 209.) Medias lea ollu positiiva potentíala: dat fállá vejolašvuoda buktit ovdan odđa fáttáid, oainnuid ja hálliid, čilget hálddašeaddji vieruid, daid sivaid ja čuovvumušaid, hástalit hálddašeaddji áddejumiid ja lasihit olbmuid dieđuid ášsiin (Pietikäinen 2002: 253). Etnalaš mediat sáhttet maiddái doaibmat vehádaga politikhalaš kanálan. Iežasgielat media lea ovdamearkka dihte Kanada álgoálbmotservošis dahkan vejolažžan vehádaga oassálastima kultuvrii ja politikkii. (Skön & Torkkola 1997: 11.)

Lea gávnahuvvon, ahte mađe eanet ja viidábut álgoálbmotsearvvuš oidno medias, dađe buoret ja eanet vejolašvuodat álmogis leat šaddat dovddastuvvon álmogin, masa gullet erenoamáš vuogatvuodat. Media buvttademiid kontrollerenges fállá álmogii vejolašvuodaid juksat dan dovddastusa eanet iežas eavttuiguin. (Pietikäinen 2008b: 203.)

Sara (2007) dutkamuša mielde Yle Sámi doaimmaheaddjit atnet rádio sápmelaččaid dáfus áidna gaskaoapmin, mii joba jo juoganu láhkai nákce ovdanbuktit sámeášsiid ja

sápmelaččaid oainnu positiiva vuoiŋŋas (Sara 2007: 74). Maiddái Pietikäinen (2008b) gávnnaha, ahte sápmelašvuoda ovdanbuktin molssaevttolaččat, radikálalaččat ja vuosteoainnus lea dárbbashaš. Sámemedia láhčá riikkaidgaskasaš sámeálbmogii vejolašvuoda fidnet jienas almmolaččat gullošii, sihke iežas ja olggobeal olbmuid gaskkas. (Pietikäinen 2008b: 199.)

2.3 Rádio lea bivnnut Suomas

Varas dutkamuš čájeha, ahte rádio lea ain otná beaivve hui bivnnut suopmelaččaid gaskkas. Finnpanel-dutkanfitnodaga Kansallinen Radiotutkimus -dutkamuš jagis 2018 čájeha, ahte rádio guldala beaivválaččat 71 proseantta ja vahkkosaččat 92 proseantta suopmelaččain. Suoma álbmot guldala rádio gaskamearálaččat lagabui golbma diimmu beaivvis. Buot eanemus olbmot leat rádiosáddagiid guoras árgaiđidiid diibmu 8, goas rádio juksá 1,2 miljovnna suopmelačča. (Finnpanel Oy / KRT 2019a.)

Suomas rádios leat guldaleaddjít miehtá beaivvi, muhto buot eanemusat beaivet. Vuollel 45-jahkásaččain sullii 40 proseantta guldala rádio biillas, 30 proseantta barggus, 20 proseantta ruovttus ja vihtta proseantta eará sajiin. Badjel 45-jahkásaččain sullii 60 proseantta guldala rádio ruovttus, 20 proseantta biillas, 10 proseantta barggus ja vihtta proseantta eará sajiin. Suopmelaččat guldalit rádiosidoaluid ain buot eanemus rádiorusttegiid bokte, vuollel 45-jahkásaččain lagabui 80 proseantta ja badjel 45-jahkásaččain lagabui 90 proseantta guldala rádio rádiorusttegiiguin. Nubbin eanemus rádio guldaluvo mátketelefovnnaid bokte. Juohke goalmmát vuollel 45-jahkásaš ja juohke logát badjel 45-jahkásaš guldala rádio telefovnnain. Dihtoriin rádio guldala lagabui 20 proseantta vuollel 45-jahkásaččain ja vágjít logi proseantta badjel 45-jahkásaččain. Tablehtaiguin rádio guldala sullii vihtta proseantta olbmuin. (Finnpanel Oy / KRT 2019a.)

Rádio lea Suomas ain buot bivnnuhamos audiimedia buot ahkejoavkkuid gaskkas. Rádio manjá easka bohtet iešguđetlágan musihkkabálvalusat ja eará jietnafiillat. Rádiobálvalusain buot bivnnuhamos lea Yle Areena, mii olaha badjel 500 000

guldaleaddji juohke vahkus. Suoma buot eanemus guldaluvvon rádiokanála lea Yle Radio Suomi, man oassi buot rádioguldaleamis lea badjel goalmádas. Yleisradio lea muđuige njunnošis rádioguldalanloguin: Suoma rádioguldaleamis bealli juohkašuvvá Yleisradioi ja nubbi bealli gávppalaš kanálaide. (Finnpanel Oy / KRT 2019a.)

Maiddái Yleisradio jahkeraporta 2017 čájeha, ahte rádio lea seailluhan sajis Suoma álbmoga eallimis vel manjimuš jagiidge. Yle iežas rádioprográmmat jukse lagi 2017 beaivválaččat 38 proseantta badjel 9-jahkásaš suopmelaččain. Yleisradio unnimus rádioguldaleaddjijoavku ledje lagi 2017 mánát ja nuorat, ja čielgasit stuorámus ealáhatahkásaččat. (Yleisradio 2018.)

Máŋggat dutkamušat čájehit, ahte rádio sajádat suopmelaš servodagas lea ain nanus. Rádio orruge deaivamin mediamáilmci nuppástuvvama njoazibut ja dipmásabbot go eará mediat. (Liikenne- ja viestintäministeriö 2014: 47.) Stuorra hástalus leat goittotge nuorat buolvvat dego Yleisradio jahkeraporttage dieđut bajábealde buktet ovdan. Mánát ja nuorat guldalit rádio čielgasit uhcit go earát. Sii guldalit rádio sajis millosabbot eará jienaid neahtas. (Liikenne- ja viestintäministeriö 2014: 36.) Seammá čájeha Finnpanela varas rádiodutkamuš jagis 2018. Rádio guldalit buot unnimusat 9–14-jahkásaččat, 15–24-jahkásaččat, skuvlalaččat, studeanttat ja vuollel 25-jahkásaš almmáiolbmot. Dáid joavkkuin sullii bealli guldala rádio beaivválaččat ja sullii 80 proseantta vahkkosaččat. Buot eanemus rádio guldalit Suomas 55–64-jahkásaččat. (Finnpanel Oy / KRT 2019b.)

2.4 Rádio guldalandábit

Rádio lea dán áigge juohkedilásaš, olbmo mielde gosa fal johtti media. Olbmuid rádioguldaleapmái váikkuhit lunddolaččat áigi ja báiki, mat dahket guldaleami vejolažžan. Das fuolakeahttá, ahte rádioguldaleapmi dáhpáhuvvá mannu áiggis ja báikkis, ii dat leat šat čadnojuvvon daidda. Rádio guldaleapmi ruovttus gáibida, ahte olmmoš lea ruovttus ja biilarádio guldaleapmi eaktuda, ahte olmmoš čohkká biillas, muhto guldaleapmái váikkuhit olu earáge áššit. (Ruohomaa 2003: 229.)

Jeavddalaš rádioguldaleapmi gáibida maiddái jeavddalaš beaivválaš eallima, rutiinnaid ja rituálaid. Rádioguldaleami hápmi lea oktavuođas earret eará guldalanbáikái, mii hábme guldalandilálašvuoda. Rádio guldaleapmái vuodjuma dássi fas lea oktavuođas eará beaivválaš doaimmaid gáibidan vuodjuma dássái. Jos miinu eará doaimmaid eaktuda olbmo vuodjut dasa ollásit, báhcá rádio fuopmášumi haga. Jos miinu eará doaimmaid gáibida makkárnu konsentrerema, lea rádioguldaleapmi sekundáralaš. Jos eará doaimmat leat mekánalaččat ja eaktudit dušše vehá konsentrerema, lea rádioguldaleapmi báldalas. Rádio guldaleapmi lea primára aktivitehta dušše dalle, go eará aktivitehtat eai gábit konsentrerema ollenge ja/dahje dalle, go seamma áigge eai dáhpáhuva eará aktivitehtat. Rádio guldaleapmi beaivválaš eallimis molsašuddá molsašuddi diliid mielde. (Ruohomaa 2003: 229.)

Go Ruohomaa oaidná, ahte guldalandábit leat čatnosis olbmo persovdnii ja eallindiliide, oaivvilda Åberg (1999), ahte olbmo guldalandábiide váikkuha rádio rolla ja mearkkašupmi su eallimis. Maiddái Åberg juohká rádioguldaleami golmma luohkkái: 1) primára aktivitehtan, goas guldaleaddji vuodju guldalit rádio, rádioprográmma lea dávjá ovddalgihtii válljejuvvon ja dan guldaleapmi lea mearkkašahtti, 2) báldalas aktivitehtan, goas guldaleddji vuodju vurrolágaid rádioguldaleapmái ja eará aktivitehtii, ja goas rádioprográmma sisdoalus ii leat nu stuorra mearkkašupmi ja 3) sekundára aktivitehtan, goas guldaleaddji ii vealttakeahttá leat oppa diđolaš das, maid guldala. (Åberg 1999: 77.)

Dán beaivvi juohkedilásaš johti rádio váldi oidno erenoamážit báldalas ja sekundára guldaleamis. Johti rádios leat návccat gilvalit eandalit mediaiguin, maid olbmot čuvvot dávjá ruovttuin, erenoamážit beaivet. Johti rádio lea mánnggaláhkai šaddan oassin olbmuid iešguđetlágan beaivválaš situašuvnnain. Das fuolakeahttá, ahte guldaleaddjit johtet báikkis nubbái, eai sii dutkamušaid mielde molsso kanálaid dan eanet. Johti guldaleapmi orru ovdalge bisseheamen rádioguldaleami. (Ruohomaa 2003: 231.)

Erja Ruohomaa (2003) juohká dutkamušas vuodul rádioguldaleaddjiid golmma kategorijai: berošteaddji, válljejeaddji ja berošmeahttun guldaleaddjiide. Rádioberošteaddjit, geain lea lagaš oktavuohta rádioi, gokče su dutkamušas masá beali

dutkanjoavkkus. Rádioberošteaddjit guldalit rádio beaivvi áigge jeavddalaččat ja máŋgalágan, molsašuddi diliin. Válljejeaddjites leat dábaččat almmáiolbmot, geat guldalit rádio jeavddalaččat biillasteaset, gos musihkas lea guovddáš rolla. Válljejeaddjiin leat dušše muhtun guldalandilit beaivvis dahje vahkus, ja guldalandábit molsašuddet unnán. Berošmeahttun guldaleaddjiin dan sadjái ii leat jur makkárge gaskavuohta rádioin. Dat guldaleaddjit illá goassige spoahkkalit rádio ala, daningo dovdet, ahte rádio ii buvtte makkárge lasseárvvu sin beaivválaš eallimii. Berošmeahttun guldaleaddjit muitaledje Ruohomaa dutkamušas, ahte sii leat gal láven guldalit rádio eanet, muhto máŋgalágan sivaid geažil rádios ii leat aiddo dál sadji sin eallimis. (Ruohomaa 2003: 230.)

3 Dutkamuša ollašuhttin

3.1 Deaddu kvantitatiiva dutkamušas

Kvantitatiiva dutkamušain dutki áicá máilmimi fenomenaid, áššediliid ja dáhpáhusaid. Kvalitatiiva dutkamušainges dutki áicá ja ádde áššiid oktavuođaid. (Latomaa 2005: 21–23.) Kvantitatiiva metodaiguin dutki fidne luohttehahti, muhto geahppa dieđu. Kvalitatiiva metodaiguinges dutki oažju čiekŋalis dieđu, man fas ii leat seamma álki generaliseret vástidit stuorát joavkku oainnuid. Buoremus bohtosa dutki oažju geavahemiin guktuid metodaid buoremus beliid. (Alasuutari 1994: 203.)

Barggustan lea deaddu kvantitatiiva dutkamušas, muhto das leat maiddái kvalitatiiva iešvuodat. Lean dutkan sápmelaččaid rádioguldaleami iešvuodaid vuostenange kvantitatiivvalaččat. Fáttás ii leat dahkon vástideaddji dutkamuš badjelaš 20 jahkái, man dihte kvantitatiiva vuodđodutkamuš leamaš dárbbashaš. Konkrehta loguid lea álki veardidit árat dutkamušaid loguide ja daid vuodul lea vejolaš analyseret sápmelaččaid rádioguldaleamis dáhpáhuvvan nuppástusaid. Materíala kvantifieremiin, nuppiid sániiguin árvvuid rehkenastimiin ja luohkáide juohkimiin, lea maiddái álki álggahit viiddis materíalain. Lean buktán kvantitatiiva bohtosiid ovdan earret eará govvoiiguin. Vaikko kvantitatiiva analysa mitalage vuodđoaššiid sápmelaččaid rádioguldaleamis, guođđá dat okto olu gažaldatmearkkaid rádioguldaleami sivain ja mearkkašumiin. Dan dihte leange dulkon maiddái rádioguldaleami kvalitatiiva beliid, mat buktet dutkamuššii čiekŋalot áddejumi sámegielat rádio mearkkašumis sápmelaččaide. Lean analyseren kvalitatiiva bohtosiid induktiivvalaččat, nappo geahčadan dutkanmateríala dárkket mángga guovllus, teorehtalaš duogážii speadjalastimiin. (Hirsjärvi ja earát 2009: 140, 164.)

Kvantitatiiva dutkamušas okta guovddáš áššiin lea válljet mannu čuozáhatjoavkkus deaivilis čoggosa vuoi dutkamuša bohtosiid sáhttá generaliseret vuodđojovkui, populašuvdnii. Dutkančoggosiin oččoduvvo dutkamuššii stuorát vuodđojoavkkus, ovdamearkka dihte suopmelaččain, ovttalágan miniatyramálle, mii govvida ja vástida nu

bures go vejolaš vuodđojoavkku. (Valli 2018: 215.) Daningo dutkamušastan leat maiddáí kvalitatiiva iešvuodat, dan vuosttas mihttomearrin ii leat leamaš prosentuálalačcat mihtidit ovdamearkka dihte dan, man stuorra oassi sámeálbmogis guldala sámerádio dahje man stuorra oassái álbmogis iežasgielat rádios lea mearkkašupmi. Dan dihte dutkamušas ii rehkenastojuvvo, man stuorra proseantaoassái sámeálbmogis bohtosiid sáhttá generaliseret. Das fuolakeahttá maiddáí kvalitatiiva dutkamuša dakhki sáhttá ja berrege guorahallat dutkanbohtosiid oktiiheivema vástideaddji stuorát joavkkuin (Hakala 2018: 36). Dutkamuša kvalitatiivvalaš beliin fuolakeahttá sáhttá nuppiid sániiguin jurddašit, ahte dutkanbohtosat vástidit goittotge muhtun muddui dili stuorát vuodđojoavkkus, sámeálbmogis.

3.2 Dutkančuozáhat

Dutkamušan čuozáhatjoavku leat badjel 15-jahkásaš sápmelačcat. Sihkkarasten rivtes čuozáhatjovkui deaivama dainna, ahte jerren gažadanskovi vuosttas gažaldahkan vástideaddjiin, atnetgo sii iežaset badjel 15-jahkásaš sápmelažžan. Nuppiid sániiguin gažadeapmái vástidedje olbmot, geat identifiserejit iežaset sápmelažžan. In ráddjen čuozáhatjoavkun dušše beare Suomas ássi sápmelaččaid, daningo Yle Sámi rádio guldaluvvo maiddáí Suoma rájáid olggobealde, inge livče sáhttán neahttagažadanskoviin ráddjet olbmuid vástideami riikkarájáid mielde.

Dutkančuozáhaga luondu dihte dán dutkamušas ii lean vejolašvuhta geavahit deaivilit dahje systemáhtalačcat válljejuvvon čoggosa. Ovdamearkka dihte Suoma sámediggeláhka meroštallá sápmelažžan olbmo, guhte atná iežas sápmelažžan, muhto dihto eavttuiguin. Son galgá leat jogo ieš dahje unnimustá okta su vánhemiiin dahje máttarvánhemiiin lea galgan oahppan sámegiela vuosttas giellan, dahje son galgá leat dakkár olbmo maŋisboahti, guhte lea merkejuvvon duottar-, vuovde- dahje guolásteaddjilappalažžan eana-, vearroguddin- dahje heaggagirjjis, dahje unnimustá okta su vánhemiiin galgá leat merkejuvvon dahje livčii sáhttán merkejuvvot jietnavuoiggalazžan Sámi parlameantta dahje Sámedikki válmmas. (Laki Saamelaiskäräjistä 1995/974 § 3.) Dáid olbmuin sáhtášii váldit dutkančoggosa dušše Suoma Sámedikki válgalogahallamis, mii fas ii leat almmolaš ášsegirji. Ohcen

Sámedikki stivrras lobi geavahit válgalogahallama vuodđun dutkančoggosa váldimis, muhto stivra ii miehtan dasa. Dan dihte válljejin rahpat vástidanvejolašvuoda buot badjel 15-jahkásaš, iežaset sápmelažjan identifiserejeaddji olbmuide.

3.3 Dutkanmateriála čoaggin ja giedħallan

Lean čoaggán dutkanmateriála gažadanskoviiguin (čuvvosat 1–4). Gažadandutkamušaid okta stuorámus ovdduin lea dat, ahte daiguin lea vejolaš čoaggit viiddis dutkanmateriála viiddis guovllus: dutkamušii lea vejolaš oažżut mielde olu olbmuid, geain lea vejolaš jearrat olu áššiid. (Hirsjärvi ja earát 2009: 193.)

Daningo dutkamuša čuożáhatjoavku leat badjel 15-jahkásaš sápmelačcat, geat áasset bieḍgguid viiddis guovllus, ja go dutkamušas ii lean vejolašvuhta geavahit válgalogahallama vuodđun deaivilis čoggosa válljemis, mearridin čoaggit dutkanmateriála rabas neahttagažademiin, mas juogán dieđu mánggalágan lávddiin. Neahtas čađahuvvi gažadandutkamušat leat lassánan mealgat 2000-logus. Neahttagažadeamit leat bivnnuhat dutkanmateriála čoaggimis, daningo daid lea jođán sihke doaimmahit vástideaddjiide ja máhcahit dutkái, dat eai ráddje vástideaddjijoavkku geográfalačcat, dat leat hálbbit dahje nuvttá ja gažademiid plánen- ja analyserenprogrammaid lea dávjá álki geavahit. Gažadeapmi lea beaktulis dutkanvuohki, daningo dat seastá dutki áiggi ja geahppudahttá barggu. Dušše beare poastta bokte čađahuvvi gažadandutkamušat orrot báhcimin historjái, go dutkit dievasmahttet daid ain dávjibut iešguđetlágan vugiiguin. (Hirsjärvi ja earát 2009: 193–195; Perkkilä & Valli 2018: 246; Räsänen & Sarpila 2013: 68–70.) Dutkit geavahit ain eanet mángga materiálačoagginvuogi kombinašuvnnaid ja ovttastahttet neahttagažademiid ovdamearkka dihte poasta- dahje telefovdnajearahallamiidda. Neahttagažadanskovi ráhkadeapmi ovdamearkka dihte poastagažadanskovi vuodul lea hálbi, muhto váldá dávjá áiggi vuoi skovit leat sihkkarit ovttaláganat ja buvttadit rivttes dutkandieđu. Buoremus dilis neahttagažadanskovvi fállá vástideaddjái vuogi vástidit geahppasabbot go poastagažadanskoviin. Jos neahttagažadanskovvi goit lea funet ráhkaduvvon, sahttá dat borrat olles dutkamuša jáhkkehahttivuoda, duskkástuhttit vástideaddji ja unnidit vástidanproseantta. (Räsänen & Sarpila 2013: 74.) Dutkamušat

goit čájehit, ahte manjimuš logijagiid áigge poastagažademiid vástidanproseanttat leat njedjan, go fas neahntagažademiid vástidanmokta lea buorránan. (Perkkilä & Valli 2018: 245–246.)

Gažadandutkamušas leat gal muhtun heajos bealit. Dutki ii sáhte leat sihkar, man duođas vástideaddjit leat váldán dutkamuša ja leatgo sii vástidan dasa fuolalaččat ja rehálaččat. Dutki ii maiddái sáhte diehit, leatgo vástádusmolssaeavttut leamaš lihkostuvvan vástideaddji geahččanguovllus, ja boasttoáddejumiid kontrolleren lea váigat. Buorre gažadanskovi ráhkadeapmi váldá áiggi ja gáibida dutkis máŋggalágan dieđuid ja dáidduid. Buot gažadandutkamušat eai maiddái juvssa doarvái vástideaddjiid. (Hirsjärvi ja earát 2009: 193–195.)

Rabas gažadandutkamuša materiála gohčoduvvo čájánassan, ii čoakkusin. Dutki ii leat ovddalgihtii oktavuođas vástideaddjiide iige vállje sin persovnnalaččat. Gažadeapmái sáhttá vástidit gii hálida, iige dutki jur sáhte ráddjet vástideaddjiidis. Dutki berrege smiehttat, makkár ášshit váikkuhit vástideaddjijoavkku šaddamii ja makkár olmmošjoavkkut báhcet vejolaččat dutkamuša olggobeallái. Dákkár gažademiid ovdun lea dábálaččat dat, ahte dutki sáhttá fidnet olu vástádusaid áibbas oanehis bottas. (Perkkilä & Valli 2018: 251.)

Smihtten guhká, geavahivččengo iežan dutkamuša materiála čoaggimis neahhta- ja poastagažadanskoviid kombinašuvnna. Daningo dutkamuša čuozáhat leat badjel 15-jahkásaš sápmelaččat, in sáhttán vuordit, ahte buot ahkejoavkkut gávnnašedje neahntagažadanskovi. Hárve boarrásamos buolvva sápmelaš geavaha neahta jeavddalaččat, iige dieđuid fidnen sis dušše neahntagažadanskovi bokte lean dákpiduvvon. Poastaskovvi nubbin dutkanvuohkin vuot livčii leamaš barggahahti ja eahpesihkar datge. Poastagažademiin leat maiddái dávjá unna vástidanproseanttat (Valli 2018: 202). Danin mearridin geavahit dutkamušastan veháš earálágan kombinašuvnna: sihke digitála ja bábergažadanskoviid. Vuosttas dilis juhken digitála gažadanskoviid nu viidát go sáhtten: muitalin daid birra sámemediain, juhken daid ieš sosiála medias ja sáddejin dain dieđu šleadgapoasttain ovdamearkka dihte sámi organisašuvnnaid poastalisttuide. Daid olbmuid, geat eai mannu sivas oaččošii dieđu skoviin neahtas ja

sosiála medias, oččodin dutkamušii fárrui nu, ahte ávžžuhin dutkamuša juohkinkanálain olbmuid sihke lebbet dieđu das ja veahkehít ovdamearkka dihte boarrásot fulkkiideaset ja oahppásiiddiset deavdit skovi. Ožžon muhtun veardde jearaldagaid dakkár olbmuin, geat eai leat neahhta- ja somemáilmmiss, ja veahkehin sin jogo deavdit neahttaskovi dahje fállen sidjiide vejolašvuoda deavdit skovi báberveršuvdnan. Navddán, ahte stuorámus oassái vástideaddjiin neahttagažadanskovvi lei buot álkimus ja geahppasamos vuohki oassálastit dutkamušii. Erenoamážit boarrásamos vástideaddjiide goit lei lunddolaš oassálastit dutkamušii eará vugiin. Gažadanskovvedutkamuša materiála sáhttá čoaggit jogo hávil ovta áigodagas (su. poikittaistutkimus) dahje čuovvundutkamušan (su. pitkittäis- eli seurantatutkimus) nu, ahte materiála čoggojuvvo seamma vástideaddjijoavkkus unnimustá guovtti sierra áigodagas. Daningo dán dutkamuša ulbmilin lei dutkat fenomena mannu áiggis, lei vástádusaid heivvolaš čoaggit ovta dutkanáigodagas. (Vastamäki & Valli 2018: 270–272.) Gažadanskoviide sáhtii vástidit 27.8.–20.9.2018.

Gažandutkamušas lea dehálaš, ahte skovvi, dan gažaldagat ja giella leat dárkilit smihttojuvvon. Buorre gažadanskovvegažaldat lea čielggas, oanehaš, spesifa ja doallá sistis dušše ovta mearkkašumi. Gažadanskoviid hábmemis ávžžuhit dutkiid fállat vástádusmolssaeaktun maiddái ”ii oaivil áššái”, garvit vástádusmolssaeavttu ”ovta oaivilis / eará oaivilis”, dárkkisitit sátneválljejumiid ja vuđolaččat guorahallat gažaldagaid meari ja ortnega. Skovi testen pilohttaveršuvnnain lea vealtameahttun. (Hirsjärvi ja earát 2009: 202–203).

Čuvvon dáid ávžžuhusaid ráhkadettiinan gažadanskovi. Testejin gažaldagain moattelágan veršuvnnaid golmma olbmos, ja sin vástádusaid vuodul rievdadin daid deaivilabbon ja buorebun. Oassi gažaldagain ledje strukturerejuvpon gárvves vástádusmolsseavttuiguin, muhto skovis ledje maiddái moadde rabas gažaldaga. Skovit ledje standarderejuvpon, mii dárkuha, ahte juohke gažaldat jerrojuvvui buot vástideaddjiin seammaláhkai (Hirsjärvi ja earát 2009: 198–199).

Gažadeami gielas lea stuorra mearkkašupmi dutkamuša lihkostuvvama dáfus: vuogas giela lea álki lohkat, go fas gággadis giella ja sátneválljejumit sáhttet duskkástuhttit

vástideaddji. Gažadanskoviid gažaldagaid galgá viggat hábmet gielalalačcat riekta ja nu, ahte gielas válđá vuhtii čuozáhatjoavkku luondu. (Valli 2018: 199.) Giddejin gažadeami gielas fuopmášumi erenoamážit dan oktageardánisuhtii, nuppiid sániiguin dasa, ahte gažaldagain eai leat geavahuvvon teorehtalaš ja mohkkás sátneválljejumit, doahpagat ja cealkkaráhkadusat, ja ahte dat eai leat njuolggojorgalusat nuppi gielas. Erenoamážit sámegiela máhtu dássi sáhttá molsašuddat olbmuid gaskkas, man dihte lei dehálaš sihkkarastit, ahte juohke okta sihkkarit ádde gažaldaga riekta ja seammaláhkai. Skovit ledje njealji gillii: anáraš-, davvisáme-, nuortalaš- ja suomagillii. Giddejin iešguđet giellaveršuvnnain fuopmášumi dasa, ahte gažaldagat vástidedje nuppiideaset, muhto ledje liikká áddehahttit juohke gillii.

Vástideaddjit devde skoviid namaheapmin, muhto sii muitaledje iežaset agi, sohkabeali, eatnigiela ja ruoktogiellda. Gažadanskoviid álggus leat dávjá duogášdiehtogažaldagat, mat sihke veahkehít bohtosiid analyseremis iešguđetlágan olmmošjoavkkuid mielde ja maiddái veahkehít vástideaddji beassat johtui gažademiin (Valli 2018: 196). Juhken vástideaddjiid ahkeluohkáid logijagiid mielde: 15–19-, 20–29-, 30–39-, 40–49-, 50–59-, 60–69-, 70–79- ja badjel 80-jahkásaččaide. Sohkabeallemolssaeaktun ledje nissonolmmoš, almmáiolmmoš ja juoidá eará. Eatnigiellamolssaeaktun ledje anáraš-, davvisáme-, nuortalaš- ja suomagiella, ja dain vástideaddji sáhtii válljet eanet go ovta molssaeavttu. Ruoktogielldas vástideaddji oačcui čállit ieš rabas gažaldatkássii.

Gažadeamis ledje buohkaide njeallje duogášdiehtogažaldaga, 5–14 gažaldaga gárvves vástádusmolssaeavttuiguin (dihto gažaldagaide dihtoláhkai vástideamis gažadeapmi dagai vástideaddjái joatkagažaldagaid) ja loahpas moadde rabas gažaldaga. Gažadanskovi guhkkodahkii ferte giddet fuopmášumi, daningo menddo guhkes gažadeapmi sáhttá váikkuhit olbmuid vástidanmoktii. Gažadanskovi guhkkodagas ferte váldit vuhtii earret eará vástideaddjiid lohkandáiddu, gažadeami fáttá ja fáttá mearkkašumi vástideaddjiide, daningo earret eará dát áššit sáhttet váikkuhit vástidanmoktii. (Valli 2018: 198.) Álggahin iežan gažadeami álkes ja oanehis duogášdiehtogažaldagaiguin, maid manjá vástideaddji beasai vástidit iešguđetlágan gažaldagaide gárvves vástádusmolssaeavttuiguin. Daidda vástideaddjis lei bággu vástidit. Loahpas ledje moadde rabas gažaldaga, mat eai lean bákkolačcat, muhto mat

ledje juhkojuvvon fáttáid mielde unnit joavkuide amas vástideapmi šaddat menddo lossadin. Rabas gažaldagain lea várran, ahte olbmot guddet vástitkeahhtá daidda, vástádusat leat fuollameahttumit ja eahpedárkilit čállojuvvon dahje vástádusat eai iešalddes vástit gažaldagaide, ja dalle dain ii maiddái leat ávki. Rabas gažaldagaid ovdu lea goittotge earret eará dat, ahte dain sáhttet loktanit ovdan jurdagat, mat eai boađášii oidnošii muđui dutkamušas gárvves vástádusmolssaeavttuid bokte. Rabas gažaldagat addet maiddái buorre vejolašvuoda gullat vástideaddji oainnu vuđolabbot. (Valli 2018: 240–241.)

Neahtagažademiid bákkolaš gažaldaiguin lea álki sihkkarastit, ahte vástideaddji vástida juohke gažaldahkii. Dákkár bággovástideamis lea buorre dat, ahte buohkat vástidit buot gažaldagaide, mii geahpeda dutkanbohtosiid váilevašvuoda. Heittot lea goittotge dat, jos vástideaddji bággejuvvo vástidit mannu ásshái, masa sus ii leat sihkkaris oaivil. Go dutki geavaha dutkamušastis gárvves vástádusmolssaeavttuid, ferte son ovddalgihtii diehtit, makkár vástádusaid vástideaddjit buvttadit. Lea dehálaš, ahte vástideaddjái gávdno álo rivttes dahje heivvolaš vástádusmolssaeaktu. Dan dihte gažadeapmái berre gárvves vástádusmolssaeavttuid lassin lasihit ”eará, mii?” -molssaeavttu. (Valli 2018: 214, 239.) Dáid rávvagiid vuodul fállen gažadeami vástideaddjiide gárvves vástádusmolssaeavttuid lassin maiddái vejolašvuoda čállit vástádusa sin iežaset sániiguin.

Dahken gažadanskoviid Webropol-gažadandutkamušbargoneavvuin, man Oulu universitehta geavaha dutkamušainis. Teknologalaš ovdáneami ja ovdamearkka dihte jierbmetelefovnnaid ja tableahtaid lassánan geavaheami dihte lea dehálaš, ahte gažadeapmi huksejuvvo nu, ahte dasa sáhttá vástidit álkket máŋggalágan rusttegiiguin (Perkkilä & Valli 2018: 247). Dutkamušii lei vejolaš vástidit dihtora lassin maiddái mobiilarusttegiiguin.

Lean geahčalan buoridit dutkamušan gelbbolašvuoda, validitehta ja luohttehahtivuoda, reliaabelitehta dainna, ahte lean válljen dutkangažaldagaid riekta ja deaivilit. Dat ovttas stuorra vástideaddjimeriin dáhkidot dáid buorre dutkamušii gullevaš iešvuodaid.

4 Bohtosat ja analysa

Buvttán dán logus ovdan dutkanbohtosiid ja analyseren daid. Gieðahalan bohtosiid vuos olles vástideaddjijoavkku geahčanguovllus, man maŋŋá gidden fuopmášumi čalbmái čuohcci áššiide earálágan olmmošjoavkkuid vástádusain. Ná analyseren maiddái olmmošjoavkkuid gaskasaš erohusaid sámegielat rádio guldaleami ja dasa laktáseaddji mearkkašumiid ektui.

Analyseren dutkanmateriála guovtteláhkai. Čilgen dili kvantitatiivvalaččat earret eará govvošiiguin, man maŋŋá analyseren vástádusaid kvalitatiivvalaččat teorehtalaš duogážii speadjalastimiin. Dagan dárkilis govvádusaid dilis, veardidan daid dálá dihtui ja lokten ovdan guovddáš, miellagiddevaš iešvuodaid. Ovdánan analysain vástádusain badjánan temáid mielde. Lean jorgalan vástádusain ovdanboahtán sitáhtaid davvisámegillii ja divvon dain cállinmeattáhusaid.

Ožžon gažadeapmái buohkanassii 173 vástádusa, main 160 ledje anihahittit dutkamušas. Guđđen dutkamuša olggobeallái 13 vástádusa, main vástideaddji lei vástidan vuosttas gažaldahkii ”Leatgo badjel 15-jahkásaš sápmelaš?” vástádusain ”In”. Čielgasit eanemus vástádusaid ožžon davvisámegielat skovvái, 99 vástádusa. Suomagielat skoviin dutkamuššii vástidedje 31 olbmo, anárašgielat skoviin 20 olbmo ja nuortalašgielat skoviin 10 olbmo.

Gažadeami vástideaddjiin čielgasit stuorámus oassi ledje nissonolbmot (121), nubbin almmáiolbmot (38) ja goalmádin eará sohkabeali ovddasteaddjit (1). Vástideaddjiin stuorámus oassi ledje 20–29-jahkásaččat (49), nubbin stuorámus 30–39-jahkásaččat (41), goalmádin stuorámus 50–59-jahkásaččat (21), njealjádin stuorámus 40–49-jahkásaččat (18), viđádin stuorámus 60–69-jahkásaččat (13) ja guđádin stuorámus 70–79-jahkásaččat (10). Unnimus vástideaddjijoavkkut ledje 15–19-jahkásaččain (3) ja badjel 80-jahkásaččain (5).

Čielgasit stuorámus oassi vástideaddjiin meroštalai iežas eatnigiellan davvisámegiela (62), nubbin stuorámus oassi suomagiela (44), goalmádin stuorámus oassi davvisáme-

ja suomagiela (31), njealjádin stuorámus oassi nuortalaš- ja suomagiela (8), viđádin stuorámus oassi anárašgiela (6) ja guđádin stuorámus oassi anáraš- ja suomagiela (4). Unnimus ovddastus lei olbmuin, geaid eatnigiella lea okto nuortalašgiella (1), nuortalaš- ja anárašgiella (1), suomagiella ovttas mainnanu earáin go anáraš-, davvisáme- dahje nuortalašgielain (1) ja davvisámegiella ovttas mainnanu earáin go anáraš-, nuortalaš- dahje suomagielain (2).

Vástideaddji ruoktogielda jerrojuvvui gažadeamis rabas kássain, masa olmmoš beasai ieš čállit ruoktogielddas. In sáhttán addit dán gažaldahkii gárvves vástdusmolssaeavttuid gielldaid stuorra meari dihtii. Ožžon gažaldahkii 138 dohkálaš vástdusa, daningo oasis vástdusain ii sáhttán dulkot olbmo ruoktogiellda. Ruoktogieldda sajis oassi lei váidalahti vástidan gažaldahkii ruoktogielas birra.

Čielgasit stuorámus oassi vástideaddjiin namuhii iežas ruoktogieldan Anára (51), nubbin stuorámus oassi Eanodaga (18) ja goalmádin stuorámus oassi Ohcejoga (16). Suoma sámeguovllu buot gielddat leat dutkamušas ovddastuvvon, go joavkkus ledje maiddái Soadegili ruoktogieldan almmuhan vástideaddjit (9). Suoma sámeguovllu gielldaid vástideaddjiid proseantalohku lei 68,1 ja Suoma sámeguovllu olggobeale gielldaid vástideaddjiid proseantalohku 28,3. Sámeguovllu olggobealde gažadeapmái oassálaste stuorámus joavkkut Oulus (14), Roavvenjárggas (10) ja Helssegis (5), maid lassin vástdusat bohte maiddái Espoos (2), Tamperes (2), Järvenpääs (1), Kirkkonummis (1), Kuopios (1), Outokumpus (1), Pellos (1) ja Turkus (1). Suoma olggobealde gažadeapmái vástidedje Ruotas ja Norggas 3,6 proseantta vástideaddjiin. Norggas gažadeapmái oassálaste Kárášjogas (3) ja Guovdageainnus (1) ja Ruotas Jielleváris/Váhčiris (1).

Dutkamuša vástideaddjijoavkkus lea ovddastus iešguđetlágan sohkabeliin, ahkeluohkáin, giellajoavkkuin ja ruoktoguovlluin.


4.1 Oppalaš dássi

4.1.1 Guldalandábit

4.1.1.1 Guldalanmearit

Dutkamušan gažadanskovis jerrojuvvui, guldalitgo vástideaddjit Yle Sámi rádioprográmmaid dálá dilis. Olmmoš beasai válljet viđa gárves vástádusmolssaeavttu gaskkas: 1) Guldalan álo, 2) Guldalan dávjá, 3) Guldalan duollet dálle, 4) Guldalan hárve ja 5) In guldal goassige.

Lagabui bealli vástideaddjiin muiṭalii, ahte guldala sámerádio fálaldaga duollet dálle. Njealjátoassi vástideaddjiin guldala rádiofálaldaga dávjá ja masá seamma stuorra oassi hárve. Vástideaddjiin njeallje proseantta ii guldal Yle Sámi rádioprográmmaid goassige. Okta proseantages guldala rádiofálaldaga álo.




Govus 1. Yle Sámi rádioprográmmaid guldalanmearit.

Erja Ruohomaa (2003) rádioguldaleaddjiid kategoriserema vuodul sáhttá dadjat, ahte stuorra oassi Yle Sámi rádiofálaldagaid guldaleaddjiin leat válljejeaddjit: sii guldalit rádioprográmmaid duollet dálle. Bajdelaš njealját oassi Yle Sámi rádio guldaleaddjiin leat berošteaddjit: sii guldalit rádio álo dahje dávjá, jeavddalaččat ja máŋggalágan diliin – sis lea lagaš gaskavuohta rádioi. Bajdelaš njealjádas dutkamuša vástideaddjiin leat berošmeahttun guldaleaddjit: sis ii leat jur gaskavuohta sámerádioin. Berošmeahttun guldaleaddjit illá goassige guldalit rádio, daningo dovdet, ahte dat ii buvtte lasseárvvu sin eallimii. (Ruohomaa 2003: 230.)

Vehviläinen (1974) gávnnahii Yle Sámi Rádio guldaleami guoski dutkamušastis 1970-logus, ahte lagabui bealli vástideaddjiin guldalii sámerádio álo dahje oalle dávjá, njealjádas guldalii sáddagiid duollet dálle ja njealjádas oalle hárve dahje ii goassige (Vehviläinen 1974: 74). Sullii seammá čájehedje Ruohomaa (1992; 1995) dutkamušat 1990-logus. Dalle Suoma sámerádio sáddagiid guldaledje beaivválaččat lagabui 60 proseantta vástideaddjiin. Sullii viđátoassi vástideaddjiin guldalii dušše sámerádio ja sullii goalmádas ii guldalan dan ollenge. (Ruohomaa 1992: 9; Ruohomaa 1995: 3–4.)

Go ovdamearkka dihte 70-logus sámerádio sáddagiid guldalii álo dahje dávjá sullii bealli vástideaddjiin ja duollet dálle sullii njealjádas vástideaddjiin, leat logut jorggihan dán beaivái nuppe beliid. Berošteaddji guldaleaddjiid mearri lea njiedjan 70-logus dán beaivái njealjátosiin, go fas válljejeaddjiid mearri lea sturron seamma veardde. Berošmeahttun guldaleaddjiid mearri dan sadjái lea bisson seammán čađa áiggiid: 70-logus gitta otná beaivái sin mearri dutkamušaid vástideaddjiin leamaš sullii goalmádas-njealjádas. Vuolábeale govrosis lean veardádallan guldalameriin dáhpáhuvvan nuppástusaid áiggiid mielde. Tabealla goit čájeha nuppástusaid dušše dohko guvlui, daningo iešguđet dutkamušain lea guldaleami mearri jerrojuvvon vehás earáláhkai ja dutkančuozáhagatge leamašan earáláganat.



Govus 2. Yle Sámi Radio guldalanmearit historjjás otná beaiváí.

Sápmelaččat eai leat sámerádio ektui seamma áŋgiris berošteaddjit go suopmelaččat rádio ektui oppalohkái. Rádio lea suopmelaččaid gaskkas hui bivnnut. Kansallinen Radiotutkimus -dutkamuš jagis 2018 čájeha, ahte suopmelaččain joba 90 proseantta leat berošteaddji guldaleaddjit, geat guldalit rádio álo dahje dávjá. (Finnpanel Oy / KRT 2019a.) Go mu dutkamuša vástideaddjiin dušše njealjádas leat berošteaddji guldaleaddjit, sáhttá dulkot, ahte čielgasit stuorát oassi suopmelaččain leat rádioberošteaddjit go sápmelaččat sámerádio ektui.


4.1.1.2 Gos?

Daid olbmuin, geat muitaledje guldalit Yle Sámi rádioprográmmaid jogo álo, dávjá, duollet dálle dahje hárve, jerren lassigažaldagaid guldaleami birra. Jerren vástideaddjiin, gos sii lávejít guldalit rádiofálaldaga. Adden guhtta gárvves vástádusmolssaeavttu: 1) Ruovttus, 2) Bargobáikkis, 3) Biillas, 4) Jođedettiin báikkis nubbái, 5) Valáštaladettiin dahje 6) Eará oktavuođas. Vástideaddjis lei vejolašvuhta válljet máŋga guldalanbáikki, man dihte vástádusaid oktiirehkenastojuvvon proseantalohku lea stuorát go čuohte

proseantta. Dasa lassin vástideaddji sáhtii čállit rabas kássii eará dakkár guldalandilálašvuodaid, mat eai lean gárvves molssaeavttuin.

Čielggai, ahte stuorámus oassi, olles 70 proseantta, vástideaddjiin guldala Yle Sámi rádioprográmmaid biillas ja masá seamma stuorra oassi, 69 proseantta, ruovttus. Badjelaš njealjádas vástideaddjiin muiṭalii, ahte láve guldalit rádiofálaldaga maiddái bargobáikkis dahje jođedettiin báikkis nubbái. Dušše guokte proseantta vástideaddjiin guldala Yle Sámi rádioprográmmaid valáštalađettiin.

Badjelaš logát oassi vástideaddjiin muiṭalii, ahte láve guldalit Yle Sámi rádiofálaldaga mannu eará oktavuođas. Dat vástideaddjít muiṭaledje rabas gažaldatkássii, ahte sii guldalit rádioprográmmaid earret eará jođedettiin meahcis ja duoddaris, finadettiin davvin, galledettiin vánhemiid, duddjodettiin ja olgobargguin.



Govus 3. Yle Sámi rádioprográmmaid guldalansajit.

Sámerádio guldalanbáikkit sulastahttet olu suopmelaš servodaga rádioguldalanbáikkiid, muhto sápmelačcat guldalit sámerádio biillas ja ruovttus eanet go suopmelačcat rádio oppalohkái. Go suopmelaččain sullii 40–60 proseantta (vuollel–badjel 45-jahkásacčat) guldala rádio biillas, sápmelaš vástideaddjiin olles 70 proseantta muiṭalii guldalit Yle

Sámi rádioprográmmaid biillas. Suopmelaččain 20–60 proseantta (vuollel–badjel 45-jahkásáčcat) guldala rádio ruovttus, go fas sápmelaš vástideaddjiin lagabui 70 proseantta muitalii guldalit sámerádio ruovttus. Suopmelaččain 10–30 proseantta (vuollel–badjel 45-jahkásáčcat) guldala rádio barggus, ja sápmelaš vástideaddjiin sámerádio guldala barggus sullii seamma stuorra joavku, lagabui 27 proseantta vástideaddjiin. (Finnpanel Oy / KRT 2019a.)

Rádioguldaleapmái váikkuha earret eará guldalanbáikki, mii hábme guđege guldalandilálašvuodja. Rádioguldaleapmái vuodjuma dássi fas lea oktavuođas eará beaivválaš doaimmaid gáibidan vuodjuma dássái. Jos olmmoš vuodju mannu eará doibmii, sáhttá rádio báhcit fuopmášumi haga. Jos olmmoš vuodju juogatu veardde mannu eará doibmii, giddejuvvo rádiosisdollui molsašuddi fuopmášupmi. Olmmoš sáhttá goittotge vuodjut rádio guldaleapmái nu, ahte dat lea vuostassaji aktivitehta. Dat, ahte sápmelaččat guldalit sámerádio olu ovdamearkka dihte biillas, ruovttus ja bargobáikkis, sáhttá dárkuhit, ahte guldaleapmi lea jogo primára, báldalas dahje sekundára. Nuppe dáfus sámerádio guldaleapmi sáhttá leat olbmui primára aktivitehta maiddai biillas, ruovttus ja bargobáikkis, daningo sáhttá vuordit, ahte olmmoš lea dávjá ovddalgihtii válljen Yle Sámi rádioprográmma ja ovdamearkka dihte ruovttus, rafálaš bargobeavve dahje biilamátkkošteaddjis sáhttá leat buorre vejolašvuohda vuodjut guldalit rádiosidoalu, goas das lea maid mearkkašupmi olbmui. Dávjá dákkár guldalandiliin lea goit jearaldat báldalas aktivitehtas, goas guldaleaddji vuodju vurrolágaid rádioguldaleapmái ja eará aktivitehtii, ovdamearkka dihte ruovttus ruoktobargguide, bargobáikkis bargguide ja biilavuodjimis eará johtolahkii. Sámerádio guldaleapmi sáhttá goit lunddolaččat leat maiddai sekundára aktivitehta, goas guldaleaddji ii gidde olláge fuopmášumi rádiosisdollui. Dalle sámerádio doaibmá duogášjetnan. (Ruohomaa 2003: 229; Åberg 1999: 77.)

Dat, ahte sápmelaččat guldalit Yle Sámi rádio dávjá aiddo fal jođedettiin báikkis nubbái, muitala, ahte dat lea šaddan oassin olbmuid beaivválaš eallimis. Dat sáhttá dárkuhit maiddai dan, ahte olbmot namalassii vudjot sámerádio guldaleapmái. Dutkamušain lea gávn nahuvvon, ahte johti guldaleapmi iešalddes bisseha rádioguldaleami. (Ruohomaa 2003: 231.)


Yle Sámi rádio guldalanbáikkiide ii leat giddejuvvon erenoamáš fuopmášumi árat dutkamušain, nu ahte veardidanvejolašvuhta historjái ii jur leat dákko buohta. Dásá lea gal čielga sivva: málbmi lea rievdan nu sakka. Go 1950-logus sápmelaččat čoahkkanedje dihto olbmuid ruovttuide daid hárve rádiorusttegiid gurrii guldalit sámerádio sáddagiid, ii dat šat dán áigge leat dáhpín earret eará juohkedilásáš johtti rádio dihte (Lehtola 2001: 13).

4.1.1.3 Mainna?

Gažadanskovis jerrojuvvui, mainna rusttegiin olmmoš guldala Yle Sámi rádioprográmmaid. Fállen vástideaddjiide vihtta gárvves vástádusmolssaeavttu: 1) Beavderádioin, 2) Dihtoriin, 3) Telefovnnain, 4) Biilarádioin ja 5) Mainnanu eará rusttegiin. Vástideaddjis lei vejolašvuhta válljet máŋga molssaeavttu, ja dan dihte vástádusaid oktiirehkenastojuvvon proseantaloohku lea stuorát go čuohte proseantta. Vástideaddji sahtii maiddái čállit lasi guldalanrusttegiid rabas kássii.

Dego jo ovddit gažaldaga bohtosa vuodul sahtii vuordit, stuorra oassi vástideaddjiin guldala Yle Sámi rádioprográmmaid biilarádioin, olles 67 proseantta. Nubbin eanemus olbmot guldalit Yle Sámi rádiofálaldaga dihtoriin ja beavderádioin, maiguin guktuiguin lagabui bealli vástideaddjiin guldala sámerádio. Telefovnnainge Yle Sámi rádioprográmmaid guldala badjel goalmmádas vástideaddjiin.

Lagabui logátoasse olbmuin muiṭalii, ahte guldala Yle Sámi rádiofálaldaga mainnanu eará rusttegiin. Dát vástideaddjit muiṭaledje čálalaččat, ahte guldalit sámerádio earret eará rádiobealljesujiiguin, tableahtain, televišuvnnain ja beavdestereoiguin neahttarádio bokte.



Govus 4. Yle Sámi rádioprográmmaid guldalanrusttegat.

Sápmelaččat guldalit sámerádio oalle earálágan rusttegiiguin go suopmelaččat rádiosisdoaluid oppalohkái. Suopmelaččain 80–90 proseantta (vuollel–badjel 45-jahkásaččat) guldala rádiosisdoaluid buot eanemus FM-rádiorusttegiid bokte. Mu gažadeamis analoga rádiorusttegat ledje sirrejuvvon earret eará biila- ja beavderádion, nu ahte logu ii sáhte njuolga veardidit, muhto daid oassi lea 44–67 proseantta sulaid. Suopmelaččain 10–30 proseantta (badjel–vuollel 46-jahkásaččat) guldala rádio mátketelefovnaid bokte, go fas sápmelaččat guldalit sámerádio telefovnain binná eanet, lagabui 40 proseantta muiṭalii ná. Suopmelaččain dušše 10–20 proseantta (badjel–vuollel 46-jahkásaččat) guldala rádio dihtoriin, go fas sápmelaččain čielgasit stuorát oassi, lagabui bealli, guldala sámerádio dihtoriin. Tablehtaiguin rádio guldala sullii vihtta proseantta suopmelaččain ja sámerádio sullii guokte proseantta vástideaddjiin. (Finnpanel Oy / KRT 2019a.)

Erohusain vuhtto čielgasit sámerádio FM-dávjodaga gullon. Árbevirolaš FM-rádiorusttegiiguin ii sáhte guldalit sámerádio sáddagiid Roavvenjárgga máttabealde (Yle Sápmi 2018b). Dat oidno bohtosiin: sápmelaččat guldalit sámerádio eanet dakkár rusttegiiguin, maiguin lea vejolaš guldalit neahttarádio. Dát lea stuorra nuppástus 1970-logu ektui, goas sápmelaččain olles 95 proseantta oamastii FM-rádiorusttega (Rantanen


1971: 8). Miellagiddevaš iešvuohta, mii vástádusain loktanii ovdan, lea maiddái dat, ahte Yle Sámi rádio guldaleaddjit guldalit sáddagiid mánggalágan diliin, ovdamearkka dihte meahcis rádiobealljesijiid bokte.

4.1.1.4 Goas?

Gažadeamis jerrojuvvui, maid beivviid vástideaddji guldala Yle Sámi rádioprográmmaid buot millosamosit. Gárvves vástádusmolssaeavttuin ledje válljenmunnin buot vahkkobeaivvit, main olmmoš sahtii válljet mánga molssaeavttu. Dan dihte vástádusaid oktiirehkenastojuvvon proseantalohku lea stuorát go čuohte proseantta. Yle Sápmi ii dán dilis sádde radiosisdoaluid vahkuloahpaid. Ulbmilin lei nuppiid sániiguin diđoštallat, mii livčii olbmuide niehkodilis buot millosamos beaivi guldalit sámegielat radiosáddagiid.

Buot árgabeaivvit ledje oalle dássálágaid vástideaddjiid miela miel, muhto buot millosamos beaivi guldalit Yle Sámi rádiofálaldagaid lei duorastat, 65 proseantta vástideaddjiin namuhii dan millosaš beaivin. Nubbin millosamos beaivi guldalit sámerádio lei vástideaddjiide bearjadat ja goalmádin vuossárga.

Miellagiddevaš lea dat, ahte 16–18 proseantta vástideaddjiin muitalii, ahte guldalivčii Yle Sámi rádioprográmmaid mielas maiddái lávvardaga ja sotnabeaivve, goas Yle Sápmi ii sádde rádioprográmma.




Govus 5. Yle Sámi rádioprográmmaid millosamos guldalanbeaivvit.

Duorastaga bivnnutvuoda sáhttá čilget duorastateahkediid nuorra ollesolbmuid rádioprográmma Sohkaršohkka, mii manjelabbos bohtosiin čájehuvvo Yle Sámi guldaleaddjiid oktan jiellatprográmmman. Miellagiddevaš erohus historjái lea dat, ahte go Rantanen (1971) dutkamušas 1970-logus sápmelaččaid mielas buot buoremus vahkkobeaiivi sámegielat rádio guldaleapmái lei sotnabeaivi ja nubbin lávvardat, leat dát guokte beaivvi dán dutkamuša vástideaddjiide eahpemilosamos beaivvit guldalit sámerádio – vaikkoge oassi guldalivččii dallege mielas sámegielat rádioprográmmaid. 1970-logus dahkkojuvvon dutkamušas goalmádin millosamos beaivi guldalit sámerádio lei olbmuide vuossárga, ja dat orru doallamin sajis ain dánge beaivve. Vuossárga lei maiddái dán dutkamuša vástideaddjiide goalmádin millosamos beaivi guldalit sámegielat rádiosisdoaluid. (Rantanen 1971: 16–17.)

Vahkkobeivviid lassin diđoštallen dutkamušastan, mii lea olbmuide buot millosamos áigi jándoris guldalit Yle Sámi rádioprográmmaid. Fállen gávcci gárvves vástádusmolssaeavttu: 1) Árrađit 5–7, 2) Iđit 7–9, 3) Iđitbeaivi 9–11, 4) Beaivi 11–14, 5) Eahketbeaivi 14–17, 6) Eahket 17–21, 7) Mañjiteahket 21–24 ja 8) Idja/iđitidja 24–5. Vástideaddjis lei vejolašvuhta válljet mánga molssaeavttu, ja dan dihte vástádusaid oktiirehkenastojuvvon proseantalohku lea stuorát go čuohte proseantta. Yle Sápmi ii

sádde buot dáid áiggiid prográmma, nu ahte ulbmilin lei maiddái dákko buohta čielggadit, mii livčii olbmuide niehkodilis buot millosamos áigi guldalit Yle Sámi rádio.

Buot millosamos áigi guldalit Yle Sámi rádioprográmmaid lei vástideaddjiide iđit diibmu 7–9, man bealli anii miela miel áigin. Nubbin millosamos áigi lei eahket diibmu 17–21 ja goalmádin eahketbeavi diibmu 14–17, goas lagabui bealli vástideaddjiin guldala mielas sámerádio. Olles goalmádas guldalivčii sámegielat rádiosisdoaluid mielas maiddái iđitbeavve diibmu 9–11 ja beaivet diibmu 11–14. Miellagiddevaš lea, ahte juohke logát atná maiddái manjiteahkediid diibmu 21–24 ja árraiđidiid diibmu 5–7 vuogas áigin guldalit Yle Sámi rádio.



Govus 6. Yle Sámi rádioprográmmaid millosamos guldalanáiggit.

Yle Sápmi sádde dán dilis vástideaddjiid millosamos áiggis diibmu 7–9 sihke iežas Yle Sámi iđit -sáddaga ja maiddái davviríkkalaš Buorre iđit Sápmi -sáddaga. Nubbin millosamos áiggis, eahkes diibmu 17 ja 21 gaskkas, Yle Sámi kanálas gullojut SR Sameradion ja NRK Sámi sáddagat diibmu 18.30 rádjai, earret duorastaga ja bearjadaga, goas Yle Sápmi sádde nuorra ollesolbmuid Sohkaršohkka-prográmma

diibmu 18–20 ja 18.30–20.30. Goalmádin millosamos áiggis diibmu 14–17 Yle Sápmi sádde earret eará iežas Dearvva! Tiõrv! Tiervâ! -veaigesáddaga diibmu 14.30–16.

Goalmádas vástideaddjiin anii miela miel guldalanáigin maiddái beaivvi diibmu 11–14 ja iđitbeaivvi diibmu 9–11. Yle Sámi kanálas lea dán dilis sáttabotkka gaskabeaivve, nu ahte dalle rádioprográmmaid ii beasa guldalit, vaikko goalmádas nu mielas barggašii. Maiddái mielas manjiteahkediid diibmu 21–24 ja árraiđidiid diibmu 5–7 sámerádio guldaleaddji vástideaddjiide ii dán dilis leat fállun prográmma dáid áiggiid.

Rantanen (1971) fuopmášumi 1970-logus giddii dat, ahte badjel bealli su dutkamuša vástideaddjiin ii lean oppanassiige beroštuvvan vástidit guldalanáiggi guoskevaš gažaldahkii. Dat, geat vástidedje gažaldahkii, oaivvildedje heivvolamos diibmoáigin sámegielat rádioprográmma sáddemii diibmu 18–20, man goalmádas vástideaddjiin anii buot buoremus áigin. Nubbin heivvolamos áigin adnojuvvui diibmu 12–18. Länsman (1987) dutkamuš lagabui 20 jagi manjá čájehii seammá, sápmelaččat livčče guldalan sámerádio millosamosit diibmu 18–20. (Länsman 1987: 18; Rantanen 1971: 16–17.) Lea miellagiddevaš, ahte 1990-logu rádjai sápmelaččat eai atnán iđida nu vuogas áigin sámerádio guldaleapmái. Dilli lei goit rievdan jo moadde jagi dan manjá, go jagi 1992 sullii 40 proseantta olbmuin guldalii Yle Sámi Rádio sáddagiid árgaiđidiid. Deaddu lei liikká eahketbeivviin, goas bealli guldaleaddjiin guldalii sáddagiid. (Ruohomaa 1992: 14–18.)

Dat, ahte mu dutkamuša vástideaddjiide millosamos áigi guldalit Yle Sámi rádiósáddagiid lea iđdes diibmu 7 ja 9 gaskkas, speadjalastá váldoservodaga dili. Suomas olbmot guldalit rádio buot eanemus árgaiđidiid diibmu 8. Válđoálbmoga dutkamuš čájeha, ahte vaikko rádios leat guldaleaddjit miehtá beaivvi, lea suopmelaččaid rádioguldaleamis deaddu beavet (Finnpanel Oy / KRT 2019a). Mu dutkamuša vástádusat goit čájehit, ahte jos sápmelaččat oaččošedje válljet, livčii sámegielat rádio guldaleamis deaddu iđidis ja eahkedis.


Vaikko iđitdiimmut orrotge vuomitmin millosamos sáddenáiggiid gilvvu, lea eahketdiimmuin čáða áiggiid leamaš mearkkašahti rolla sámerádio guldaleamis. Sihke árat ja dát dutkamuš čájehit, ahte sápmelaččat atnet eahkediid hui heivvolaš ja miela miel áigin guldalit sámegielat rádioprográmmaid.

4.1.2 Miela miel sisdoallu

Dán dilis Yle Sápmi sádde rádioprográmmaid juohke árgabeaivve. Sámegielat rádiobeavi álgá diibmu 7 doaimmahusa iežas Yle Sámi iđit -iđitsáddagiin. Diibmu 8–10 gullo čakčat 2016 álggahuvvon davvirikkalaš Buorre iđit Sápmi -sátta, mas leat Yle Sámi lassin mielde SR Sameradion ja NRK Sápmi. Yle Sámi iežas Dearvva! Tiõrv! Tiervâ! -eahketbeaisátta boahtá juohke árgabeaivve diibmu 14.30–16. Fásta beaivválaš prográmma lassin Yle Sápmi sádde earret eará arkiiva-, musihkka-, rohkos- ja mánáid-ja nuoraidprográmmaid, ja NRK Sámi ja SR Sameradion sisdoaluid. (Yle Sápmi 2018a.)


Gažadeamis jerrojuvvui, maid rádioprográmmaid vástideaddjit guldalit buot millosamosit. Fállen prográmmaid gárvves vástádusmolssaektun ja vástideaddjis lei vejolašvuhta válljet eanet go ovtta molssaeavttu, man dihte vástádusaid oktiirehkenastojuvvon proseantalohku lea stuorát go čuohte proseantta.

Olles 56 proseantta muitalii, ahte guldala mielas nuorra ollesolbmuid Sohkaršohkka-prográmma. Badjel bealli vástideaddjiin guldala mielas rádioodđasiid. Vehá vuollái bealli vástideaddjiin guldala mielas maiddái Yle Sámi iežas veaigesáddaga, arkiivaprográmmaid ja davvirikkalaš iđitsáddaga. Masá 40 proseantta buot vástideaddjiin atná miela miel prográmmman maiddái Yle Sámi iežas iđitsáddaga ja musihkkaprográmmaid. Lagabui goalmmádas vástideaddjiin guldala mielas SR Sameradion ja NRK Sámi sáddagiid Yle Sámi kanálas álgoeahkediid ja eahkediid. Mánáidprográmma Binna Bánná atná miela miel prográmmman badjelaš logi proseantta vástideaddjiin ja rohkosprográmmaid gávcci proseantta vástideaddjiin.



Govus 7. Yle Sámi millosamos rádioprográmmat.

Gažadanskovis jerrojuvvui maiddái, maid rádioprográmmaid olbmot eai leat beroštuvvan guldalit. Golbma njealjátoase vástideaddjiin muitalii, ahte ii beroš guldalit rohkosprográmmaid. Masá bealli olbmuin namuhii maiddái Binna Bánna prográmmman, mii ii geasut. Njealjádas vástideaddjiin ii beroš guldalit NRK Sámi ja SR Sameradion prográmmaid Yle Sámi kanálas. Sullii 16 proseantta almmuhii, ahte ii beroš guldalit Sohkaršohka. Musihkkaprográmmat ja rádioodđasat ožžo buot unnimus jienaid ii-berošteaddji prográmmman.



Govus 8. Yle Sámi ii-beroštahti rádioprográmmat.

Ođđasiin leamaš álo mearkkašahti rolla Yle Sámi Rádio sisdoaluin. Áibbas vuosttas jagiid rájes ja máŋgalot lagi das ovddosguvlui sámerádio guovddáš sisdoallun ledje ođđasat ja vuoiŋjalaš sáddagat. Rádioodđasat leamašge árat dutkamušain sámerádio guldaleaddjiid millosamos prográmma. 1970-logus dakhkojuvvon dutkamušaid mielde sápmelaččat guldaledje sámegielat rádioprográmmain millosamosit ođđasiid ja diehtoprográmmaid. (Rantanen 1971: 18–20; Vehviläinen 1974: 77.) Rádioodđasat beroštahttet ain buot eanemus sámerádio guldaleaddjiid. Guovtti bajábeale gažaldaga vástádusaid vuoden sáhttá dulkot, ahte rádioodđasat leat vástideaddjiide dat buot dehálamos fálldat: badjel bealli vástideaddjiin guldala daid mielas ja dušše 1,5 proseantta olbmuin ii beroš dain.

Dat, ahte ođđasat leat leamašan álo nu nana oassi Yle Sámi rádiofálaldagas, lea dahkan daid maiddái mearkkašahttin guldaleaddjiide. Máŋga vástideaddji govvidedje dutkamuša rabas vástádusain, ahte sámi rádioodđasat leat ceaggán sin millii jo mánnávuodás.

In muitte eará go ođđasiid.

Ođđasiid guldaleimmet ruovttus, olu ja dárkket.

Vástideaddjit čálle maiddái, ahte Yle Sámi rádioođđasiin lea ain dán beaivve stuorra mearkkašupmi sin eallimis.

Hui dehálaš gullat ođđasiid.

Nuorra ollesolbmuid Sohkaršohkka-prográmma lea njunnošis buot millosamos prográmmain, muhto maiddái njealjádin ii-beroštahti prográmmaid joavkkus. Sullii 16 proseantta vástideaddjiin almmuhii, ahte ii beroš guldalit Sohkaršohka. Dát lea miellagiddevaš, daningo eanetlohku, 56 proseantta olbmuin muiṭalii, ahte Sohkaršohkka lea okta buot millosamos prográmmain sin mielas. Dát nuorra ollesolbmuide jurddašuvvon prográmma orrige juohkimin Yle Sámi rádioprográmmaid guldaleaddjiid buot eanemus.

Maiddái ovdamemarkka dihte musihkkaprográmmat leat olbmuid miela mielde. Lagabui 40 proseantta vástideaddjiin muiṭalii, ahte guldala daid mielas ja dušše guhtta proseantta ii ane daid beroštahti fálaldahkan. Musihkkaprográmmat leamaš bivnnuhat sámerádio guldaleaddjiid gaskkas ovdalge. Sámerádio guldaleaddjit muiṭaledje maiddái Ruohomaa (1995) dutkamušas 1990-logus, ahte buot eanemus sin ilosmahttet musihkkaprográmmat (Ruohomaa 1995: 20).

Miela miel ja beroštahti prográmmat bajábeale guovtti gažaldaga vuodul leat vástideaddjiide maiddái Yle Sámi Dearvva! Tiõrv! Tiervâ! -veaigesátta, arkiivaprográmmat ja davviriikkalaš Buorre iđit Sápmi -sátta. Lea miellagiddevaš, ahte Yle Sámi veaigesátta geasuha olbmuid binná eanet go iđitsáddagat, mat sáddejuvvojít buot bivnnuhamos sáddenágge.

Ođđasiid manjá sápmelaččat leat guldalan árat dutkamušaid mielde mielas erenoamážit vuoiŋjalaš prográmmaid, vaikko daid publikka leamašge válđooasis boarrásot buolva. Rantanen (1971) gávn nahii dutkamušastis 1970-logus, ahte dušše gávcci proseantta sámerádio guldaleaddjiin ii goassige guldalan rohkospgrámmaid (Rantanen 1971: 38). Dás orru dáhpáhuvvan stuorra nuppástus dán beaivái, go dušše gávcci proseantta dán dutkamuša vástideaddjiin guldala rohkospgrámmaid mielas. Vástádusat čájehit, ahte


vuoijŋalaš prográmmain lea gal ain guldaleaddjijoavku, muhto stuorra oassi ii ane daid beroštahti prográmmman. Sullii 75 proseantta vástidii, ahte ii beroš guldalit daid olláge.

Rohkosiid maŋŋá buot uhcimus berošteaddjijoavkkut leat mánáidprográmma Binna Bánnas ja NRK Sámi ja SR Sameradion prográmmain, maid Yle Sápmi sádde kanállastis.

4.1.3 Guldaleami sivat ja mearkkašumit

Ohcen sámegielat rádio guldaleami mearkkašumiid dutkamušastan earret eará jeäramiin olbmuin, manin sii guldalit Yle Sámi rádiofálaldaga. Fállen vástideaddjiide njeallje gárves vástádusmolssaeavttu: 1) Hálidan gullat sámi ságaid, 2) Hálidan gullat sámegiela, 3) Hálidan gullat sámemusihka ja 4) Mannu eará siva dihte. Vástideaddjis lei vejolašvuhta válljet máŋga molssaeavttu, ja dan dihte vástádusaid oktiirehkenastojuvvon proseantalohku lea stuorát go čuohte proseantta. Vástideaddji sahtii maiddái čálalaččat dievasmahttit vástádusas dahje čilget, mat leat eará sivat guldalit sámerádio.

Masá buohkat, 86 proseantta vástideaddjiin, muitaledje, ahte guldalit Yle Sámi rádioprográmmaid sámi ságaid dihte. Golbma njealjátoase olbmuin, 76 proseantta, guldala maiddái sámegiela dihte. Masá 70 proseantta vástideaddjiin guldala prográmmaid sámemusihka dihte. Sullii 14 proseantta vástideaddjiin muitalii, ahte guldala Yle Sámi rádioprográmmaid maiddái mannu eará siva dihte.



Govus 9. Sivat guldalit Yle Sámi rádioprográmmaid.

4.1.3.1 Sámi ságat

Čielgasit stuorámus oassi vástideaddjiin, 86 proseantta, guldala Yle Sámi rádioprográmmaid gullandihte sámi ságaid. Dat lea dábalaš vehádatmediaid buohta, mat leat dávjá áidna mediat, mat giedahallet vehádaga áššiid. Vehádagat ožžot unnán, jos oppa ollenge saji váldoservodaga diehtojuohkingaskaomiin. Jos váldomedia fas giedahallá etnalaš vehádagaid áššiid, dahkkojuvvo dat dávjá ovttabealagit ja gažaldatvuloš temáiguin, ovdamearkka dihte dušše váttisvuodaid geahččanguovllus. (Alia & Bull 2005: 91; Pietikäinen 2006: 220–221.) Maiddái sápmelaš doaimmaheaddjit oaivvildit, ahte váldomedia giedahallá sámeáššiid dávjá váilevaččat, ovttabealagit ja negatiiva vuoinjas. (Pietikäinen 2008b: 204–205). Dat ovttas váldomedia jaskatvuodain sámiid áššiin sáhttá čuohcat erenoamážit sámeguovllu olggobealde ássi sápmelaččaide, geaid árgabeaivvis sámeáššit, -giella ja -kultuvra sáhttet muđuige gullot ja oidnot unnán. Dán okta vástideaddji namuhiige rabas vástádusastis sivvan guldalit sámerádio.

Orron máddin ja in gullan sámegiela olus eará sajiin go rádioprográmmain. Sohkaršohkka šattai hui dehálaš. Dan bokte bessen gullat sámegiela, sámemusihka ja ságaid das, mii Sámis dáhpáhuvvá.

Rádios leamašan čađa áiggiid dehálaš rolla sámi ságaid muitaleaddjin. Erenoamáš dehálaš rolla rádios lei sápmelaččaid eallimis 1970-logus, go ceaggánii sámelihkadus, mii váikkuhii sápmelaččaid identitehtaáddejupmái. Rádio nákcií beaktilit juohkit dieđuid áššis ja fállat ságastallanlávddi sámeálbmogii. Sámerádio čuovui servodaga dáhpáhusaid ja muitalii dain sámeálbmogii dan iežas geahččanguovllus. (Lehtola 2001: 48.) Rantanen (1971) dutkamuša mielde sápmelaččat atne daid áiggiid buot buoremus diehtogáldun rádio. Dutkamuša vástideaddjiin badjel bealli lei dan oaivilis. (Rantanen 1971: 31.) Maiddái Sara (2007) buvtii ovdan badjelaš logi jagi dassái, ahte Yle Sámi journalisttaid mielas rádio lea áidna kanála, mii bastá muitalit sápmelaččaid áššiin buorre vuoinjjas (Sara 2007: 74). Sivva dasa, manin aiddo rádios buot eará mediaid ektui lea sápmelaččaide ain dán beaivve nu stuorra mearkkašupmi sin iežaset guoski ságaid gieđahallin, ii čielgan dán dutkamušas.

Dutkamuša rabas gažaldagain vástideaddjit bukte ovdan, ahte sidjiide lea dehálaš beassat gullat sámerádios sámi olbmuid, ovdamearkka dihte dábálaš, oahpes olbmuid muitalusaid ja oainnuid áššiin. Diehtojuohkingaskaomiid okta buorre beliin leage daid vejolašvuhta ovdanbuktit ođđa fáttáid, oaiviilid ja hálliid – ja dat orru erenoamáš dehálaš Yle Sámi rádio guldaleaddjiide (Pietikäinen 2002: 253). Dat, ahte olbmuide lea nu dehálaš gullat sámi ságaid aiddo fal sápmelaččaid njálmmis, sáhttá leat čuovvumuš maiddái das, go váldomediat jearahallet etnalaš vehádagaid guoski áššiin dávjá vuosttamužžan earáid go vehádagaid. Pietikäinen nákkosgirjedutkamuš (2002) čájehii, ahte Helsingin Sanomat -aviisa siterii sámfáttát ođđasiin váldoálbmoga ovddasteaddjiid sániid guovtte geardde eanet go sápmelaččaid. Dákkár láhttemiin media muitala, ahte eiseválddit leat sápmelaččaid áššiid luohttehahhti áššedovdit go fas sápmelaččat eai dohkke kommenteret iežaset áššiid. (Pietikäinen 2002: 246.)

Dat, ahte masá buot vástideaddjiide okta sivva guldalit Yle Sámi rádio leat sámi ságat, muitala sápmelaččaid iežas media dárbbashašvuodás. Iežas media bokte vehádat sáhttá loktet ovdan áššiid, mat dasa leat dehálaččat ja fállat positiiva mediagovaid álbmogis

dan iežas eavttuiguin, vugiiguin ja sániiguin (Matsaganis ja earát 2011: 76–77; Pietikäinen 2006: 220–221.) Dasa Yle Sápmi maiddái viggá, leahan doaimmahusa dovdocealkkage ”Sámi jietna” (Yle Sápmi 2018a). Dat, ahte Yle Sápmi giedahallá rádioprográmmainis sámi ságaid namalassii sámi jienain, orru leamen olbmuide okta buot dehálamos sivain guldalit daid.

*Dehálaš iežas servodaga dieđihankanála, iežas servodaga
geahččanguovllus.*

4.1.3.2 Sámigiella

Stuorra oassi västideaddjiin, 76 proseantta, muiṭalii, ahte guldala Yle Sámi rádioprográmmaid sámigiela dihte. Lea dábálaš, ahte etnalaš mediat dahket journalistalaš sisdoaluid lassin maiddái giellabarggu (Skön & Torkkola 1997: 153). Yle Sámi doaimmahus ieš oaidná, ahte dán barggus rádios lea áibbas erenoamáš rolla: dat lea sámemedia dehálamos giellaealáskahettinbargoneavvu. Rádio lea dehálaš erenoamážit njálmmálaš giela ja suopmaniid gáhtten- ja ealáskahettinbarggus. Árbevirolaš giela seailluheami lassin Yle Sápmi viggá goittotge maiddái dievasmahttit sámigiela dálá beaivvi dárbbuide. (Yle Sápmi 2018a.) Vehádatmediat leatge dávjá servodahkii dehálaš kultuvrralaš resursa, mat sihke gáhttejít giela, oahpahit dan ođđa buolvvaide ja viiddidit dan ođđa geavahanoktavuođaide (Dufva & Pietikäinen 2005: 18).

Sámeeatnamis, gos sámeálbmot ássá biedgguid viiddis guovllus, iežasgielat medias lea erenoamáš stuorra mearkkašupmi (Dufva & Pietikäinen 2005: 18). Daningo sámigiella gullo unnán ovdamearkka dihte davviriikkalaš tv-fálaldagain, lea rádios stuorra mearkkašupmi Sámi mediagiettis (Länsman 1987: 4). Dasa lassin, ahte sámerádio lea okta daid hárve njálmmálaš dieđihangaskaomiin, sáhttá dat leat erenoamážit máŋgga sámeguovllu olggobéalde ássi sápmelažžii maiddái okta daid hárve vejolašvuodain oppalohkái gullat sámigiela. Yle Sámi rádios leage dutkamuša rabas vástádusaid vuodul erenoamáš mearkkašupmi sámegielat birrasa huksejeaddjin.

Háliidan lasihit ruovttu sámegielat birrasa. Háliidan deavdit ruovttu sámegielain.

Áidna kanála, gos gulai sámegiela, go ledjen studereme. Sámerádio lei golli, ii lean oktage geainna sámastit.

Sámeguovllu olggobealde mearkkašupmi lea sturron, go in šat muđuid gula sámegiela iežan árgabeivviid.

Stáhtaid assimilerenpolitihka dihte sámegiella ii leat sirdašuvvan eatnigiellan buot sápmelaččaide – ja sámegielat media okta dehálamos bargguin leage ealáskahttit sámegiela sin gaskkas (Sara 2007: 67). Máñggat vástideaddjit muitaledje rabas vástádusain, ahte guldalit sámerádio aiddo fal dan siva dihte.

Guldalan vuoi oahpan giela.

Hui dehálaš reaidu, go oahpahallen sámegiela.

Giela oahppamis ja giellamáhtu doalaheames leamaš ávki.

Sámemedia bastá buoremus dilis gáhttet ja ovddidit maiddái sámemánáid ja -nuoraid giela (Sara 2007: 68). Dasa guorrasit maiddái mu dutkamuša vástideaddjit.

Hálidivččen, ahte mánát gulašedje juobe vehá sámegiela gávpotbirrasis.

Giellalávggodan mánáidan.

Sámerádios lea goittotge giellabarggus maiddái stuorra ovddasvástádus. Jos rádios geavahuvvo heajos sámegiella, njoammu dat ovddosguvlui seammaláhkai go buorrege giella (Sara 2007: 60). Sámerádio guldaleaddjit leatge árat dutkamušain cuiggodan sámegiela dási. Ruohomaa (1995) dutkamušas 1990-logus muhtun guldaleaddjit muitaledje hárdašuvvat sámerádio doaimmaheaddjiid eahpečielga hállangielas ja earálágan suopmaniin (Ruohomaa 1995: 20). Logi jagi dan maijyá Sara (2007) goittotge gávnkahii, ahte sámerádio lea njeaidán áiddiid sámegielaid ja -suopmaniid gaskkas, go lea muitalan dain ja addán daidda jiena (Sara 2007: 55). Dán seammá, áiddiid njeaidášuvvama iešguđetlágan giella- ja suopmanrájáid gaskkas, čájehit maiddái mu dutkamuša vástádusat. Máñggat vástideaddjit bukte rabas vástádusaineaset ovdan, ahte

leat iešgudet sámegielat rádioprográmmaid ánssus oahppan nuppi sámegiela dahje suopmana.

Ohppen áddet anárašgiela ja nuortalašgiela.

Mu mielas lea giela ja suopmaniid dihte dehálaš guldalit sámerádio.

Go guldalin rádio de ohppen vehážiid mielde áddet maiddái davvisámeigela eanet, ja mađi eanet áddejin de dađi eanet hálidin guldalit maiddái davvisámegielat prográmmmaid.

Yle Sámi rádios lea giellamáhtu lassin váikkuhus maiddái olbmuid gielladoaladumiide. Sara (2007) oaidná Yle Sámi Rádio lokten erenoamážit davvisámeigela stáhtusa riikkaid assemilerenpolitihka máŋjá. Go sámegiella gullogodđii maiddái virggálaš oktavuođain, šattai dat vuot vehážiid mielde dohkálaš giellan sápmelaččaid čalmmiin. (Sara 2007: 63.) Dás guorrasit maiddái máŋggat mu dutkamuša vástideaddjit. Máŋgasat bukte vástádusaineaset ovdan, ahte sámegiela gullon rádios lea lokten dan árvvu sin čalmmiin eallima áigge.

Dovdu, ahte sámegiella lea maid albma giella, go gullo rádios maid.

Sámegiela gullomis rádios lea mearkkašupmi giela árvui.

Sámemedia fálaldagat čájehit sámeálbmogii, ahte dan unna ja áitatvuloš sámegielat leat ealli árgagielat, eai dušše beare matnu dološ kulturárbbit (Skön & Torkkola 1997: 11). Dás orru leamen stuorra mearkkašupmi erenoamážit dán áigge sámemánáide ja -nuoraide, geaidda lea unnán sámegielat fálaldat. Lea dehálaš, ahte sámemánát ja -nuorat besset gullat sámegiela addo fal seammalágan oktavuođain go válđoálbmoga mánát ja nuorat gullet iežaset giela. Sámegiela gullan rádios sáhttá čájehit mánáide ja nuoraide, ahte sii eai leat okto gielain ja ná nanosmahttit sin sámeidentitehta (Sara 2007: 67–68.) Nuorra vástideaddjit giitalitge sámeradio hárvenaš eatnigielat fálaldagas.

Sohkaršohkka lea fállan iežasgielat nuoraikultuvrra.

4.1.3.3 Sámemusihkka

Lagabui 70 proseantta vástideaddjiin guldala Yle Sámi rádioprográmmaid sámemusihka dihte. Dát lea stuorra proseantalohku dan ektui, ahte dušše sullii 40 proseantta anii musihkkaprográmmaid miela miel prográmmán árat gažaldaga buohta. Dat, ahte erenoamáš musihkkaprográmmat, main čuojahuvvo dušše beare musihkka, eai leat vástideaddjiide dat millosamos fálaldat, ii oro dárkuheamen, ahte guldaleaddjit eai anášii musihkka dehálaš oassin Yle Sámi rádiofálaldagas. Dilli lea justa nuppe gežiid.

Máŋggat vástideaddjit muitaledje rabas vástádusaineaset, ahte Yle Sámi rádiomusihkas leamašan stuorra rolla sin mánná- ja nuorruvuodás, goas sámemusihka ii beassan jur eará sajiin gullat.

Musihkka gullui doppe, ii dan gávdnan gávppiin.

Muittán, go mii láviimet riŋget ja sávvat musihka, dat lei hui suohtas ja aniimet dan hui alla árvvus.

Rádios ohppen gullat sámemusihka ja liikot dasa.

Dán beaivve, go sámemusihka lea vejolaš guldalit máŋgga earáge sajis go rádios, sahtášii dili gáddit rievdan. Dat, ahte sullii 70 proseantta vástideaddjiin hálida ain guldalit Yle Sámi rádio aiddo fal sámemusihka dihte, muitala dan dehálaš sajis rádiosisdoaluin. Dasa eai leat bastán dálá áiggi ođđa musihkkabálvalusatge váikkuhit.

Historjás dušše Ruohomaa (1992) leamaš beroštuvvan dutkat rádiomusihka mearkkašumi sápmelaš guldaleaddjiide, danoingo lea oaivvildan, ahte rádiomusihka lea dehálaš ovddidit sápmelaččaid oainnuid vuodul. Jagi 1992 dutkamuša mielde badjelaš bealli vástideaddjiin lei duđavaš Yle Sámi Rádio musihkkasisdollui. Árbevirolaš juigosiid oassi goit ságastahtii olbmuid. Lagabui bealli vástideaddjiin lei duđavaš luđiid oassái musihkkafálaldagas, muhto eandalitge boarrásot guldaleaddjit eai livčče suovvan luodi čuodjat rádios. (Ruohomaa 1992: 22.) Áiggit orrot goitge dánge ektui rievdan, eaige guldaleaddjit oainne luodi čuojaheami rádios šat váttisvuohstan – goittotge oktage mu dutkamuša vástideaddjiin ii lokten dan vástádusain ovdan. Dan sajis mángasat

muitaledje rabas vástádusaineaset, ahte luohti oassin Yle Sámi rádio musihkkafálaldagas lea sin mielas dušše beare buorre ášši.

Somá gullat boares luđiid.

Mun lean álo guldalan rádio ruovttus, dan bakte lean oahppan luđiid ja lávlagiid.

4.1.3.4 Identitehta ja oktiigullevašvuhta

Dutkamušan vástideaddjit loktejedje ovddabealde mánnašuvvon guldalansivaid lassin rabas vástádusaineaset ovdan maiddái fámolaš dovdduid, maid sámerádio guldaleapmi sis bohciidahttá, ja mat leat okta sivva guldalit sámerádio.

Sámemedia sáhttá fámuidahttit sihke ovttaskas sápmelačča, muhto maiddái olles sámeálbmoga. Vehádatmedia sáhttá láhčit saji vehágaga iežas oainnuide, mat eai vealttakeahttá muđui beasašii gullošii. Maiddái dat, ahte vehádatmedia oppalohkái lea, sáhttá fámuidahttit, danoingo dat lea mearka maiddái das, ahte searvvuš lea. (Pietikäinen 2006: 215–216, 232.) Sátni *fámuidahtti* loktaniige ovdan máŋgga vástideaddji rabas vástádusain. Oktage vástideaddji ii čilgen, mas fámuidahtti ja identitehta nannejeaddji dovdu sámerádio sáddagiid gultalettiin dárkilit boahtá, muhto dat orru leamen máŋgasii dehálaš ášši sámi identitehta dáfus.

Stuorra mearkkašupmi identitehtii, fámuidahtti.

Dehálaš iežan gillii ja identitehtii gávpogis ásadettiin.

Yle Sámi Rádios leamaš čađa áiggiid dehálaš rolla sámeservoša huksemis ja nanosmahttimis. Sámerádio lea sihke nannen ja lasihan sápmelaččaid áddejumi oktiigullevašvuđas, das, ahte sápmelaččat njealji riikkas leat okta álbmot. Seammás dat lea deattuhan sápmelaččaid ja málmmi eará álgoálbmogiid seammaláganvuđa ja earuhan *min earáin*. (Reiniharju 2015: 53, 65; Sara 2007: 56.) Dutkamušat leat čájehan, ahte jo datge, ahte vehádatguldaleaddjit dihtet maiddái eará vehádahkii gullevaš olbmuid guldalit seamma rádiosáddaga, sáhttá nanosmahttit daid olbmuid


identifikašuvnna nuppiidasaset (Matsaganis ja earát 2011: 78). Sámegielat rádiosáddaga guldaleapmi sáhttá nannet guldaleaddjiin dovddu iežas joavkkus, *mis* (Skön & Torkkola 1997: 153.) Mánggat vástideaddjit atnege dán oktiigullevašvuoda dovddu lihkkama oktan dehálaš áššin sámerádio guldaleamis. Okta vástideaddji govvida sámerádio mearkkašumi alcces guvttiin sániin.

Sámevuoiŋja ja oktiigullevašvuohta.

4.1.4 Guldalmeahttunvuohta

Dutkamuša vástideaddjiin njeallje proseantta muitalii, ahte ii guldal Yle Sámi rádioprográmmaid goassige. Gažadeamis jerrojuvvuige, mii dasa lea sivvan. Fálle gávcci vástdusmolssaeavttu: 1) In beroš gullat sámi ságaid, 2) In beroš gullat sámegiela, 3) In beroš gullat sámemusihka, 4) Doaimmaheaddjiid dihte, 5) Prográmmagiela dihte, 6) Prográmmafálaldaga dihte, 7) Musihkkafálaldaga dihte ja 8) Mannu eará siva dihte. Vástideaddjis lei vejolašvuohta válljet máŋga molssaeavttu, ja juohke molssaeavttu buohta sus lei vel vejolašvuohta čilget čálalaččat, manin nu lea.

Lagabui 60 proseantta vástideaddjiin muitalii, ahte sivva sin guldalmeahttunvuhtii lea miinu eará go gárves vástdusmolssaeavttuin logahallojuvvon áššit. Lagabui goalmmádas vástideaddjiin muitalii, ahte ii guldal Yle Sámi rádioprográmmaid váilevaš sámegielmahtu dihte. Sullii 14 proseantta vástideaddjiin ii guldal sámerádio, go ii leat beroštuvvan sámi ságain. Čielggai, ahte Yle Sámi rádioprográmmaid sisdoallu ii lean ovttage dáhpáhusas sivvan leat guldalkeahttá sámerádio.



Govus 10. Sivat leat guldalkeahttá Yle Sámi rádioprográmmaid.

Dan 57 proseanttas, geat vástidedje, ahte eai guldal Yle Sámi rádioprográmmaid mannu eará siva dihte, namuhedje buohkat sivvan teknihkalaš áššiid: Yle Sápmi ii gullo FM-rádion Roavvenjárgga máttabealde. Vástideaddjit atne rádio guldaleami ovdamearkka dihte telefovna dahje neahhtarádio bokte hástaleaddjin, eaige dan dihte gártta guldalit Yle Sámi rádioprográmmaid dálá dilis.

Munnje ii leat nu oahpis guldalit rádio telefovna bokte, inge dan dihte guldal.

Mus ii leat rusttet, mainna guldalit rádio.

Guldalan daid, mat Oulus gullojut biillas.


Dasa lassin vástideaddjit bukte ovdan, ahte sis ii leat dálá eallindilis áigi ja sadji sámerádioi. Dát dieđut sulastahttet Erja Ruohomaa (2003) dutkamuša dieđuid 2000-logu álggus. Berošmeahttun guldaleaddjit, geain ii leat jur makkárge gaskavuohta rádioin, muitaledje Ruohomaa dutkamušas, ahte sii leat gal láven guldalit rádio eanet, muhto mánggalágan sivaid geažil rádios ii leat sadji sin eallimis justa dál. (Ruohomaa 2003: 230.) Dán hástalusa govve maiddái okta mu dutkamuša vástideaddjiin rabas vástádusastis.

Otná beavve rusttegiiguin livččii hui álki guldalit eanet, muhto dat diibmu ii atte árpu.

4.1.5 Duđavašvuhta ja sávaldagat

Gažadeamis jerrojuvvui, leatgo vástideaddjit duđavaččat Yle Sámi rádioprográmmaide. Fállen golbma gárvves vástádusmolssaeavttu: 1) Lean, 2) In leat ja 3) In máhte dadjat.

Badjelaš 40 proseantta olbmuin vástidii, ahte ii máhte dadjat, leago duđavaš prográmmaide. Yle Sámi rádiofálaldahkii leat duđavaččat 40 proseantta ja duhtameahttumat lagabui 20 proseantta vástideaddjiin.



Govus 11. Duđavašvuhta Yle Sámi rádioprográmmaide.

Seammasullasaš bohtosat leat oččojuvvon Yle Sámi rádioguldaleaddjiid duđavasvuodas áratge. Länsman gávnnahii 1980-logus, ahte sámerádio prográmmat ledje miellagiddevaččat badjelaš 40 proseantta mielas ja unnit miellagiddevaččat nuppi 40 prosentii (Länsman 1987: 15–17). Dat seamma 40 proseantta lea duđavaš sámerádio

fálaldagaide dálge, muhto duhtameahttumiid oassi lea unnon beliin, go stuorra oassi vástideaddjiin ii riekta máhte meroštallat duðavašvuodas.

Duðavaš vástideaddjiin stuorra oassi lea duðavaš rádioprográmmaid ságaid sisdollui, dat ledje sin mielas earret eará buorit, máŋggabealagat, miellagiddevaččat ja áigeguovdilat. Duðavaš vástideaddjit muitaledje rabas vástádusaineaset leat duðavaččat maiddái earret eará Sohkaršohkkii, rádioodđasiidda, arkiivaprográmmade, sámegiela mearrái ja dássái, musihkkafálaldahkii, rádiobargiide, máŋggasámegielat sáddagiidda ja dasa, ahte buot golbma sámegiela vuoruhuvvojít dássálágaid.

Duhtameahttun vástideaddjiinges stuorra oassi loktii rabas vástádusain ovdan duhtameahttunvuoda máŋggasámegielat sáddagiidda. Nubbin stuorámus duhtameahttunvuhta vástideaddjiid gaskkas lei sámerádio journalismma dássái. Ovttaskas duhtameahttun vástideaddjit oaivvildedje maiddái earret eará, ahte sámerádios lea heajos sámegiella, váldogielat gulloit menddo olu, anáraš- ja nuortalašgiella gulloit menddo unnán, rohkosbottut leat menddo olu, ášše- ja nuoraidprográmmat leat menddo unnán, rádiooddasat ja davviriikkalaš sáddagat eai leat buorit ja ságat eai leat dássidit guovlluid mielde.

Vástideaddjiid duhtameahttunvuhta dihto áššiide speadjalastá maiddái njuolga sin sávaldagaide. Gažadeamis jerrojuvvui rabas gažaldagain, makkár sávaldagat vástideaddjiin leat Yle Sámi rádifoalaldagaid ektui, ovdamemarkka dihte sáddenáiggiid, giela, musihka ja fálaldagaid sisdoaluid dáfus. Juohke fáttás ii nuppiid sániiguin jerrojuvvon sierra, muhto vástideaddji beasai baicce čállit iežas sániiguin sávaldagaid áššiin, mat sus ledje bajimužžan mielas.

Sisdoalu ektui čielgasit stuorámus vástideaddjimearri váillahii Yle Sámi rádios eanet áššeprográmmaid ja iešguđetlágan fáttáid čiekŋalis gieđahallamiid (17 vástádusa). Nubbin eanemus olbmot váillahedje sámerádios nuoraidfálaldaga (6), eanet boares arkiivaságaid (5), kultur- (4), musihkka- (4) ja ságastallanprográmmaid (3) ja mánáidfálaldaga (3). Guovlluid ektui máŋga vástideaddji loktejedje ovdan, ahte ságat

galggašedje leat dássebealádabbot miehtá Sámi (6) ja eanet maiddái gávpotguovlluin (3).

Sáddenáiggiid ektui máŋga vástideaddji sávve sámerádios eanet prográmma eahkedii (9 vástádusa), muhto oasáš maiddái sávai, ahte sáddagat álggašedje árabut iđđes (4). Moadde vástideaddji sávve, ahte Yle Sámi iežas guhkes iđitsátta máhcahuvvošii davviriikkalaš sáddaga sadjái (2). Máŋga vástideaddji sávve sámegielat rádioprográmma olles beaivái (4).

Maiddái sámerádio sáddagiid giellapolitikhka loktanii ovdan sávaldagain. Máŋga vástideaddji gaibidedje sámerádios juohke sámegillii eanet iežas ovtagielat sáddagiid (9 vástádusa), muhto oassi vuot váillahii máŋggasámegielat rádioprográmmaid (4). Oassi vástideaddjiin loktii sávaldagaid jearadettiin ovdan sámerádios gullojeaddji giela dási. Sii sávve gullat Yle Sámi rádios buoret sámegiela (3).

4.2 Agi, sohkabeali, eatnigiela ja ruoktoguovllu váikkuhus guldaleapmái

Gieđahalan dán logus vástideaddji agi, sohkabeali, eatnigiela ja ruoktoguovllu váikkuhusa dasa, man ollu son guldala Yle Sámi rádioprográmmaid, maid prográmmaide son berošta ja mii lea stuorámus sivva guldaleapmái.

Sohkabeliin veardádalan dán logus dušše nissoniid ja albmáid gaskasaš erohusaid eará sohkabeliid unna vástideaddjimeari dihte. Ahkeluohkáin veardádalan 20–29-, 40–49- ja 70–79-jahkásaččaid vástádusaid. Giellajoavkkuin veardádalan suomagielagiid, davvisámegielagiid/davvisáme-suomagielagiid, nuortalašgielagiid/nuortalaš-suomagielagiid ja anárašgielagiid/anáraš-suomagielagiid. Ruoktoguovlluin veardádalan Anára, Eanodaga, Ohcejoga, Soađegili, Roavvenjárgga ja Roavvenjárgga máttabeale guovllu. Lean válljen joavkkuid veardádallamii nu, ahte dat ovddastit viidát iešguđetlágan vástideaddjiid, muhto maiddái vástideaddjimeari vuodul vuoi bohtosiid sahttá jurddašit vástidit stuorát joavkku oainnuid.


4.2.1 Guldalanmearit

Gažadeamis jerrojuvvui, guldalitgo vástideaddjit Yle Sámi rádioprográmmaid dálá dilis. Vástádusmolssaeavttut ledje: 1) Guldalan álo, 2) Guldalan dávjá, 3) Guldalan duollet dálle, 4) Guldalan hárve ja 5) In guldal goassige.

Ahkeluohkáid ektui čalbmái čuohcá dat, ahte álo Yle Sámi rádioprográmmaid muitaledje guldalit dušše 70–79-jahkásaš vástideaddjit. Dávjá rádio guldaledje čielgasit eanemus 70–79-jahkásačcat, de 20–29-jahkásačcat ja goalmádin 40–49-jahkásačcat. Duollet dálle rádio guldaledje eanemus 20–29-jahkásačcat, de 40–49-jahkásačcat ja goalmádin 70–79-jahkásačcat. Hárve rádio muitaledje guldalit čielgasit eanemus 40–49-jahkásačcat, de 20–29-jahkásačcat ja dušše oasáš 70–79-jahkásačcain. 20–29-jahkásačcat ledje dán golmmas áidna joavku, man vástideaddjiin oassi ii guldal sámerádio goassige.


Berošteaddji guldaleaddjit, geat guldalit sámerádio jogo álo dahje dávjá, leat dáid ahkeluohkáin čielgasit eanemus 70–79-jahkásačcain, geain sullii bealli guldala rádio višsalit ja jeavddalačcat. Nubbin eanemus berošteaddji guldaleaddjit leat 20–29-jahkásačcain ja goalmádin 40–49-jahkásačcain. Válljejeaddji guldaleaddjit leat buot eanemus 20–29-jahkásačcain, geain badjel bealli guldala rádio dušše duollet dálle. Masá seamma stuorra oassi válljejeaddji guldaleaddjit leat 40–49-jahkásačcain ja unnimus 70–79-jahkásačcain. Berošmeahttun guldaleaddjit, geat guldalit rádio jogo hárve dahje eai goassige, leat čielgasit eanemus 40–49-jahkásačcain, geain sullii 40 proseantta vástidii guldalit sámerádio hárve. Nubbin eanemus berošmeahttun guldaleaddjit leat 20–29-jahkásačcain ja unnimus 70–79-jahkásačcain.

Vuorrasot olbmot orrot leamen čielgasit stuorát sámerádioberošteaddjit go nuorra ollesolbmot, muhto nuorra ollesolbmot guldalit sámerádio višsalabbot go gaskaagi olbmot.



Govus 12. Yle Sámi rádioprográmmaid guldalanmearit ahkeluohkáiid mielde.


Guldaleaddji sohkabealis dan sadjái ii oro leamen stuorra váikkuhus guldaleami mearrái. Almmáiolbmot guldalit sámerádio muhtun veardde eanet álo go nissonolbmot, muhto nissonolbmuin fas stuorát oassi guldala rádio dávjá. Nissonolbmuin leat eanet rádioberošteaddjit ja almmáiolbmuinges eanet berošmeahttun guldaleaddjit. Guldalanmearit goit juohkašuvvet oalle dássálágaid.



Govus 13. Yle Sámi rádioprográmmaid guldalanmearit sohkabeliid mielde.

Vástideaddji eatnigielas lea čielga váikkuhus guldalanmearrái. Buot veardádallamii válljejuvvon giellajoavkkuin sullii njealjádas guldala Yle Sámi rádioprográmmaid dávjá, das eai leat čielga erohusat. Dan sadjái álo sámerádio guldala dušše oasáš davvisáme- ja suomagielat vástideaddjiin. Oppalohkái berošteaddji guldaleaddjiid mearri lea goit sullii seamma dáid giellajoavkkuin.

Berošmeahttun guldaleaddjit, geat guldalit sámerádio jogo hárve dahje eai goassige, leat eanemus nuortalašgieliagiin, de suomagielagiin ja goalmmádin davvisámegielagiin, muhto erohusat dáid giellajoavkkuid gaskkas leat hui unnit. Dan sadjái anárašgieliagiin lea čielgasit unnimus berošmeahttun guldaleaddjiid joavku. Anárašgielat vástideaddjiid ektui lea miellagiddevaš gávnus maiddái dat, ahte sis stuorámus oassi, lagabui 70 proseantta, leat válljejeaddji guldaleaddjit, go eará giellajoavkkuin válljejeaddji guldaleaddjit gokčet vuollái beali vástideaddjiin. Sámerádio juksá goit mannu muddui buot anáraš- ja nuortalašgielat vástideaddjiid, go fas davvisáme- ja suomagielagiin leat olbmot, geaid sámerádio ii olat goassige.




Govus 14. Yle Sámi rádioprográmmaid guldalanmearit giellajoavkkuid mielde.

Maiddái ruoktoguovlluid ektui guldalanmearit leat oalle seammaláganat, muhto erohusatge gávdnojít. Sámerádio viššalamos guldaleaddjit, geat guldalit dan álo,

gávdnojedje dán dutkamušas dušše Anáris ja Ohcejogas. Rádioberošteaddjit, geat guldalit sámerádio jogo dávjá dahje álo, leat goittotge čielgasit eanemus Roavvenjárggas, nubbin Ohcejogas, goalmádin Anáris, njealjádin Soađegilis, viđádin Roavvenjárgga máttabealde ja guđádin Eanodagas. Válljejeaddji guldaleaddjit leat čielgasit eanemus Eanodagas, ja dan manjá Roavvenjárggas, Soađegilis, Anáris, Roavvenjárgga máttabealde ja Ohcejogas. Berošmeahttun guldaleaddjit, geat guldalit sámerádio jogo hárve dahje eai goassige, leat eanemus Roavvenjárgga máttabealde, de Soađegilis, Anáris, Ohcejogas ja Eanodagas. Roavvenjárggas ii lean oktage berošmeahttun vástideaddji. Sámerádio juksá goit mannu muddui buot ohcejohkalaš, soađegililaš ja roavvenjárgalaš vástideaddjiid, go fas Anáris, Eanodagas ja Roavvenjárgga máttabealde leat olbmot, geaid sámerádio ii olat goassige.

Dáid dieđuid vuođul sáhttá dulkot, ahte čielgasit viššalamosit sámerádio guldaluvvo Roavvenjárggas ja unnimus Roavvenjárgga máttabealde. Sámeguovllu siste erohusat leat unnit, muhto Ohcejohka lea njunnošis viššalamatos guldaleaddjiid ektui.



Govus 15. Yle Sámi rádioprográmmaid guldalanmearit ruoktuguovlluid mielde.


4.2.2 Miela miel prográmmat

Gažadeamis jerrojuvvui, maid rádioprográmmaid vástideaddjít guldalit buot millosamosit. Vástideaddjis lei vejolašvuhta válljet eanet go ovttá molssaeavttu, man dihte vástádusaid oktiirehkenastojuvvon proseantalohku lea stuorát go čuohte proseantta.

Ahkeluohkáid ektui oasi bohtosiin sáhtii masá árvidit: dihto ahkeluohkáide jurddašuvvon prográmmat olahit eanet addo daid ahkejoavkkuid guldaleaddjiid. Ovdamearkka dihte nuorra ollesolbmuide oaivvilduvvon Sohkaršohkka-prográmma juksá čielgasit buoremusat 20–29-jahkásaččaid, de 40–49-jahkásaččaid, muhto maiddái oasáža 70–79-jahkásaččain.


Nuorra ollesolbmot guldalitge buot millosamosit Sohkaršohka, nubbin millosamosit Dearvva! Tiõrv! Tiervâ! -veaigeoprográmma ja goalmádin rádioodđasiid. Eahpemillosamos prográmmat nuorra ollesolbmuide leat Binna Bánna ja rohkospgrámmat. 40–49-jahkásaččatges guldalit buot millosamosit rádioodđasiid, nubbin davvirikkalaš Buorre iđit Sápmi -sáddaga ja goalmádin dássálágaid Yle Sámi iđit -sáddaga, Dearvva! Tiõrv! Tiervâ! -veaigeoprográmma ja Sohkaršohka. 40–49-jahkásaččat guldalit ahkeluohkáid veardádallamis eanemus Binna Bánna, man jáhkkimis čilge mánnabearrašiid mearri dán ahkeluohkás. 70–79-jahkásaččaide buot millosamos prográmmat leat rádioodđasat ja arkiivaprográmmat. Sii beroštit buot unnimus guldalit Binna Bánna, rohkospgrámmaid ja Sohkaršohka.

Sohkaršohkka juohká čielgasit eanemus guldaleaddjiid agi mielde. Rádioodđasat geasuhit guldaleaddjiid buot ahkeluohkáin, muhto eanemus 40–49-jahkásaččaid, nubbin 70–79-jahkásaččaid ja goalmádin 20–29-jahkásaččaid. Yle Sámi iđitprográmmain lea stuorámus guldaleaddjijoavku 40–49-jahkásaš vástideaddjiin ja veaigeoprográmmain 20–29-jahkásaččain. Mađi boarrásot vástideaddjijoavku, dađi eanet geasuhit arkiivaprográmmat. Dat doaladupmi, ahte rohkospgrámmaid guldala eanet vuorrasot geardi, orru doallamin deaivasa, vaikko dušše oasáš sisge namuha daid miela miel prográmmman.



Govus 16. Yle Sámi millosamos prográmmat ahkeluohkáid mielde.

Guldaleaddji sohkabealli váikkuha muhtun muddui dasa, mat prográmmat adnojuvvoyit millosažžan. Almmáiolbmot leat beroštuvvan earret eará rádioodđasiin, davviriikkalaš Buorre iđit Sápmi -sáddagis ja Sohkaršohkas eanet go nissonolbmot, ja nissonolbmotges leat eanet go almmáiolbmot beroštuvvan ovdamearkka dihte Yle Sámi iđit -sáddagis, Dearvva! Tiörv! Tiervâ! -veaigesáddagis ja musihkkaprográmmain. Vástdusat goit sulastahttet nuppiideaset.




Govus 17. Yle Sámi millosamos prográmmat sohkabeliid mielde.

Guldaleaddji eatnigielas lea čielga váikkuhus dasa, makkár prográmmaid olmmoš atná millosažžan. Ovdamearkka dihte Yle Sámi idit -prográmma beroštahttá buot eanemus davvisámegielagiid ja unnimus nuortalašgielagiid. Maiddái davviriikkalaš Buorre idit Sápmi -iđitsátta lea čielgasit millosut prográmma davvisámegielagiidda go suomagielagiidda, nuortalašgielagiidda ja anárašgielagiidda. Davviriikkalaš sáddagat orrot muđuige leamen eanet miela miel davvisámegielagiidda go suomagielagiidda, ja buot uhcimus dain beroštit anárašgielagat. NRK Sámi ja SR Sameradion sáddagiid Yle Sámi kanálas álgoeahkediid ja eahkediid guldalit čielgasit millosamosit davvisámegielagat, de suomagielagat ja oasaš nuortalašgielagiin. Anárašgielat vástideaddjiin ii oktage atnán dáid prográmmaid millosažžan alcce.

Yle Sámi iežas Dearvva! Tiõrv! Tiervâ! -veaigesátta lea millosamos prográmma anárašgielagiidda, de nuortalašgielagiidda, goalmmádin suomagielagiidda ja buot unnimus dat beroštahttá davvisámegielagiid.

Rádioodđasat beroštahttet buot eanemus davvisámegielagiid, nubbin anárašgielagiid, goalmmádin nuortalašgielagiid ja unnimus suomagielagiid. Arkiivaprográmmat leat millosat erenoamážit nuortalašgielagiidda, de suomagielagiidda, goalmmádin davvisámegielagiidda ja njealjádin anárašgielagiidda. Rohkosprográmmat beroštahttet dušše oasáža davvisáme- ja suomagielat vástideaddjiin.

Musihkkaprográmmat geasuhit eanemus davvisámegielagiid, oalle dássálágaid anáraš- ja suomagielagiid ja čielgasit unnimus nuortalašgielagiid. Sohkaršohkka lea eanemus miela mielde anárašgielagiidda, de suomagielagiidda, davvisámegielagiidda ja čielgasit unnimus das beroštit nuortalašgielagat. Čalbmái čuohcá maiddái dat, ahte Binna Bánna lea čielgasit millosut prográmma anárašgielagiidda go earáide.




Govus 18. Yle Sámi millosamos prográmmat giellajoavkkuid mielde.

Maiddái guldaleaddji ruoktoguovlu váikkuha oaiviidda iešguđet prográmmaid beroštahttuvođas. Ovdamearkka dihte rádioodđasiin beroštit buot eanemus eanodatlaččat, nubbin roavvenjárgalaččat, goalmádin anárlaččat, njealjádin Roavvenjárgga máttabealde ássit, viđádin ohcejohkalaččat ja unnimus soađegililaččat. Rádio iđitprográmmaid ektui eai leat nu stuorra erohusat, muhto Yle Sámi iđit - prográmma beroštahttá eanemus soađegililaččaid ja unnimus eanodatlaččaid. Davviriikkalaš Buorre iđit Sápmi -sátta dan sadjái geasuha eanemus ohcejohkalaččaid ja masá seamma veardde soađegililaččaid, ja unnimus Roavvenjárgga máttabealde ássiid. Dearvva! Tiõrv! Tiervâ! -veaigesáttá beroštahttá eanemus Anáris ja unnimus Ohcejogas. NRK Sámi ja SR Sameradion prográmmaid Yle Sámi kanálas álgoeahkediid ja eahkediid guldalit buot millosamosit eanodatlaččat ja unnimus Roavvenjárgga máttabealde ássit.

Arkiivaprográmmaide lea stuorámus beroštupmi Anáris ja Soađegilis ja unnimus Roavvenjárggas. Rohkosprográmmat leat millosamosat roavvenjárgalaččaide ja Roavvenjárgga máttabealde ássiide ja eahpemilosamosat soađegililaččaide, geain oktage ii atnán daid miela miel prográmmman. Sohkaršohkka beroštahttá juohke guovllus, muhto eanemus Anáris ja unnimus Ohcejogas. Musihkkaprográmmat geasuhit

eanemus soađegililaččaid ja unnimus roavvenjárgalaččaid. Binna Bánna ektui čalbmái čuohcá dat, ahte oktage ohcejohkalaš ii ane dan miela miel prográmmman. Binna Bánna lea millosamos eanodatlaččaide.



Govus 19. Yle Sámi millosamos prográmmat ruoktoguovlluid mielde.


4.2.3 Guldalansivat

Gažadeamis jerrojuvvui maiddái, manin vástideaddjit guldalit Yle Sámi rádiofálaldaga. Fällen vástideaddjiide njeallje gárvves vástádusmolssaeavttu: 1) Hálidan gullat sámi ságaid, 2) Hálidan gullat sámegiela, 3) Hálidan gullat sámemusihka ja 4) Mannu eará siva dihte. Vástideaddjis lei vejolašvuhta válljet máŋga molssaeavttu ja dan dihte vástádusaid oktiirehkenastojuvvon proseantalohku lea stuorát go čuohte proseantta. Vástideaddji sahtii maiddái čilget vástádusaidis dárkkilabbot rabas kássii. In goit giedahala rabas vástádusaid dán logus, daningo dat leat dušše ovttaskasat ja juohkásit eahpedássidit olmmošjoavkkuid gaskkas.

Sámi ságaid gullan lea buot dehálamos sámerádio guldalansivva juohke veardádallamii válljejuvvon golmma ahkeluohkkái. Čielgasit eanemus sámi ságaid dihte guldalit 40–


49-jahkášaš vástideaddjit, de 20–29-jahkášaččat ja goalmádin 70–79-jahkášaččat. Sámegiela dihte guldaleaddjit leat eanemus 20–29-jahkášaččain, de 40–49-jahkášaččain ja unnimus 70–79-jahkášaččain. Sámémusihkka dan sadjái lea sivva guldalit sámerádio dávjjimusat 40–49-jahkášaččain, de 20–29-jahkášaččain ja čielgasit uhcimus musihka dihte guldalit 70–79-jahkášaččat.

Oppalohkái sihke 20–29- ja 40–49-jahkášaš guldaleaddjiide ságaid, giela ja musihka gullan leat buot oalle dásseveardášaš sivat guldalit Yle Sámi rádio sáddagiid, go 70–79-jahkášaččat fas guldalit sámerádio buot ovddemustá ságaid, muhtun veardde giela ja unnán musihka dihte.




Govus 20. Sivat guldalit Yle Sámi rádioprográmmaid ahkeluohkáid mielde.

Sohkabeliid erohusaid geahčadettiin oaidná, ahte nissonolbmot guldalit Yle Sámi rádio dássálágaid sihke sámi ságaid ja sámegiela dihte, muhto maiddái sámémusihka gullan lea sidjiide okta guoddáš guldalansivain. Sámi ságaid gullan lea dehálamos sivva guldalit sámerádio maiddái almmáiolbmuide, muhto sidjiide sámegiela ja -musihka gullamis lea čielgasit unnit mearkkašupmi go nissonvástideaddjiide.



Govus 21. Sivat guldalit Yle Sámi rádioprográmmaid sohkabeliid mielde.


Maiddái vástideaddji eatnigiella váikkuha dasa, manin olmmoš guldala Yle Sámi rádioprográmmaid. Sámi ságaid gullan lea dehálamos sivva guldalit sámerádio buot giellajoavkkuide earret suomagielagiidda, geaidda buot dehálamos lea gullat sámegiela. Sámi ságaid gullan lea buot dehálamos nuortalašgielagiidda, nubbin davvisámegielagiidda, goalmádin anárašgielagiidda ja njealjádin suomagielagiidda. Sámegiela gullan lea buot dehálamos suomagielagiidda, de anárašgielagiidda, goalmádin davvisámegielagiidda ja njealjádin nuortalašgielagiidda. Sámemusihkka lea sivvan guldaleapmái dávjjimusat davvisámegielagiin, nubbin anárašgielagiin, goalmádin suomagielagiin ja buot unnimus mearkkašupmi musihkas lea nuortalašgielat guldaleaddjiide.



Govus 22. Sivat guldalit Yle Sámi rádioprográmmaid giellajoavkkuid mielde.

Maiddái guldaleaddji ruoktoguovlu váikkuha dasa, manin olmmoš guldala Yle Sámi rádioprográmmaid. Roavvenjárgalaččaide, ohcejohkalaččaide, anárlaččaide ja Roavvenjárgga máttabealde ássiide dehálamos sivva guldalit sámerádio leat sámi ságat. Eanodatlaččat dan sadjái guldalit sámerádio dássálágaid sihke ságaid, giela ja musihka dihte ja soađegililaččat eanemus giela, ja masá seamma veardde musihka dihte.

Sámi ságaid gullan lea buot dehálamos roavvenjárgalaččaide, de ohcejohkalaččaide, anárlaččaide, Roavvenjárgga máttabealde ássiide, eanodatlaččaide ja soađegililaččaide. Erohusat leat goit oalle stuorrát: go roavvenjárgalaš vástideaddjiin buohkat guldalit sámerádio earret eará sámi ságaid dihte, bargá soađegililaččain dušše guokte goalmmátoase ná. Sámegiela gullan lea dehálaš sivva guldalit Yle Sámi rádio buot guovlluin. Čielgasit stuorámus mearkkašupmi sámegiela gullamis lea goit soađegililaččaide ja unnimus Roavvenjárgga máttabealde ássiide. Sámemusihka dihte sámerádio guldalit eanemus soađegililaččat ja roavvenjárgalaččat ja unnimus anárlaččat ja ohcejohkalaččat.



Govus 23. Sivat guldalit Yle Sámi rádioprográmmaid ruoktoguovlluid mielde.


4.3 Sámeguovllus ja -guvlui fárrema váikkuhus guldaleapmái

Gažadeamis jerrojuvvui, leago vástideaddji goasnu fárren eret sámeguovllus dahje sámeguvlui, ja mo dat lea váikkuhan Yle Sámi rádioprográmmaid guldaleapmái.

Jerren vuos vástideaddjiin ”Leatgo goasnu orron sámeguovllus (Anár, Eanodat, Ohcejohka ja Soađegili Lappi bálggus) ja fárren doppe eret?”. Fállen vástideaddjiide vejolašvuoda vástidit gažaldahkii jogo 1) Lean dahje 2) In leat. Olles 70 proseantta olbmuin muitalii, ahte lea goasnu orron sámiid ruoktoguovllus ja fárren doppe eret.

Daid olbmuin, geat vástidedje, ahte leat goasnu orron sámeguovllus ja fárren doppe eret, jerren joatkkagažaldaga: ”Váikkuhiigo sámeguovllus eretfárren du Yle Sámi rádioprográmmaid guldaleapmái?”. Fállen golbma gárvves vástádusmolssaaeavttu: 1) Guldališgohten eanet, 2) Guldališgohten unnit ja 3) Ii váikkuhan. Vuosttas guovtti vástádusmolssaeaktui olbmos lei vejolašvuhta vel dárrkálmahttit vástádusas čálalaččat.

Čielggai, ahte badjel bealli sámeguovllus eretfárren olbmuin guldališgodii Yle Sámi rádioprográmmaid unnit go áasadettiin sámeguovllus. Yle Sámi rádiofálaldagaid guldaleapmi lassánii eretfárrema oktavuodas dušše viđátosiin olbmuin. Njealjátoasse árvalii, ahte eretfárremis ii lean makkárge váikkuhus sin Yle Sámi rádioprográmmaid guldaleapmái.



Govus 24. Sámeguovllus eretfárrema váikkuhus Yle Sámi rádioprográmmaid guldaleapmái.

Badjel bealli sámeguovllus eretfárren olbmuin vásaha sin Yle Sámi rádioprográmmaid guldaleami geahppánan fárredettiin eret sámeguovllus. Dasa lei goittotge okta čielga sivva: Yle Sápmi ii šat gullon FM-rádion. 96 proseanttas rabas vástádusain guldaleaddjit bukte ovdan dán ášši.

Davvin reahkká, ahte deaddila power-boalu dahje stárte biilla, de álgá gullot sámerádio. Gávpogis dat láve leat viđa minuhta brošedyra ja dallege muhtimin álgá čuodjat Lapin Radio. In gille álo leat laktimin ja beaivideamen áppaid jna. Álkit guldalit Ylex.

Daningo Yle Sámi rádio ii gullo FM-rádios. Guldalivččen mielas álo sámerádio biillas, jos dat gullošii máddin. Biila lea munne dehalamos rádioguldaleami use case ja dan váillahan olu máddin.

Ii gullo dábálaš rádioin, man dábálaččat liikon guldalit.

Dán áigge rádio galgá sierra ohcalit guldalit, ovdal Yle Sámi šattai guldalit, jos dat fal lei ruovttus vállejuvpon rádios.

Prográmmat eai gullo Oulu guovllus rádios, de in sáhte dušše spoahkkalit dan ala. Lea eanet bargu rahpat dihtoris sáddagiid.

Vidátoassi olbmuin goittotge muiṭalii, ahten guldališgodii Yle Sámi rádioprográmmaid eanet, go fárrii eret sámeguovllus. Stuorámus sivva dasa lei dat, go sihke sámeságaid ja -giela illá gulai šat eará sajis.

Šattai hui dehálaš diehit sámi ságaid. Álkimus vuohki gullat daid.


Miella gullat, mii Sámeguvlui gullo.

Dat lei áidna liŋka sámegillii, go muđui gávpogis ii gullo sámeġiella.

Jerren maiddái, leago vástideaddji goasnu orron sámeguovllu olggobeadde ja fárren doppe sámeguvlui. Olles 61 proseantta olbmuin muiṭalii, ahten lea goasnu fárren sámeguovllu gielddaide.

Daid olbmuin, geat vástidedje fárren goasnu sámeguvlui, jerren joatkkagažaldaga: "Váikkuhiigo sámeguvlui fárren du Yle Sámi rádioprográmmaid guldaleapmái?". Fállen golbma gárvves vástádusmolssaeavttu: 1) Guldališgohten eanet, 2) Guldališgohten unnit ja 3) Ii váikkuhan. Vuosttas guovtti vástádusmolssaeaktui olbmos lei vejolašvuhta vel dárkkálmahttit vástádusas čálalaččat.

Čielggai, ahten guokte goalmátoase olbmuin, geat ledje goasnu fárren sámeguvlui, ledje dan maŋŋá guldališgohtán eanet Yle Sámi rádio. Njealjátoassái sámeguvlui fáremis ii lean váikkuhus rádioguldaleapmái. Dušše vuollái logátoassi olbmuin guldališgodii Yle Sámi rádioprográmmaid unnit sámeguvlui fárrema maŋŋá.



Govus 25. Sámeguvlui fárrema váikkuhus Yle Sámi rádioprográmmaid guldaleapmái.

Guldaleami lassáneapmái lei okta čielga sivva: dál Yle Sámi rádioprográmmaid sahtii guldalit FM-rádio bokte, dat bodii ovdan 63 proseanttas rabas vástádusain.

Sámis lea álki biilla vuojedettiin guldalit ja muđuige sámeáššit leat eanet mielas.

FM-rádio, mas gullo Yle Sámi rádio kanála, lei álkit olamuttus biillas ja gievkkani. Rádio lei maid rabas bargosajis, restorájjain ja kafeain dahje fulkkiid ja ustibiid luhtte.

Maiddái beroštupmi sámeáššiid guovdu lassánii oasis vástideaddjiin sámeguvlui fárredettiin, daningo servodat lei lagabuš eallima go sámeguovllu olggobealde. Dat lei sivvan 25 proseanttas rabas vástádusain.

Bissu buorebut áiggi dásis sápmelaččaid áigeguovdilis áššiin.

Okta sivva guldaleami lassáneapmái lei gávcci prosentii maiddái dat, go Yle Sámi rádiosátta gullui eanet iešguđet báikkiin.

Álo goasnu dahje geasnu lei Yle Sámi rádiosátta rabas.

Miellagiddevaš lea, ahte masá logátoassi vástideaddjiin guldališgodii Yle Sámi rádioprográmmaid unnit, go fárrii sámeguvlui. Dasage vástideaddjit namuhedje ovta čielga siva: sámerádio ii šat dárbašan guldalit giela ja ságaid dihte, go daid gulai muđuige eallinbirrasis.

Bissu buorebut áiggi dásis sápmelaččaid áigeguovdilis áššiin.

Dalle diehtá eambbo mii dáhpáhuvvá, nu ii nu ollu de guldal šat giela dihte.

5 Loahpahus

Dutken Yle Sámi rádio guldaleami, dan sivaid ja mearkkašumiid sápmelaččaide jagi 2018. Dutkamušastan ledje guokte váldodutkangažaldaga. Vuosttas mihttomearri lei dutkat, mo sápmelaččat guldalit sámegielat rádio jagi 2018. Dasa lassin lei ulbmil čielggadit, makkár sivat ja mearkkašumit rádioguldaleapmái laktásit. Ožžon vástádusaid guktuid gažaldagaide. Dutkamušan vuosttas váldogávnnus lea, ahte sápmelaččain leat áibbas iežaslágan dábit guldalit sámerádio iige daid sáhte buohtastahttit suopmelaš váldoálbmoga rádioguldalandábiide. Nubbi váldogávnnus lea, ahte sámegielat rádios leat sápmelaččaide aiddo dakkár mearkkašumit go vehádatmedian leat gávnahan leat vehádagaise birra máilmomi.

Jearahallen dutkamuššii čakčat 2018 gažadanskoviigun 160 badjel 15-jahkásaš sápmelačča. Gažadeapmi lei rabas buohkaide. Stuorámus oassi vástideaddjiin devddii skovi digitálalaččat neahtas, muhto oasáš oassálasttii dutkamuššii maiddái báberskoviin. Vástideaddjit ovddastedje viidát iešguđet sohkabealle-, ahke- ja giellajoavkkuid ja ruoktuguovlluid. Gieđahallen ja analyserejin vástádusaid olles vástideaddjijoavkku dásis, muhto ohcen maiddái erohusaid iešguđetlágan olmmošjoavkkuid gaskkas.

Stuorra oassi, lagabui bealli dutkamuša vástideaddjiin, muiṭalii guldalit Yle Sámi rádioprográmmaid duollet dálle. Badjelaš njealjádas muiṭalii guldalit prográmmaid jogo álo dahje dávjá, ja badjelaš njealjádas jogo hárve dahje ii goassige. Boares dutkamušaide veardidettiin fuomášin, ahte sápmelaččat eai guldal sámerádio šat seamma dávjá go ovdal. Go ovdamearkka dihte 1970-logus sámerádio guldalii álo dahje dávjá sullii bealli vástideaddjiin ja duollet dálle sullii njealjádas vástideaddjiin, leat logut dán beaivve nuppe gežiid. Aktiivvalaš guldaleaddjiid mearri lea áiggiid mielde njiedjan njealjátosiin, go fas duollet dálle guldaleaddjiid mearri lea sturron seamma veardde. Das fuolakeahttá, ahte sápmelaččat eai guldal sámerádio seamma viššalit go ovdal, čájeha dutkamušan, ahte sámerádio lea ain oassi eanaš sápmelaččaid eallimis. Čađa áiggiid Yle Sámi rádiosáddagiid hárve dahje ii goassige guldaleaddji sápmelaččaid mearri lea molsašuddan sullii 25–30 proseantta gaskkas, ja proseantalohku lei seamma stuoris maiddái mu dutkamušas. Vaikko áigi lea gollan,

máilbmi rievdan ja guldaleaddjibuolvvatge molsašuvvan, orru sámerádio goit juogantu muddui olaheamen ain seamma stuorra oasi sápmelaččain.

Dutkamušan vástideaddjit guldaledje Yle Sámi rádio jagi 2018 buot eanemus biillas ja ruovttus. Sámerádio bivnnuhamos guldalanrusttegat ledje biilarádio, dihtor ja beavderádio. Vástideaddjit guldaledje sámerádio buot millosamosit duorastagaid, de bearjadagaid ja goalmmádin vuossárggaid. Millosamosit sii guldaledje Yle Sámi rádioprográmmaid iđdes diibmu 7–9, de eahkes diibmu 17–21 ja goalmmádin eahketbeaivve diibmu 14–17. Buot millosamosit vástideaddjit guldaledje sámerádios ođđasiid ja Sohkaršohkka-nuoraidprográmma, ja buot unnimus sin geasuhedje rohkospgrámmat ja Binna Bánnna -mánáidprográmma.

Sámerádio guldalandábit sulastahtte suopmelaš servodaga rádioguldalandábiid, muhto dain ledje maiddái čielga iežas iešvuodat. Dutkamuša vástideaddjit guldaledje sámerádio biillas ja ruovttus čielgasit eanet go suopmelaččat guldalit rádio. Erohusat ledje maiddái guldalanrusttegiin. Vástideaddjit guldaledje sámerádio čielgasit eanet digitála rusttegiiguin go suopmelaččat, geat fas guldalit rádio olu árbeviolaš FM-rádiorusttegiid bokte. Dásá lea okta čielga sivva: sámerádio ii gullo Roavvenjárgga máttabealde FM-dávjodagain, man dihte sápmelaččat guldalit sámerádio dakkár rusttegiiguin, main doaibmá neahttarádio. Dát lea stuorra nuppástus maiddái historjjá ektui, go čađa áiggiid sápmelaččat leat guldalan sámerádio eanaš analoga rádiorusttegiid bokte.

Guldalanáiggiid ektui sámerádio guldaleamis orrot dáhpáhuvvan stuorra nuppástusat historjjás dán beaivái. Go ovdamearkka dihte 1970-logus sápmelaččaid mielas buot buoremus vahkkobeavivi guldalit sámegielat rádio lei sotnabeavivi ja nubbin lávvardat, ledje dát guokte beaivvi mu dutkamuša vástideaddjiide buot eahpemilosamos beaivvit guldalit sámerádio. 1970-logus dahkkojuvvon dutkamušas goalmmádin millosamos beaivi guldalit sámerádio lei vuossárga, ja dat doallá sajis ain dánge beaivve. Dat, ahte dutkamuša vástideaddjit guldaledje jagi 2018 sámerádio mielas iđdes, lea oalle ođđa albmanupmi historjjá ektui. 1990-logu rádjai iđit ii lean sápmelaččaide okta daid millosamos áiggiin guldalit sámerádio, muhto dan rájes gitta dán beaivái sámegielat

rádio guldaleamis leamaš oalle dássálágaid deaddu eahketbeivviid lassin maiddái ididiin. Dat, ahte vástideaddjit guldalit Yle Sámi rádiosáddagiid buot millosamosit iddes diibmu 7–9, vástida váldoservodaga dili, go Suomas buot bivnnuhamos rádioguldalanáigi lea árgađit diibmu 8. Eará áiggiid ektui leat goit stuorra erohusat. Go váldoálbmoga dutkamuš čájeha, ahte suopmelaččaid rádioguldaleamis lea deaddu beavvet, orru sápmelaččaid rádioguldaleamis leamen deaddu iđidis ja eahkedis. Sápmelaččat leat čađa áiggiid atnán eahkediid erenoamáš heivvolaš áigin guldalit Yle Sámi rádioprográmmaid, ja dilli orru leamen seamma ain dán beaivve.

Ođđasiin leamaš álo mearkkašahtti rolla Yle Sámi rádiosisdoaluin – ja nu lei ain jagi 2018. Badjel bealli vástideaddjiin muitalii guldalit mielas rádioođđasiid ja masá buohkat atne dan beroštahti fálaldahkan. Dán ja árat dutkamušaid vuodul sáhttáge dadjat, ahte áibbas vuosttas jagiid rájes gitta dán beaivái, badjel 70 jagi áigge, ođđasat leat leamaš Yle Sámi rádio guldaleaddjiide dat buot dehálamos rádiofálaldat. Nubbin millosamos prográmma dutkamuša vástideaddjiide lei nuorra ollesolbmuid Sohkaršohkka-prográmma, mii lei goittotge oalle njunnošis maiddái ii-beroštahti prográmmaid joavkkus. Dan sáhttáge atnit prográmmman, mii buot eanemus juohká vástideaddjiid oainnuid. Buot eahpemilosamos sámerádio sisdoallu dutkamuša vástideaddjiide ledje rohkospgrámmat.

Dutkamušan bohtosat dorjot teorijalogus ovdanbuktojuvvon čuoččuhusaid vehádatmediaid mearkkašumiin vehádagaiide. Sámerádio mearkkašupmi sápmelaččaide leamaš álo mánggadását ja mearkkašumit leat bisson sullii seamman čađa áiggiid. Go álgoáiggiid 1950-logus sámerádio čohkkii bearrašiid, sogaid ja giliid ovttä beavddi gurrii ja doaimmai sápmelaččaid áidna diehtojuohkinkanálan, lea dilli rievdan oalle olu dán beaivái, muhto maiddái sulastahttá vuorddekeahthes olu otnáža: sámerádio lea ain okta sámeálbmoga diediheaddjiin ja oktiibukiin. Sámerádio lei mu dutkamuša vástideaddjiide sihke iežas diedihangaskaoapmi, vuostemedia, giellabargi ja sámi identitehta ja oktiigullevašvuoda huksejeaddji.

Čielgasit stuorámus oassi vástideaddjiin, badjel 85 proseantta, muitalii guldalit Yle Sámi rádioprográmmaid sámi ságaid dihte. Dat ii leat imaš, daningo vehádatmediat leat

dávjá áidna mediat, mat giedahallet vehágaga áššiid – ja sin iežaset geahččanguovllus. Dat duohatuuohta, ahte Yle Sápmi lea Suoma áidna sámemedia, láhcá dasa stuorra ovddasvástádusa muiatalit sámeálbmogii áššiin, mat gusket dan. Go váldá vuhtii, ahte stuorámus oassi Suoma sámeálbmogis orru sámeguovllu olggobealde iige vealttakeahttá fidne sámeáššiin dieđu mange earáge gáldu bokte, lea Yle Sámi ovddasvástádus doallat sin áiggi dásis sámeservodaga áššiin ain stuorát. Dat, ahte masá buot vástideaddjiide okta sivva guldalit Yle Sámi rádio leat sámi ságat, muiatala sápmelaččaid iežas media dárbbashašvuodas. Sivva dasa, manin addo rádios lea sápmelaččaide ain dán beaivve nu stuorra mearkkašupmi diehtojuohkinkanálan, ii čielgan dán dutkamušas. Dutkamušastan ovdanboahtán áššiid vuodul sahttá jurddašit, ahte dasa sáhttá leat váikkuhan ovdamarkka dihte sámerádio guhkesáiggi árbevieruid váikkuhus dahje dat, ahte váldomediat ja vehádatmedia eará lávddit eai bastte seamma vugiin juohkit ságaid dahje dat, ahte sámerádio lihkostuvvá olbmuid mielas muiatalit sápmelaččaid áššiin. Leš sivva rádio stuorra mearkkašupmái sápmelaččaid diehtojuohkingaskaoapmin mii beare, čájeha dutkamušan, ahte sápmelaččain lea ain dán beaivve stuorra goiku gullat sámi ságaid, sámi jienain.

Stuorra oassi vástideaddjiin, badjel 70 proseantta, muiatalii guldalit Yle Sámi rádioprográmmaid maiddái sámegiela dihte. Datge ii leat imaš, daningo etnalaš mediat barget dávjá maiddái gielaid gáhtten- ja ealáskahttinbarggu. Yle Sápmi gohčoda rádio dan dehálamos giellaealáskahattinbargoneavvun – iige duššiid dihte. Dutkamušan čájeha, ahte erenoamážit sámegiela oahpahallan sápmelaččaide sámerádio leamaš dehálaš reaidu giela oahppamis. Sámerádios lea giellabargin stuorra ovddasvástádus: nuppe dáfus dat galgá doalahit ja gáhttet sámi girjás giellaárbbi ja nuppe dáfus oðasmahttit ja dievasmahttit sámegiela dálá áiggi dárbbuide. Giela oahpaheami ja gáhttema lassin sámerádio goit doaibmá sápmelaččaide maiddái erenoamáš giellabirasin. Dat lea stuorra oassái sápmelaččaide áidna dilálašvuohta beassat gullat sámegiela árgabeaivvis ja dutkamušan čájehage, ahte máŋgasat huksejít sámerádioin ruktoseaset ja mánáidasaset sámegielat birrasa. Dasa lassin vástideaddjit vásihedje, ahte sámerádios lea dehálaš rolla áiddiid njeaidimis sámegielaid ja -suopmaniid gaskkas. Vaikko máŋgasámegielat sáddagat juhket olbmuid oaiviliid, muialedje ollusat sámerádio ánssus oahppan áddet ja dohkkehít nuppi sámegiela dahje suopmana. Sámeradio lea dehálaš maiddái mánáid ja

nuoraid giela ja identitehta dáfus. Go sámeigella lea gullon ovdamearkka dihte nuorra ollesolbmuid Sohkaršohkka-prográmmas, lea dat nannen sámegielaid normálavuoda nuorra vástideaddjiid čalmmiin.

Lagabui 70 proseantta vástideaddjiin mitalii guldalit Yle Sámi rádioprográmmaid sámemusihka dihte. Máŋggat vástideaddjít mitaledje, ahte Yle Sámi rádiomusihkkafálaldagas leamašan stuorra mearkkašupmi sin mánná- ja nuorravuođas, goas sámemusihka ii beassan jur eará sajiin gullat. Dán beaivve, go sámemusihkka lea olamuttus viidát earáge sajiin go rádios, sáhtášii rádiočuojaheami mearkkašumi gáddit unnon, muhto nu ii leat. Dat, ahte lagabui 70 proseantta vástideaddjiin mitalii guldalit Yle Sámi rádio ain sámemusihka dihte, duođašta dan leat dehálaš oassi sámegielat rádiosisdoaluid. Historjjás árbevirolaš luođit leat juohkán guldaleaddjiid oainnuid, muhto dan ektui orrot áiggit rievdan. Oktage vástideaddji ii máinnašan, ahte anášii juigosiid čuodjama rádios váttisuohantan, muhto máŋgasat baicce giitaledje, ahte leat sámerádio ánssus oahppan boares luđiid.

Vástideaddjít atne Yle Sámi rádio oktan dehálamos mearkkašupmin maiddái sámi identitehta ja oktiigullevašvuoda dovdduid nanosmahttima. Yle Sámis leamaš gitta álgoáiggiid rájes erenoamáš rolla sámeservoša huksemis ja nanosmahttumis. Sámerádio lea historjjás váikkuhan dasa, ahte sápmelaččat leat šaddan eanet diđolažžan iežaset gullamis sihke sámi álbmogii ja máilmimi álgoálbmotservošii. Vaikko dán áigge oktavuođaid doallan miehtá máilmimi lea álkkit go goassige ovdal, čájeha dutkamušan, ahte sámerádio lea bisuhan erenoamáš rollas sámeálbmoga oktiibuktin ja ovttasdoallin.

Sullii 40 proseantta vástideaddjiin lei jagi 2018 čielgasit duđavaš sámerádio fálaldahkii, 20 proseantta duhtameahttun ja 40 proseantta eahpesihkkar oainnustis. Dilli ii leat olus rievdan historjjá ektui. 1980-logus badjelaš 40 proseantta sápmelaččain anii sámerádio prográmmaid miellagiddevažžan ja badjelaš 40 proseantta ii nu miellagiddevažžan. Duđavaš guldaleaddjiid mearri orru bison sullii seamman, muhto duhtameahttumiid oassi lea unnon beliin, go stuorra oassi vástideaddjiin ii máhte meroštallat duđavašvuodas. In čielggadan dán dutkamušas, man stuorra mearkkašupmi Yle Sámi rádios lea iešguđetlágan guldaleaddjiide, muhto árat dutkamušat leat čájehan, ahte

maiddái duhtameahttun guldaleaddjit atnet sámerádio mearkkašahti áššin iežaset eallimis. Dutkamušastan eai loktanen ovdan ovttaskas ášshit, maidda guldaleaddjijoavku livčii leamašan čielgasit duđavaš dahje duhtameahttun, muhto seamma ášshit máinnašuvvojedje baicce guktuid vástádusain. Ovdamearkka dihte máŋggasámegielat sáddagat, prográmmaid sisdoallu ja sámegiela dássi gávdnojedje sihke duđavaš ja duhtameahttun guldaleaddjiid vástádusain. Aiddo dat, go Yle Sámi rádio guldaleaddjijoavku lea nu girjái – okta olles álbmot unnoraččain gitta boarrásiidda – oidno hui máŋggalágan oaidnun ja jurddan fálaldaga ektui. Vástideaddjit váillahedje Yle Sámi rádios goit buot eanemus eanet čiekjalis áššeprográmmaid, eahketprográmmaid, nuoraidprográmmaid, ovtagielat sáddagiid ja sisdoalu dássebealádabbott miehtá Sámi.

Ovdanbukten láidehusastan áimmuin leamašan jurdaga das, ahte sámerádio guldalit válđoášsis sámeguovllu boarrásot buolvva sápmelaččat, geat fas guldalit mielas ođđasiid ja vuoiŋjalaš prográmmaid. Dat orru gal doallamin oassái deaivása, muhto ii eisige leat olles duoh tavuohta. Dutkamušan čájeha, ahte vuorrasot olbmot guldalit Yle Sámi radio viššalabbot go earát. Sii guldalit sámerádio eanet go nuorra ollesolbmot, muhto nuorra ollesolbmot leat liikká viššalabbot guldalit sámerádio go gaskaagi olbmot. Guldaleaddjit goit gávdnojít buot ahkeluohkáin, giellajoavkkuin ja ruoktoguovlluin. Rohkosprográmmaidges ektui dilli lea dat, ahte dat heaŋgájít mu dutkamušas majimuš sajis miela miel prográmmaid joavkkus ja ceaggájít vuosttas sajis ii-beroštahtti prográmmaid joavkkus. Vuorrasot vástideaddjit gal muitaledje guldalit rohkospgrámmaid eanet go earát, muhto dušše unna oasáš sisge guldala daid.

Iešguđetlágan olmmošjoavkkuid sámerádio guldalandábit sulastahtte olu nuppiideaset, muhto lokten ovdan muhtun erohusaid earálágan guldaleaddjiid gaskkas. Aktiivvalaš guldaleaddjit, geat guldalit sámerádio jogo álo dahje dávjá, ledje veardádallamii válljejuvvon ahkeluohkáin eanemus 70–79-jahkásáččain, sohkabeliin eanemus nissonolbmuin, eatnigielaid beales eanemus davvisámegielagiin ja ruoktoguovlluid ektui eanemus roavvenjárgalaččain. Vástideaddjit, geat muitaledje guldalit sámerádio jogo hárve dahje eai goassige, ledje eanemus 40–49-jahkásáččain, almmáiolbmuin, nuortalašgielagiin ja Roavvenjárgga máttabealde ássiin.

Yle Sámi rádio bivnnuhamos sisdoalu, radioodđasiid, guldaledje veardádallamii válljejuvvon joavkkuin millosamosit 40–49-jahkásaš, almmáiolmmoš, davvisámegielat ja eanodatlaš vástideaddjit. Sohkaršohkkages geasuhii eanemus 20–29-jahkásacčaid, almmáiolbmuid, anárašgielagiid ja anárlaččaid. Yle Sámi iđit -prográmmas lei stuorámus guldaleaddjijoavku 40–49-jahkásacčain, nissonolbmuin, davvisámegielagiin ja soađegililaččain. Davviriikkalaš Buorre iđit Sápmi -prográmmages geasuhii eanemus 40–49-jahkásacčaid, almmáiolbmuid, davvisámegielagiid ja ohcejohkalaččaid. Dearvva! Tiõrv! Tiervâ! -eahketbeaisátta lei buot millosamos 20–29-jahkásacčaide, nissonolbmuide, anárašgielagiidda ja anárlaččaide. Ovdamearkka dihte arkiivaprográmmat ledje eanemus miel miel 70–79-jahkásacčaide, nissonolbmuide, nuortalašgielagiidda, anárlaččaide ja soađegililaččaide.

Stuorámus oassi vástideaddjiin muiṭalii guldalit Yle Sámi rádioprográmmaid buot ovddemustá sámi ságaid, muhto maiddái giela, musihka ja eará sivaid dihte. Čalbmái čuzii goittotge dat, ahte go sihke 20–29- ja 40–49-jahkásaš vástideaddjit guldaledje sámerádio oalle dássálágaid sihke ságaid, giela ja musihka dihte, guldaledje 70–79-jahkásacčat sámerádio buot ovddemustá ságaid, dušše muhtun veardde giela ja unnán musihka dihte. Nissonvástideaddjit guldaledje Yle Sámi rádio oalle dássálágaid sihke sámi ságaid ja giela, muhto maiddái musihka dihte – go fas almmáiolbmuide sámegiela ja -musihka gullamis lei čielgasit unnit mearkkašupmi. Iešguđet giellajoavkkuid veardádallamis čielggai, ahte sámi ságaid gullan lei buot dehálamos sivva guldalit sámerádio buot giellajoavkkuide earret suomagielagiidda, geaidda buot dehálamos lei gullat sámegiela. Sámemusihkages dihte sámeradio guldaledje eanemus davvisámegielat vástideaddjit. Ruoktuguovlluid geahcadettiin fuomášin, ahte sámi ságat ledje dehálamos sivva guldalit sámerádio roavvenjárgalaččaide, ohcejohkalaččaide, anárlaččaide ja Roavvenjárgga máttabealde ássiide – go eanodatlaččat fas guldaledje sámerádio dássálágaid sihke ságaid, giela ja musihka dihte, ja soađegililaččat eanemus giela dihte.

Dat vástideaddjit, geat eai guldal Yle Sámi rádio ollenge, máinnašedje dasa sivvan jogo teknihkalaš váttisuuođaid dahje eará hoahpuid. Buot eanemus Yle Sámi guldaleami oruige jagi 2018 goahcamin nuge dábálaš ášši go teknihkka, nuppiid sániiguin FM-

dávjodaga rájálašvuhta. Yle Sápmi ii gullo Roavvenjárggga máttabealde FM-dávjodahkan, mii váikkuha stuorrát guldaleapmái, daningo dego bajábealde lea buktojuvvon ovdan, guldalit sápmelaččat sámerádio váldoášsis biila- ja beavderádioid bokte.

Árvalin láidehusastan, ahte earret eará ođđa áiggi mediafálaldagat, digitála teknologija ja váldogielat media leat sáhttán čuohcat sápmelaččaid rádioguldaleapmái. Ášši birra ii lean vejolaš dađi eanet árvädallat, daningo varrasamos dutkandieđut ledje badjel 20 lagi duohken. Dutkamušan čájehii, ahte sámerádio mearkkašumit sápmelaččaid eallimis leat ain dán beaivve hui girjái. Sámerádio sihke doallá sápmelaččaid áiggi dásis sin iežaset áššiin, oahpaha ja gáhtte sámegielaid, ja čatná biedgguid ássi sámeálbmoga nannosabbot oktii. Sápmelaččat atnet sámerádio ain 70 lagi maŋŋáge dehálaš iežas diedihangaskaoapmin, vuostemedian, giellabargin ja sámi identitehta ja oktiigullevašvuđa huksejeaddjin. Yle Sámi rádio stáđásmuvvan rollat sistisdollet čiekŋalis mearkkašumiid, maid eai ođđa hutkosat ja eará mediat oro bastán doaimmaideasetguin buhttet. Ođđa áiggi mediafálaldagat, digitála teknologija ja váldogielat mediat eai leat rivven sápmelaččaid beljiid Sámi jienas.

Vaikko dutkamuš attiige vástádusaid guovtti válododutkangažaldahkii, váivvida mu dutkin dat, ahte in bastán čohkket vástideaddjijoavkun sámeálbmoga ovddasteaddji čoggosa. Deaivilis čoakkus livčii dahkan vejolažžan generaliseret bohtosiid olles sámeálbmogii. Oainnán goit, ahte dutkamuša stuorra vástideaddjiid mearri ja vástideaddjiid duogážiid girjáivuohta dáhkidot bohtosiid luohtehahttivuođa ja generaliserema vejolašvuđaid goit juoganu muddui. Čájehan dutkamušastan, makkár sámerádio guldalandábit sápmelaččain leat lagi 2018, manin sii guldalit sámegielat rádio ja maid dat sidjiide mearkkaša. Dutkamuš buktá boarásmuvvan dahje oalát váilon dieđuid áiggi dássái, ovddida áddejumi dálá dilis ja láhcá buorre vuodu joatkkadutkamušaide.

Daningo sápmelaččaid ja sámegielat rádio gaskavuohta lea dutkkojuvvon nu unnán, báhce dán vuodđodutkamuša olggobeallái olu ášshit, maid livčii ain dárbu dutkat vuoi sámegielat rádio sajádagas dálá máilmmiss šattašii čiekŋalis govva. Nákcejin gal rahpat dutkamušastan ovdamearkka dihte sámerádio mearkkašumi sápmelaččaide, muhto hui

geahppasit: in beassan dán dutkamuša viidodaga ráddjehusaid dihte čázeoaivvi vuolábeallái. Dutkamuša galggašiige joatkit ovdamearkka dihte guorahallamiin, mo sámerádio lea konkrehtalaččat váikkuhan olbmuid giellamáhttui dahje áddejupmái áššiin, ja mii dan potentiála lea dan dahkat. Oainnán, ahte dutkamuša livččii dárbu dahkat maiddái davviriikkalaččat, sihke sierra Yle Sámi ja maiddái buot sámerádioid guldaleaddijoavkkuid ektui. Mu dutkamuššii vástidedje maiddái Norgga ja Ruota beale guldaleaddjit, muhto sin oassi vástideaddjiin lei nu unni, ahte in sáhttán analyseret bohtosiid sierra sin vuodul. Dutkamušan addá goit buorre vuodu boahttevuodå dutkamušaid várás.

Gáldut

Dutkanmateriála:

160 devdojuvpon jearahallanskovi, mat leat dutkis.

Girjjálašvuohta:

Aikio-Puoskari, Ulla 2002: Kielten ja kulttuurien risteyisasemalla – kysymyksiä saamen kielestä ja identiteetistä. – Laihiala-Kankainen, Sirkka & Pietikäinen, Sari & Dufva, Hannele (doaimm.) *Moniäänen Suomi : Kieli, kulttuuri ja identiteetti*. Jyväskylä: Jyväskylän yliopisto. 90–108.

Alasuutari, Pertti 1994: *Laadullinen tutkimus*. Vastapaino: Tampere.

Alia, Valerie & Bull, Simone 2005: *Media and Ethnic Minorities*. Edinburgh: Edinburgh University Press.

Baker, Colin 2001: *Foundations of Bilingual Education and Bilingualism*. Multilingual Matters ltd.

<<https://criancabilingue.files.wordpress.com/2013/10/colin-baker-foundations-of-bilingual-education-and-bilingualism-bilingual-education-and-bilingualism-27-2001.pdf>> (15.2.2018)

Browne, Donald R. 1996: *Electronic Media and Indigenous Peoples : A Voice of Our Own?*. Iowa: Iowa University.

Cormack, Mike 2007: The Media and Language Maintenance. – Cormack, Mike & Hourigan, Niamh (doaimm.), *Minority Language Media : Concepts, Critiques and Case Studies*. Clevedon Multilingual Matters. 52–68.

Dufva, Hannele & Pietikäinen, Sari 2005: Saamenkielinen media : uhanalaisuuden vastapaino? – Kuure, Leena & Kärkkäinen, Elise & Saarenkunnas, Maarit (doaimm.), *Kieli ja sosiaalinen toiminta – Language and Social Action*. AFinLA Yearbook. Publications de l'association finlandaise de linguistique appliquée 63. 13–33.
<file:///Users/aletta/Downloads/59927-Artikkelin%20teksti-63477-1-10-20161202.pdf>
(10.2.2018).

Finnpanel Oy / KRT 2019a: *Radionkuuntelu Suomessa vuonna 2018*.
<https://www.finnpanel.fi/lataukset/radiovuosi_2019.pdf> (8.3.2019).

Finnpanel Oy / KRT 2019b: *Online-/vuosiraportti tammi–joulukuu 2018*.

Hakala, Juha T. 2018: Toimivan tutkimusmenetelmän löytäminen. – Valli, Raine (doaimm.), *Ikkunoita tutkimusmetodeihin : 1, Metodin valinta ja aineistonkeruu : virikkeitä aloittelevalle tutkijalle*. Jyväskylä: PS-kustannus. 18–46.

Hirsväri, Sirkka & Remes, Pirkko & Sajavaara, Paula 2009: *Tutki ja kirjoita*. Helsinki: Kustannusosakeyhtiö Tammi.

Kortteinen, Juhani 2012: Ihmisarvon kunnioittaminen tiedonvälityksessä. – Nordenstreng, Kaarle (doaimm.) *Kansainvälinen oikeus ja etiikka journalismissa*. Tampere: Yliopistopaino. 97–125.

Laki Saamelaiskärjistä 1995/974. Annettu 17.7.1995.

Latomaa, Timo 2005: Ymmärtävä psykologia: psykologia rekonstruktioivisena tieteenä. – Perttula, Juha & Latomaa, Timo (doaimm.) *Kokemuksen tutkimus : Merkitys–tulkinta–ymmärtäminen*. Helsinki: Dialogia. 17–88.

Lehtola, Veli-Pekka 2001: *Sámi jietna : Suoma Sámi radio 1947–1997*. Helsinki: Yleisradio.

Liikenne- ja viestintäministeriö 2014: *Radion tulevaisuus*. Liikenne- ja viestintäministeriön julkaisuja 8/2014. Helsinki: Liikenne- ja viestintäministeriö. <http://julkaisut.valtioneuvosto.fi/bitstream/handle/10024/77910/Julkaisuja_8-2014.pdf?sequence=1&isAllowed=y> (27.2.2018).

Länsman, Anni-Siiri 1987: *Gii, goas ja manin? : Saamelaisradion kuuntelijatutkimus*. Helsinki: Liikenneministeriö.

Matsaganis, Matthew D. & Katz, Vikki S. & Ball-Rokeach, Sandra J. 2011: *Understanding Ethnic Media : Producers, Consumers, and Societies*. Los Angeles: SAGE.

Perkkilä, Päivi & Valli, Raine 2018: Sähköinen kyselylomake ja sosiaalinen media aineistonkeruussa. – Valli, Raine (doaimm.) *Ikkunoita tutkimusmetodeihin : I, Metodin valinta ja aineistonkeruu : virikkeitä aloittelevalle tutkijalle*. Jyväskylä: PS-kustannus. 245–269.

Pietikäinen, Sari 2002: Media, kieli ja etniset identiteetit. – Laihiala-Kankainen, Sirkka & Pietikäinen, Sari & Dufva, Hannele (doaimm.) *Moniäänen Suomi : Kieli, kulttuuri ja identiteetti*. Jyväskylä: Jyväskylän yliopisto. 241–255.

Pietikäinen, Sari 2006: Mahdollisuksien media: Saamen- ja venäjänkieliset tiedotusvälileet yhteisöjensä voimavarana. – Martikainen, Tuomas (doaimm.), *Ylirajainen kulttuuri : Etnisyys Suomessa 2000-luvulla*. Helsinki: Suomalaisen Kirjallisuuden Seura. 212–236.

Pietikäinen, Sari 2008a: *Sami in the Media: Questions of Language Vitality and Cultural Hybridisation*. Journal of Multicultural Discourses, 3:1. 22–35. <<http://www.tandfonline.com/doi/abs/10.1080/17447140802153519>> (10.2.2018).

Pietikäinen Sari 2008b: "To Breathe Two Airs": Empowering Indigenous Sámi Media. – Wilson, Pamela & Stewart, Michelle (doaimm.) *Global Indigenous Media : Cultures, Poetics, and Politics*. Durham and London: Duke University Press. 197–213.

Rantanen, Kari 1971: *Suomen saamelaisia koskeva radio- ja televisiotutkimus*. Helsinki: Yleisradio.

Reiniharju, Hilla 2015: *Alkuperäiskansakäsitteen kotouttaminen : Tutkimus Ylen saameradiot lähetystä 1973–1977*. Pro gradu -tutkielma. Giellagas-instituutti. Oulu: Oulun yliopisto.

Ruohomaa, Erja 1992: *Sámi radio guldaleapmi Suomas, Ruotas ja Norggas*. Helsinki: Yleisradio.

Ruohomaa, Erja 1995: *Radionkuuntelu Ylä-Lapissa : Saamelaisradion yleisöt 1992 ja 1994*. Helsinki: Yleisradio.

Ruohomaa, Erja 2003: *The Mobility of Radio Listening : The transition of radio as a medium and its significance to listeners in Finland*. Helsinki: Yleisradio.

Ruohomaa, Erja 2008: *Yleissötutkimus käännekohdassa : Miten tutkia yhä nopeampiliikkeisiä yleisöjä?* – Ala-Fossi, Marko & Herkman, Juha & Keinonen, Heidi (doaimm.) *Radio- ja televisiotutkimuksen metodologiaa : Näkökulmia sähköisen viestinnän tutkimiseen*. Tampere: Tampere University Press. 207–221.

Räsänen, Pekka & Sarpila, Outi 2013: Internet-lomake vai ei? Verkkokyselylomake postikyselyitä täydentävänä tiedonkeruun menetelmänä. – Laaksonen, Salla-Maria & Matikainen, Janne & Tikka, Minttu (doaimm.) *Otteita verkosta : Verkon ja sosiaalisen median tutkimusmenetelmät*. Tampere: Vastapaino. 68–83.

Sara, Inker-Anni 2007: *Sámi Radion toimittajien käsityksiä saamelaisen median tehtävistä*. Guovdageaidnu: Sámi Instituutta.

Skön, Kirsi & Torkkola, Sinikka 1997: "Täällä Petroskoi": Omakielisten *radio- ja televisio-ohjelmien merkitys Venäjän Karjalan kansallisille vähemmistöille*. Joensuu: Joensuun yliopisto.

Valli, Raine 2018: Aineistonkeruu kyselylomakkeella. – Valli, Raine (doaimm.) *Ikkunoita tutkimusmetodeihin : 1, Metodin valinta ja aineistonkeruu : virikkeitä aloittelevalle tutkijalle*. Jyväskylä: PS-kustannus. 192–244.

Vastamäki, Jaana & Valli, Raine 2018: Tutkimusasetelman ja mittareiden valinta kyselylomaketutkimuksessa. – Valli, Raine (doaimm.) *Ikkunoita tutkimusmetodeihin : 1, Metodin valinta ja aineistonkeruu : virikkeitä aloittelevalle tutkijalle*. Jyväskylä: PS-kustannus. 270–298.

Vehviläinen, Riitta 1974: *Saamelaiset joukkotiedotuksen käyttäjinä*. Pro gradu -tutkielma. Lehdistö- ja tiedotusoppi. Tampere: Tampereen yliopisto.

Yleisradio 2018: *Ylen asiakkuudet 2017 – Suomi 100 -juhlavuoden avauksesta itsenäisyyspäivän katseluhuippuun*.
<<http://view.24mags.com/mobilev/8e71b6978b76d1383aded9c618f46e44#/page=2>> (27.2.2018).

Yle Sápmi 2017: *Yle Sámi guldaleaddjigažadeami bohtosat: Sullii bealli guldaleaddjiin duđavačcat dálá rádioprográmmaide ja sáddenáiggiide*.
<https://yle.fi/uutiset/osasto/sapmi/yle_sami_guldaleaddjigazadeami_bohtosat_sullii_bealli_guldaleaddjiin_duavaccat_dala_rádioprogrammaide_ja_saddenaiiggiide/9802853> (11.2.2018).

Yle Sápmi 2018a: *Yle Sápmi – Sámi jietna*.
<https://yle.fi/uutiset/osasto/sapmi/yle_sapmi/6611887> (23.12.2018).

Yle Sápmi 2018b: *Dávjodatdieđut / Taajuustiedot*.

<https://yle.fi/uutiset/osasto/sapmi/davjodatdieut_taajuustiedot/6611968>
(22.12.2018).

Åberg, Carin 1999: *The sounds of radio : on radio as an auditive means of communication.* Doctoral thesis. Department of Journalism, Media and Communication. Stockholm: Stockholm University.

Čuvvosat

Čuovus 1. Anárašgielat gažadanskovvi.

Čuovus 2. Davvisámegielat gažadanskovvi.

Čuovus 3. Nuortalašgielat gažadanskovvi.

Čuovus 4. Suomagielat gažadanskovvi.

Yle Säämi radiokuldâlem čohčuv 2018

Tiervâpuáttim västidið Pro gradu -tutkâmušân, mon fáddán láá sämiaalmug radiokuldâlem já Yle Säämi radiofalâlduvah. Tutkâmuš čuosâttâhjuávkkun láá paijeel 15-ihásiih sämmiliih. Kojâdâllâmluámáttâh tiävdoo anonymin.

Jis tust láá koččâmušah tutkâmušâst, te puávtâh väldið ohtâvuodâ totkei šleđgâpostáin: aletta.lakkala@student.oulu.fi

Ustevlij tiervuođâiguin Heaikk’Ovllá Sisko Álehttá, Aletta Lakkala (HuK, Oulu ollâopâttuv Giellagas-instituut)

Lah-uv paijeel 15-ihásâš sämmilâš? *

- Lam.
- Jiem lah.

Suhâpeeli *

- Nissoon
- Almai
- Eres

Ahe *

- 15–19
- 20–29
- 30–39
- 40–49
- 50–59
- 60–69
- 70–79
- 80 >

Eenikielâ (puávtâh merkkið eenâb ko oovtâ muulsâiävtu) *

- Anarâškielâ
- Nuorttâlâškielâ
- Orjâlâškielâ
- Suomâkielâ
- Miinii eres: _____

Päikkikieldâ *

Kuldâlah-uv tun Yle Säämi radio-ohjelmijd tááláá tiileest? *

- Kuldâlâm ain.
- Kuldâlâm tavjá.
- Kuldâlâm tyellittälli.
- Kuldâlâm harvii.
- Jiem kuldâl kuássin.

Kost kuldâlah Yle Säämi radio-ohjelmijd? (puávtâh merkkiđ eenâb ko oovtâ muulsâiävtu)

- Päähist
 - Pargosaajeest
 - Autost
 - Jođedijn päähist nuubán
 - Valastâldijn
 - Eres ohtâvuodâst (čielgii tärkkilubboht jis halijdaht)
-

Mon piergâs peht kuldâlah Yle Säämi radio-ohjelmijd? (puávtâh merkkiđ eenâb ko oovtâ muulsâiävtu)

- Pevdiradio
 - Tiättur
 - Puhelin
 - Autoradio
 - Mottoom iärrás peht (čielgii tärkkilubboht jis halijdah)
-

Mon ohopeeivi lijkkuuh enâmustáá kuldâliđ Yle Säämi radio-ohjelmijd? (puávtâh merkkiđ eenâb ko oovtâ muulsâiävtu)

- Vuossaargâ
- Majebaargâ
- Koskoho
- Tuorâstuv
- Vástuppeeivi
- Lávurduv
- Pasepeeivi

Kuás lijkkuuh enâmustáá kuldâlid Yle Säämi radio-ohjelmijd? (puávtáh merkkiđ eenâb ko oovtâ muulsâiävtu)

- Tooláá iđedist 5–7
- Iđedist 7–9
- Iđedispeeivi 9–11
- Peiviv 11–14
- Ehidispeeivi 14–17
- Ehidist 17–21
- Maŋjeed ehidist 21–24
- Iho/Iđedisijâ 24–5

Maid radio-ohjelmijd lijkkuuh enâmustáá kuldâlid? (puávtáh merkkiđ eenâb ko oovtâ muulsâiävtu)

- Radiouđđâsijd
- Yle Sámi iiđeed 7–8 (Yle Säämi iiđeedvuolgâttâs)
- Buorre Iđit Sápmi 8–10 (Tave-eennâmlii iiđeedvuolgâttâs)
- Dearvva! Tiörv! Tiervâ! 14.30–16 (Yle Säämi eehidpeivivuolgâttâs)
- NRK Sámi ja SR Sámi vuolgâttâsâid Yle Säämi kanava peht
- Arkkâdâhohjelmijd
- Rukkoosohjelmijd
- Muusikohjelmijd
- Sukkâršooki
- Binna Bánna

Maid radio-ohjelmijd jieh peerust kuldâlið? (puávtáh merkkið eenâb ko oovtâ muulsâiävtu)

- Radiouđđâsijd
- Yle Sámi iiđeed 7–8 (Yle Säämi iiđeedvuolgâttâs)
- Buorre Iđit Sápmi 8–10 (Tave-eennâmlii iiđeedvuolgâttâs)
- Dearvva! Tiõrv! Tiervâ! 14.30–16 (Yle Säämi eehidpeivivuolgâttâs)
- NRK Sámi ja SR Sámi vuolgâttâsâid Yle Säämi kanava peht
- Arkkâdâhohjelmijd
- Rukkoosohjelmijd
- Muusikohjelmijd
- Sukkâršooki
- Binna Bánna

Kuldâlah-uv tun Yle Sámi radio-ohjelmijd mielâstubboht njuálguvuolgâttâssân väi pâddejum häämist maŋeláá?

- Njuálguvuolgâttâssân. Jis tun halijdah, muštâl mondiet:

- Vyerkkejum pâddin Yle Areenast. Jis tun halijdah, muštâl mondiet:

Manen kuldâlah Yle Sámi radiofalâlduvâid? (puávtáh merkkið eenâb ko oovtâ muulsâiävtu)

- Halijdâm kuullâđ sämisaavâid.
- Halijdâm kuullâđ sämikielâ.
- Halijdâm kuullâđ sämimuuusik.
- Mottoom eres suujâ tiet. Čielgii tärkkilubboht jis halijdah:

Manen jieh kuldâl Yle Säämi radiofalâlduvâid? (puávtâh merkkið eenâb ko oovtâ muulsâiävtu)

Jiem peerust kuullâð sämisaavâid. Čielgii tärkkilubboht jis halijdah:

Jiem peerust kuullâð sämikielâ. Čielgii tärkkilubboht jis halijdah:

Jiem peerust kuullâð sämimuusik. Čielgii tärkkilubboht jis halijdah:

Toimâtteiei tiet. Čielgii tärkkilubboht jis halijdah:

Ohjelmkielâ tiet. Čielgii tärkkilubboht jis halijdah:

Ohjelmfalâlduv tiet. Čielgii tärkkilubboht jis halijdah:

Muusikfalâlduv tiet. Čielgii tärkkilubboht jis halijdah:

Mottoom eres suujâ tiet. Čielgii tärkkilubboht jis halijdah:

Lah-uv kuásnii aassâm sämikuávlust (Aanaar, länudâh, Ucjuuhâ já Suáðigil Laapi paalgâs) já varrim tobbeen meddâl? *

Lam.

Jiem lah.

Vaiguttij-uv sämikuávlust meddâlvarrim tuu Yle Säämi radiokuldâlmân?

Kuldâlškuottim eenâb. Čielgii tärkkilubboht jis halijdah:

Kuldâlškuottim ucceeb. Čielgii tärkkilubboht jis halijdah:

Ij vaiguttâm.

Lah-uv kuásnii aassâm sämikuávlu ulguubeln já varrim tobbeen sämikuávlun? *

- Lam.
- Jiem lah.

Vaiguttij-uv sämikuávlun varrim tuu Yle Säämi radiokuldâlmân?

- Kuldâlškuottim eenâb. Čielgii tärkkilubboht jis halijdah:
-

- Kuldâlškuottim ucceeb. Čielgii tärkkilubboht jis halijdah:
-

- Ij vaiguttâm.

Lah-uv tuđâvâš Yle Säämi radiofalâlduvváid? *

- Lam.
- Jiem lah.
- Jiem lah vises.

Moos tun lah eromâš tuđâvâš?

Moos jieh lah tuđâvâš?

Mii lii tuu mielâst pyeri Yle Säämi radiofalâlduvâst?

Mii lii tuu mielâst hyeni Yle Säämi radiofalâlduvâst?

Magareh tuoivuuh tust láá Yle Säämi radiofalâlduvâid iähtun? (tuoivuuh ovdâmerkkâin vuolgâttemaigij, kielâ, ohjelmfalâlduv já muusikfalâlduv iähtun)

Maggaar merhâšume Yle Säämi radiofalâlduvâst lii lamaš tuu elimist? (radiovuolgâttâsâin pááccám muštoh, kuldâlemohtâvuodah, kuldâlempiirâs jna.)

Pärnivuođâst

Nuorâ-
vuođâst

Rävisolmožin

Yle Sámi radioguldaleapmi čakčat 2018

Bures boahtin vástidit Pro gradu -dutkamuššii, man fáddán leat sámeálbmoga radioguldaleapmi ja Yle Sámi radiofálaldagat. Dutkamuša čuozáhatjoavku leat 15 jagi deavdán sápmelaččat. Dutkanskovvi devdojuvvo anonyman.

Jos hálidat jearrat juoidá dutkamušas, sáhtát váldit dutkái oktavuoda šleadgapoastta bokte: aletta.lakkala@student.oulu.fi

Ustitlaš dearvvuodaigui Heiikk’Ovllá Sisko Álehttá, Aletta Lakkala (HuK, Oulu universitehta Giellagas-instituhtta)

Leatgo badjel 15-jahkásaš sápmelaš? *

- Lean.
- In leat.

Sohkabealli *

- Nisu
- Almmái
- Eará

Ahki *

- 15–19
- 20–29
- 30–39
- 40–49
- 50–59
- 60–69
- 70–79
- 80 >

Eatnigiella (sáhtát merket eanet go ovtta molssaeavttu) *

- Anárašgiella
- Davvisámegiella
- Nuortalašgiella
- Suomagiella
- Miinu eará: _____

Ruoktogielda *

Guldalatgo Yle Sámi radioprográmmaid dálá dilis? *

- Guldalan álo.
- Guldalan dávjá.
- Guldalan duollet dálle.
- Guldalan hárve.
- In guldal goassige.

Gos guldalat Yle Sámi radioprográmmaid? (sáhtát merket eanet go ovtta molssaeavttu)

- Ruovttus
 - Bargobáikkis
 - Biillas
 - Jođedettiin báikkis nubbái
 - Valáštaladettiin
 - Eará oktavuođas (čilge dárkileappot jos hálidat)
-

Mainnna guldalat Yle Sámi radioprográmmaid? (sáhtát merket eanet go ovtta molssaeavttu)

- Beavderadioin
 - Dihtoriin
 - Telefovnnain
 - Biilaradioin
 - Mainnanu eará rusttegiin (čilge dárkileappot jos hálidat)
-

Guđe beivviid guldalat Yle Sámi radioprográmmaid millosepmosit? (sáhtát merket eanet go ovtta molssaeavttu)

- Vuossárgga / Mánnodaga
- Manjebárgga / Disdaga
- Gaskavahku
- Duorastaga
- Bearjadaga
- Lávvardaga
- Sotnabeaivve

Mii lea dutnje milloseamos áigi guldalit Yle Sámi radioprográmmaid? (sáhtát merket eanet go ovttá molssaeavttu)

- Árraiđit 5–7
- Iđit 7–9
- Iđitbeaivi 9–11
- Beaivi 11–14
- Eahketbeaivi 14–17
- Eahket 17–21
- Maŋjiteahket 21–24
- Idja/iđitidja 24–5

Maid radioprográmmaid guldalat millosepmosít? (sáhtát merket eanet go ovttá molssaeavttu)

- Radioodđasiiid
- Yle Sámi iđit 7–8 (Yle Sámi iđitsátta)
- Buorre Iđit Sápmi 8–10 (Davviriikkalaš iđitsátta)
- Dearvva! Tiõrv! Tiervâ! 14.30–16 (Yle Sámi veaigesátta)
- NRK Sámi ja SR Sámi sáddagiid Yle Sámi Radio kanála bokte
- Arkiivaprográmmaid
- Rohkosprográmmaid
- Musihkkaprográmmaid
- Sohkaršohka
- Binna Bánna

Maid radioprográmmaid it beroš guldalit? (sáhtát merket eanet go ovtta molssaeavttu)

- Radioodđasiiid
- Yle Sámi iđit 7–8 (Yle Sámi iđitsátta)
- Buorre Iđit Sápmi 8–10 (Davvirriikkalaš iđitsátta)
- Dearvva! Tiõrv! Tiervâ! 14.30–16 (Yle Sámi veaigesátta)
- NRK Sámi ja SR Sámi sáddagiid Yle Sámi Radio kanála bokte
- Arkiivaprográmmaid
- Rohkosprográmmaid
- Musihkkaprográmmaid
- Sohkaršohka
- Binna Bánna

Guldalatgo Yle Sámi radioprográmmaid milloseappot njuolggosáttan vai báddejuvvon hámis manjelgihtii? (sáhtát merket eanet go ovtta molssaeavttu)

- Njuolggosáttan. Jos hálidat, muital manin:

- Vurkejuvvon báddin Yle Areenas. Jos hálidat, muital manin:

Manin guldalat Yle Sámi radioprográmmaid? (sáhtát merket eanet go ovtta molssaeavttu)

- Hálidan gullat sámi ságaid.
- Hálidan gullat sámegiela.
- Hálidan gullat sámemusihka.
- Mannu eará siva dihte. Čilge dárkleappot jos hálidat:

Manin it guldal Yle Sámi radioprográmmaid? (sáhtát merket eanet go ovtta molssaeavttu)

In beroš gullat sámi ságaid. Čilge dárkleappot jos hálidat:

In beroš gullat sámegiela. Čilge dárkleappot jos hálidat:

In beroš gullat sámemusihka. Čilge dárkleappot jos hálidat:

Doaimmaheaddjiid dihte. Čilge dárkleappot jos hálidat:

Prográmmagiela dihte. Čilge dárkleappot jos hálidat:

Prográmmafálaldaga dihte. Čilge dárkleappot jos hálidat:

Musihkkafálaldaga dihte. Čilge dárkleappot jos hálidat:

Mannu eará siva dihte. Čilge dárkleappot jos hálidat:

Leatgo goasnu orron sámeguovllus (Anár, Eanodat, Ohcejohka ja Soađegili Lappi bálggus) ja fárren doppe eret? *

Lean.

In leat.

Váikkuhiigo sámeguovllus eretfárren du Yle Sámi radioprográmmaid guldaleapmái?

Guldališgohten eanet. Čilge dárkleappot jos hálidat:

Guldališgohten unnit. Čilge dárkleappot jos hálidat:

li váikkuhan.

Leatgo goasnu orron sámeguovllu olggobealde ja fárren doppe sámeguvlui? *

- Lean.
- In leat.

Váikkuhiigo sámeguvlui fárren du Yle Sámi radioprográmmaid guldaleapmái?

- Guldališgohten eanet. Čilge dárkleappot jos hálidat:

- Guldališgohten unnit. Čilge dárkleappot jos hálidat:

- li váikkuhan.

Leatgo duđavaš Yle Sámi radioprográmmaide? *

- Lean.
- In leat.
- In máhte dadjat.

Masa leat erenoamáš duđavaš?

Masa it leat duđavaš?

Mii lea du mielas buorre Yle Sámi radiofálaldagas?

Mii lea du mielas heittot Yle Sámi radiofálaldagas?

Makkár sávaldagat dus leat Yle Sámi radiofálaldagaid ektui? (sávaldagat ovdamearkka dihte sáddenáiggiid, giela, musihka ja fálaldagaid sisdoalu ektui)

Makkár mearkkašupmi Yle Sámi radioprográmmain leamaš du eallimis? (radiosáddagiin báhcán muittut, guldalanoktavuođat, guldalanbiras jna.)

Mánná-
vuođas

Nuorra-
vuođas

Ollesolm-
možin

Yle Sää'm radiokuvddlummuš čâhčča 2018

Tiõrv pue'ttem va'stteeid Pro gradu -tu'tk'kummša saa'mi radiokulddlummšest da Yle Sää'm radioprograammin. Tu'tk'kummuž täävtōsjoukkān lie pâ'jjel 15-ekksa sä'mmla. Kõõjummša va'stteeid anonymân.

Jõs tu'st lie kõõčmõõžž tu'tk'kummuž pirr, vuäitak vuõltteed e-påå'št
tu'tk'keeja: aletta.lakkala@student.oulu.fi

Tiõrv'vuõđivui'm Heaikk'Ovllá Sisko Álehittá, Aletta Lakkala (HuK, Oulu universiteet Giellagas-institutt)

Leäk-a pâ'jjel 15-âkksaž sä'mmlaž? *

- Leäm.
- Jiõm leäkku.

Sooggbie'lli *

- Neezzan
- Ååumai
- Jee'res

Ââ'kk *

- 15–19
- 20–29
- 30–39
- 40–49
- 50–59
- 60–69
- 70–79
- 80 >

Jie'nnkiõll (vuäitak mie'rķkeed jeänab ko õõut jie'nnkiõl) *

- Aanrōsškiõll
- Lää'ddkiõll
- Nuõrtsää'mkiõll
- Tâ'vvsää'mkiõll
- Mii-ne jee'res: _____

Jälstemkå'dd *

Kuvddlak-a Yle Sää'm radiovuõlttõõzzid ânn'jõžää'i? *

- Kulddlam ū'jimie'lld ää'i'j.
- Kulddlam täu'ja.
- Kulddlam te'l tä'l.
- Kulddlam hää'rveld.
- Jiõm kulddâl ni kuä'ss.

Ko'st kulddlak Yle Sää'm radiovuõlttöözzid? (vuäitak va'lljeed jeänab ko õõut vaaitõsmääin)

- Dååma
 - Tuejjpää'i'kest
 - Aautâst
 - Jåå'đeen pää'i'kest nobba
 - Uurčeen le'be jee'resnalla liikkeen
 - Jee'res öhrtvuõdin (mušttâl tää'rķben jõs haa'lääk)
-

Mõin neävvain kulddlak Yle Sää'm radiovuõlttöözzid? (vuäitak va'lljeed jeänab ko õõut vaaitõsmääin)

- Pâ'rddradioin
 - Teâttmašinain
 - Te'lfoonin
 - Auttradioin
 - Mõin-ne jee'res neävvain (mušttâl tää'rķben jõs haa'lääk)
-

Mõõn neä'ttelpee'i'v kulddlak miõllsummsen Yle Sää'm radiovuõlttöözzid? (vuäitak va'lljeed jeänab ko õõut vaaitõsmääin)

- Vuõssaarg
- Mââibaarg
- Seärad
- Ne'ljdpee'i'
- Piâtnâc
- Sue'vet
- Pâ'sspeei'i'

Mõõn ää'i'j kulddlak miöllsummsen Yle Sää'm radiovuõlttõõzzid? (vuäitak va'lljeed jeänab ko õõut vaaitõsmääin)

- Ää'i'jeld tue'lää 5–7
- Tue'lää 7–9
- Tue'lespeivva 9–11
- Peivva 11–14
- Jeä'kkespeivva 14–17
- Jeä'kkää 17–21
- Mâjas jeä'kkää 21–24
- Ekka/tue'lesiinn 24–5

Mäid radioprograammid kulddlak miöllsummsen? (vuäitak va'lljeed jeänab ko õõut vaaitõsmääin)

- Radio-ođđsid
- Yle Sámi tue'les 7–8 (Yle Sää'm tue'lesvuõlttõõzz)
- Buorre Iđit Sápmi 8–10 (Tâ'vvjânnamlaž tue'lesvuõlttõõzz)
- Dearvva! Tiõrv! Tiervâ! 14.30–16 (Yle Sää'm jeä'kkesvuõlttõõzz)
- NRK Sámi da SR Sámi vuõlttõõzzid Yle Sää'm kanaal pää'ič
- Arkiivprograammid
- Mo'lidvaprograammid
- Musikkprograammid
- Säähharšook
- Binna Bánna

Mâid radioprograammid jiõk peerast kulddled? (vuäitak va'lljeed jeänab ko õõut vaaitõsmääin)

- Radio-oððsid
- Yle Sámi tue'les 7–8 (Yle Sää'm tue'lesvuõlttöözz)
- Buorre Iđit Sápmi 8–10 (Tâ'vvjânnamlaž tue'lesvuõlttöözz)
- Dearvva! Tiõrv! Tiervâ! 14.30–16 (Yle Sää'm jeä'kkesvuõlttöözz)
- NRK Sámi da SR Sámi vuõlttöözzid Yle Sää'm kanaal pää'ič
- Arkiivprograammid
- Mo'lidvaprograammid
- Musikkprograammid
- Säähharsook
- Binna Bánna

Kuvddlak-a Yle Sää'm radioprograammid miöllsubun vuõigg vuõlttössân avi ruõkkum vuõlttössân mâ'ñjlest? (vuäitak va'lljeed jeänab ko õõut vaaitõsmääin)

- Vuõigg vuõlttössân. Jõs haa'lääk, mušttâl mõõn diõtt:

- Mâ'ñjlest ruõkkum leânttummšen Yle Areenast. Jõs haa'lääk, mušttâl mõõn diõtt:

Mõõn diõtt kulddlak Yle Sää'm radioprograammid? (vuäitak va'lljeed jeänab ko õõut vaaitõsmääin)

- Kuullâm diõtt Sää'mvuu'd mainnsid
- Kuullâm diõtt sää'mkiõl
- Kuullâm diõtt sää'm musiikk
- Mõõn-ne jee'res määinast (mušttâl tää'rķben jõs haa'lääk)

Mõõn diött jiõk kulddâl Yle Sää'm radioprograammid? (vuäitak va'lljeed jeänab ko õõut vaaitõsmääin)

Jiõm peerast kuullâd Sää'mvuu'd mainnsid. Mušttâl tää'rķben jõs haa'lääk:

Jiõm peerast kuullâd sää'mkiõl. Mušttâl tää'rķben jõs haa'lääk:

Jiõm peerast kuullâd sää'm-musiikk. Mušttâl tää'rķben jõs haa'lääk:

Tuåimtee'ji diött. Mušttâl tää'rķben jõs haa'lääk:

Programmkiõl diött. Mušttâl tää'rķben jõs haa'lääk:

Jiõm tu'k'ked prograammin. Mušttâl tää'rķben jõs haa'lääk:

Jiõm tu'k'ked musiikkâst. Mušttâl tää'rķben jõs haa'lääk:

Mõõn-ne jee'res määinast. Mušttâl tää'rķben jõs haa'lääk:

Leák-a kuä'ss-ne jälstam sää'mvuu'dest da te'l serddam meädda to'ben? *

Leäm.

Jiõm leäkku.

Mä'htt sää'mvuu'dest meädda serddmõš vaikkti tõõzz, mõõn jiännai kulddlak Yle Sää'm radiovuõlttõõzzid?

Kulddleškuõ'ttem jeänab. Mušttâl tää'rķben jõs haa'lääk.

Kulddleškuõ'ttem uu'ccab. Mušttâl tää'rķben jõs haa'lääk.

Ij vaikktam.

Leäk-a kuä'ss-ne jälstam sää'mvuu'd åålgbeä'lnn da te'l serddam sää'mvouudda? *

- Leäm.
- Jiõm leäkku.

Mä'htt sää'mvouudda serddmõš vaikkti töözz, mõõn jiânnai kulddlak Yle Sää'm radiovuõlttõõzzid?

- Kulddleškuõ'ttem jeänab. Mušttâl tää'rõben jõs haa'lääk.

- Kulddleškuõ'ttem uu'ccab. Mušttâl tää'rõben jõs haa'lääk.

- Ij vaikktam.

Leäk-a toodvaž Yle Sää'm prograammid? *

- Leäm.
- Jiõm leäkku.
- Jiõm silttâd särnnad.

Mõõk lie pue'rmõs ää'sš prograammin?

Mâi'd aa'sšid jiõk leäkku toodvaž?

Mii lij tuu miõlâst pue'rr Yle Sää'm radioprograammin?

Mii lij tuu miõlâst hue'nn Yle Sää'm radioprograammin?

Mâi'd tuäivak Yle Sää'm radioprograammin? (tuäivvmõõž ouddmiârkkân vuõlttôsaai'jin, kiõlâst le'be mákam prograamm le'be musikk õõlgče lee'd)

Mákam miârktôs Yle Sää'm radioprograammin lij leämmaž tuu jie'llmest? (radiovuõlttôõzzin pääccam moošt, kulddlemõhtvuõd, kulddlempirrõs dno.)

Pä'rnn-
vuõðâst

Nuõrrvuõðâst

Vuõrâ-
sooumžen

Yle Sápmi radionkuuntelu syksyllä 2018

Tervetuloa vastaamaan saamelaisen radionkuuntelua sekä Yle Sápmi radiotarjontaa koskevaan Pro gradu -tutkimukseen. Tutkielman kohderyhmä ovat yli 15-vuotiaat saamelaiset. Kyselylomake täytetään nimettömästi.

Voit ottaa tutkimusta koskevissa kysymyksissä yhteyttä tutkijaan sähköpostilla: aletta.lakkala@student.oulu.fi

Ystäväällisesti Aletta Lakkala (HuK, Oulun yliopiston Giellagas-instituutti)

Oletko yli 15-vuotias saamelainen? *

- Kyllä olen.
- En ole.

Sukupuoli *

- Nainen
- Mies
- Muu

Ikä *

- 15–19
- 20–29
- 30–39
- 40–49
- 50–59
- 60–69
- 70–79
- 80 >

Äidinkieli (voit valita useamman vaihtoehdon) *

- Inarinsaame
- Koltansaame
- Pohjoissaame
- Suomi
- Muu: _____

Kotikunta *

Kuunteletko nykytilanteessa Yle Sápmiin radio-ohjelmia? *

- Kuuntelen aina.
- Kuuntelen usein.
- Kuuntelen silloin tällöin.
- Kuuntelen harvoin.
- En kuuntele koskaan.

Missä kuuntelet Yle Sápmiin radio-ohjelmia? (voit valita useamman vaihtoehdon)

- Kotona
 - Työpaikalla
 - Autossa
 - Liikkuessa paikasta toiseen
 - Urheillessa
 - Muussa tilanteessa (kerro halutessasi tarkemmin)
-

Millä laitteella kuuntelet Yle Sápmiin radio-ohjelmia? (voit valita useamman vaihtoehdon)

- Pöytäradiolla
 - Tietokoneella
 - Puhelimella
 - Autoradiolla
 - Muulla laitteella (kerro halutessasi tarkemmin)
-

Minä viikonpäivänä kuuntelet Yle Sápmiin radio-ohjelmia mieluiten? (voit valita useamman vaihtoehdon)

- Maanantaina
- Tiistaina
- Keskiviikkona
- Torstaina
- Perjantaina
- Lauantaina
- Sunnuntaina

Minä vuorokaudenaikana kuuntelet Yle Sápmi radio-ohjelmia mieluiten? (voit valita useamman vaihtoehdon)

- Aikaisin aamulla 5–7
- Aamulla 7–9
- Aamupäivällä 9–11
- Päivällä 11–14
- Iltapäivällä 14–17
- Illalla 17–21
- Myöhään illalla 21–24
- Yöllä/aamuyöllä 24–5

Mitä radio-ohjelmia kuuntelet mieluiten? (voit valita useamman vaihtoehdon)

- Radiouutisia
- Yle Sámi idit 7–8 (Yle Sápmiin aamulähetys)
- Buorre Idit Sápmi 8–10 (Yhteispojohismaninen aamulähetys)
- Dearvva! Tiõrv! Tiervá! 14.30–16 (Yle Sápmi iltapäivälähetys)
- NRK Sápmi ja SR Sápmi lähetysten Yle Sápmi kanavan kautta
- Arkisto-ohjelmia
- Hartausohjelmia
- Musiikkiohjelmia
- Sohkaršohkkaa (Yle Sápmi nuorten aikuisten ohjelma)
- Binna Bánnaa (Yle Sápmi lastenohjelma)

Mitä radio-ohjelmia et ole kiinnostunut kuuntelemaan? (voit valita useamman vaihtoehdon)

- Radiouutisia
- Yle Sámi iđit 7–8 (Yle Sápmiin aamulähetys)
- Buorre Iđit Sápmi 8–10 (Yhteispohjoismainen aamulähetys)
- Dearvva! Tiõrv! Tiervâ! 14.30–16 (Yle Sápmiin iltapäivälähetys)
- NRK Sápmi ja SR Sápmi lähetysten kautta
- Arkisto-ohjelmia
- Hartausohjelmia
- Musiikkiohjelmia
- Sohkaršohkkaa (Yle Sápmiin nuorten aikuisten ohjelma)
- Binna Bánnaa (Yle Sápmiin lastenohjelma)

Kuunteletko Yle Sápmiin radio-ohjelmia mieluummin suorana lähetystenä vai tallenteena jälkikäteen? (voit valita useamman vaihtoehdon)

- Suorana lähetystenä. Kerro halutessasi miksi:

- Tallenteena Yle Areenassa. Kerro halutessasi miksi:

Miksi kuuntelet Yle Sápmiin radio-ohjelmia? (voit valita useamman vaihtoehdon)

- Saamelaisen aiheiden vuoksi
- Saamen kielen vuoksi
- Saamelaismusiikin vuoksi
- Muun syyn vuoksi (kerro halutessasi tarkemmin)

Miksi et kuuntele Yle Sápmiin radio-ohjelmia? (voit valita useamman vaihtoehdon)

En ole kiinnostunut saamelaisaiheista. Kerro halutessasi tarkemmin:

En ole kiinnostunut saamen kielestä. Kerro halutessasi tarkemmin:

En ole kiinnostunut saamelaismusiikista. Kerro halutessasi tarkemmin:

Toimittajien vuoksi. Kerro halutessasi tarkemmin:

Ohjelmakielen vuoksi. Kerro halutessasi tarkemmin:

Ohjelmatarjonnan vuoksi. Kerro halutessasi tarkemmin:

Musiikkitarjonnan vuoksi. Kerro halutessasi tarkemmin:

Muun syyn vuoksi. Kerro halutessasi tarkemmin:

Oletko joskus asunut saamelaisten kotiseutualueella (Enontekiö, Inari, Utsjoki ja Sodankylän Lapin paliskunnan alue) ja muuttanut sieltä pois? *

Kyllä olen.

En ole.

Vaikuttiko saamelaisten kotiseutualueelta poismuutto Yle Sápmiin radio-ohjelmiston kuunteluusi?

Radionkuuntelu lisääntyi. Kerro halutessasi tarkemmin:

Radionkuuntelu väheni. Kerro halutessasi tarkemmin:

Poismuutolla ei ollut vaikutusta kuunteluun.

Oletko joskus asunut saamelaisten kotiseutualueen ulkopuolella ja muuttanut sieltä saamelaisalueelle? *

- Kyllä olen.
- En ole.

Vaikuttiko saamelaisten kotiseutualueelle muutto Yle Sápmiin radio-ohjelmiston kuunteluusि?

- Radionkuuntelu lisääntyi. Kerro halutessasi tarkemmin:
-

- Radionkuuntelu väheni. Kerro halutessasi tarkemmin:
-

- Saamelaisalueelle muutolla ei ollut vaikutusta kuunteluun.

Oletko tyytyväinen Yle Sápmiin radio-ohjelmiin? *

- Kyllä olen.
- En ole.
- En osaa sanoa.

Mihin olet erityisen tyytyväinen Yle Sápmiin radio-ohjelmistossa?

Mihin et ole tyytyväinen?

Mitä hyvää näet Yle Sápmi radio-ohjelmistossa?

Mitä huonoa näet Yle Sápmi radio-ohjelmistossa?

Millaisia toiveita sinulla on Yle Sápmi radio-ohjelmien suhteen? (esimerkiksi lähetysaikojen, kielen, musiikin ja ohjelmien sisällön suhteen)

Millainen merkitys Yle Sápmi radio-ohjelmissa on ollut elämässäsi? (esimerkiksi radiolähetyksistä jääneet muistot, kuuntelutilanteet, kuunteluymäristöt jne.)

Lapsuudessa

Nuoruudessa

Aikuisiällä